


UNIVERSITY OF TORONTO



3 1761 00594981 3











1735-1736  
LES CLASSIQUES FRANÇAIS DU MOYEN AGE

publiés sous la direction de MARIO ROQUES

---

LE  
ROMAN DE TROIE  
EN PROSE

par  
Benoît de Sainte-More

ÉDITÉ PAR

L. CONSTANS et E. FARAL

---

TOME I



1824 55.

12. 7. 23.

PARIS

LIBRAIRIE ANCIENNE HONORÉ CHAMPION  
ÉDOUARD CHAMPION

5, QUAI MALAQUAIS (VI<sup>e</sup>)

---

1922

Tous droits réservés.



PQ

1429

A2

1922

## AVERTISSEMENT

---


C'est au regretté Léopold Constans que revient l'idée de la présente publication ; c'est lui qui a recherché et étudié les manuscrits, choisi parmi eux le manuscrit de base (ms. fr. 1612 de la Bibliothèque nationale) et surveillé l'impression des quatre premières feuilles du texte.

M. E. Faral a bien voulu se charger de l'établissement du texte à partir de la page 65 de ce premier volume et de rédiger l'Introduction, les Notes et le Glossaire qui seront joints au second volume de cette édition.

M. R.

---





## LE ROMAN DE TROIE

1. CI COMENCE LE PROLOGE ET LE LIVRE DOU TRES NOBLE ROMANS DE TROIES ET DE LA PLACE OU ELLE FU FONDEE, ET COMENT ELLE FU PREMIEREMENT DESTRUITE PAR L'ACHOISON DE LA TOISON QUE JASON ET HERCULÈS ALERENT CONQUERRE EN L'ISLE DE COLCOS AU TANS DOU ROI LAOMEDON, QUI PERES 5  
FU DOU ROI PRIANT QUI PUIS FIST LA CITÉ PLUS BELE ET PLUS FORTE QU'ELE N'AVOIT ESTÉ AVANT. ET DEPUIS DESCENDIRENT LES GREJOIS POUR L'ACHOISON DE PARIS QUI RAVI HELENE PAR FORCE.

Les anciens sages qui de philosophie parlerent nous 10  
defendent a mener nostre vie ocieusement et sanz labour, par ce que ocieusetez esmuet le cuer et encline le cors a touz vices. Et pour ce amerent il ouvrer et traveillier le cors, non mie seulement a leur propre profit, mais au comun bien de touz les autres. Car, ensi come li repos 15  
est racine de vices monteplier et acroistre, ausi a en labour et en travail norrissement et accroissance de vertuz. Et pour ce devons nous mout metre noz cuers a entendre les euvres des anciens et des vieilles estoires; quar l'en i puet assés apenre des bienz et des maus que il 20  
usoient en leur affaires.

Et tout ce vos est necessaire chose a faire et a savoir : c'est le bien por ovrer pour nos et por nos amis et le mal por eschiver, quant auconne chose peut sorvenir que grever nos doie. Car par les choses passees puet l'on 25  
mout jugier de celes qui sunt a avenir, et se puet mout aidier en restorer la defaute que Aristotes dit que est es geunes homes, la ou il dit que jeunes honz ne puet

estre sages. Et a cen prover trait il avant un tel argument ; car il dist que grant sens ne puet estre, se il n'a 30  
 esprové mout de choses, et grant espreuve ne peut estre  
 sans longue vie. Mais nos devons savoir que le philosophe  
 entendit jeunesse en deus manieres : c'est d'aage et d'usage ;  
 quar il ne peut chaloir se li ons est jeunes d'eage et il  
 soit vieus par nobles merirs et par honeste vie. Et tels 35  
 jeunes fet plus a loer que le villart qui moine sa vie dis-  
 solument ; car avec l'oneste et la bone maniere que li  
 jeunes hons a pert sa bone nature, et par usage la  
 remembrance des vielles estoires et des grans euvres et  
 les bons esemples dont jeunes se eslievent, alievent et 40  
 adrecent a vigoureusement valoir et ouvrer en euvres de  
 vertus : a cen que l'ame est bone naturellement.

Et pour ce que nos entendons a traitier des anciènes estoires, non mie tant seulement por delit et profit des  
 autres, se nus en est mains sachant de moi, mais pour moi 45  
 meïsmes delitier et adrecier a bien ; et ja soit cen que les  
 romaines estoires soient plus nobles et de greignor afaire,  
 come celes que plus longement durerent que celes de  
 Troye, qui fu devant grant tens et mout merveillouz ;  
 car mout en i ot d'une part et d'autre des nobles homes 50  
 de grant auctorité et de grant savoir et de grant fierté as  
 armes, ou il esproverent merveilleusement l'une et l'autre  
 vertu : c'est force de cors et engin de cuer ; et por miaus  
 contenir l'euvre et que vos entendés miaus l'estre de la  
 chose, si vos dirons qui fu celi qui la noble cité fonda ; 55  
 après vos dirons la place de terre ou elle fu fondée et  
 quelz genz et de quel païs le vindrent a defendre et a  
 destruire.

## 2. [LE PAÏS OU TROIE FU BASTIE.]

Troye fu en une partie d'Aise que l'en apelle Turquie



outre la mer de Grece ; et de la partie dou souleil levant s'estent la terre de Perse, par quoi l'on vait jusques a la mer d'Inde ; et devers soileil couchant le bat la mer de Grece que l'on apele Bouche d'Avide, qui s'en entre, par devant la noble cité de Constantinople, par un estroit bras en la mer que l'en apele la mer Majour : non mie por ce qu'ele le soit, mais a comparation de ceste mer de Bouche d'Avide qui est toute pleine d'isles. Par devers Midi, outre Turquie, siet la terre d'Ermenie, par quoi l'en vait en Surie et en la terre d'Egypte, et par deverz Septentrion, c'est devers tramontane, outre Turquie, si est Jorgie, qui tient les rives sur la mer Majour dont nos avons parlé. 10

**2 bis.** [LE NON ET QÜI FU CELI QUI LA CITÉ FONDA.]

En si beau leuc et si delitable et en la marche de tant noble païs la planta li rois Tros et l'apella Troye par son nom. Cist Tros fu de la lignie Sem, le fil Noé. Et tant ala puis d'oïr en oïr que Laomedon en fu roi, qui fu perez Priant, au tens dou quel Troye fu destruite finalement. Si avés entendu coment Troye fu en noble païs et en bone marche por assembler illeques genz de toutepars dou siecle par mer et par terre, si est drois que nous sachiens quel fu li païs de Grece qui furent leur aversaires. 10

**3.** [QUELS REGIONS ET QUEX PAÏS S'APELLOIENT PAR LE NON DE GRECE.]

Grece est mout grant regions, et plus grant estoit adonques, si com nos vos dirons. Car de Grece est l'ile de Chypre et de Rode et de Crete, et maintes autres de celi païs, que nos ne ramentérons pas, qui toutes estoient anciénement habitees ; car, par la feiblece de la menue gent et par la force et par la cruauté des puisans de celui tans, de quoi il usoient plus que de droit,

les gens se trairent volentiers pour la seürté as illes, dont 10  
il a en Grece sans nombre, qui toutes furent habitees  
jusqu'a tens que il orent la segnorie des Romains, et  
meïsmant de Constantin, qui longement le tindrent en  
pais. Et por icele seürté laisserent il mout de ces illes et se  
retrairent a habiter a large terre, ou il faisoient plus de 15  
lour profit et de leur aises. Et por ce fu li païs apelé Ro-  
manie, et changea le non de Grece. Car encore, se vos  
demandés a un Grezois en son langage quez honz il est,  
il respondera que il est Romain, quar ce li samble une  
maniere de franchise. Et surquetout, quant il avient que 20  
aucun Grizois veuille franchir son serf de liberal franchise,  
si li dist : « Soies Romain. »

Et par deça toutes ces illes est Constantinoples et  
maintes autres terres ; quar ce est li plus grant païs de  
Romanie, qui marchist a Comenie et a Rouscie par desus 25  
la mer Majour, et jusques en Jorgie devers le païs de Sep-  
tentrion. Encores i est deça Negrepont et Acaye, ce  
est la Moree, ou est la noble cité de Corinthe. S'i est an-  
cores le païs de Thesaille, que l'on apele hui la terre dou  
Despote, et est par dela le biau chasteau de Noepant. Et 30  
par devers la mer de Puille est l'ile de Corfou et Duras et  
toute icelle terre qui marchist a Esclavonie. Si i a encores  
maintes autres illes de quoi le Livre ne fait nulle mention.

#### 4. ENCORE PARLE IL DE GRECE.

De Grece estoit encores, selonc ce que nos trouvons et  
qu'il en apert par vraies enseignes, tout le reaume de  
Sezille et Calabre et Puille jusqu'a la marche d'Anconne,  
et, par devers la mer de Pise, toute la terre que l'on 5  
apelle Mareme, qui est par dela Rome. Et que ce soit voirs,  
par toute Sezille parolle on encore en plusours leus-  
grizois, et par toute Calabre li païsant ne parlent se

grizois non. Encore en Puille en maint leuz font il le servize Nostre Seignor es mostiers a la maniere de Grece 10 et en grizois langage : por quoi il apert et voirs est sans faille qu'ils furent anciënement tous grizois. Dont vous poés entendre que le païs fu a merveilles grant et leur pooir desmesurés, si que par le bon païs et grant dont il avoient la seignorie estoient il mout redoutés par deça 15 mer. Mais de ce laisserons ores, quar bien vous ai demonstré, selonc ce qu'il me samble, l'estre de Troye et dou grizois païs, et commencerons nostre matiere, c'est a raconter la vraie estoire de Troye.

5. [QUE HONS FU PELEÛS LI ROI ET COMENT IL AÏ SON NEVEU.]

En un de ces païs de Grece dont je vos ai parlé desus, ce est en la terre de Labour, avoit une cité que Penelope fu apelee, qui hui est apelee Naple, en laquelle un roi 5 avoit que l'en apeloit Pelleüs, qui mout tenoit grant partie de cel païs que vous avés oï nomer. Cil Pelleüs estoit viaux homs et avoit a moillier une dame que Thitis avoit a non, dont il n'avoit c'un seul enfant mout petit, dont le Livre palera assés encores, qui Achillès fu només. Meis 10 il ot un frere qui fu apelés Enson, e cist ot un fil qui Jason fu només. Cestui Jason fu de mout grant beauté et de grant force et gracieus sus toutes creatures, par quoi sa renomee corroit par tous les païs de Grece et par mains autres. 15

Quant Pelleüs vit que la bonté Jason montoit chascun jour, si ot grant paour que il son regne ne li tollist; quar bien veoit que se il se vosist pener, que il ne le poroit pas contre lui defendre. Mout ot le cuer gros le roy et felon encontre son neveu, et mout se porpensoit 20 en quel maniere il le poroit metre a male fin, ja soit



chose que il ne faisoit nul samblant, ançois faisoit tous jors son corage bel envers lui. Or est il voirs qu'en celi tens, ce trovons nos, avoit une grant merveille en une ille de mer qui Colcos estoit apelee, si estoit un mouton 25 qui toute la toison avoit de fin or. Mes il estoit gardés par si fiere maniere que nus hons vivans ne le poïst geter ; si avint il bien que maint vaillans homes s'i esproverent, qui trestous i furent mors sans riens exploiter. Mais qui ceste garde i avoit mise ne peut nus savoir. 30

#### 6. PELLEÛS QUI PENSOIT DE DESERRITER SON NEVOU.

Pelleüs, qui tous jors pensoit a mal, ne vit autre voie comment il se peüst de son neveu delivrer, quar mout le doutoit ne samblant n'en osoit faire ; meis toutes voies se porpensa que il troveroit engien por quoi il le poroit 5 la tramettre, quar a seür se tenoit que il ne reperroit jameis.

#### 7. COMENT PELLEÛS PARLA A SON NEVEU.

Ne demora gaires que li rois tint une grant court ou il avoit assemblez tous ses barons. Jason meïsmes i fu et Herculès, qui son compaignon estoit. Et dit l'en que cesti Herculès fu celui qui ficha les bones, ce sunt les 5 columpnes de pierres, la ou rei Alixandre les trova, et autres granz merveilles fist il assés. Quant la court estoit si grant com je vos di, le roi apela son neveu et li dist : « Biau neveu, je n'ain rienz plus que je fai toi ; quar tu es preuz et sages, et maintes choses as tu achevees dont 10 tu es renomés sus tous les damoisiaus dou monde de ton aage. Meis encores n'as tu riens fait, quar se tu fusses si osé que le toison qui est en Colcos, dont l'en tient si grant parolle, peüsses conquerre, tu avras ton los acompli. Et saches vraiment que après cen que tu avras ce 15

conquis, je te creant come rei que tu seras hoirs de toute ma terre après moi et a mon vivant. »

### 8. COMMENT JASON S'EN ALA EN COLCOS.

Jason entant la large promesse que son oncle li fait, si en ot grant joie, et d'autre part il conu en soi tant de proesce que, puis que il s'en vodra entremetre, il en vendra au dessus. Et il avoit grant volenté d'aler en 5 estrange païs, quar c'est maniere de jeune home ; ne vers son oncle ne repensoit il nul mal engin, ançois quidoit certainement que tout ce li deïst pour son honour acroistre, si l'en mercie mout humblement : « Sire, fait il, je voi bien que mon henour amés sur toutes choses et que 10 grant chose m'avés promise. Veez moi tout prest de l'aler a vostre servise, quar endroit de moi je n'ai cure de grant demorance faire, et, se Dieu plaist, je acheverai la besoigne a la vostre volenté et a l'onor de moi. »

Mout se tient Pelleüs a bieneüré de ceste chose et de 15 ceste responce, et por ce manda maintenant por Argus, qui estoit le souverain engignour de Grece, et li commanda que une nef soit faite hastivement et apareillie de toutes choses qui i besoignent. Ensi comme il ot commandé fu fait, et veullent dire acune gens que ce fu la premiere 20 nef qui portast voile. La novele fu tantost esbandue par tout de la nef que Pelleüs faisoit faire, ou Jason devoit aler querre le Toison. Dont il avint que tuit les plus prisiez bachelierz dou païs s'en vindrent offrir a Jason, et il les mercia mout et leur devisa le terme que il fussent 25 prest et apareilliez.

### 9. COMMENT JASON ARIVA EN LA TERRE LAOMEDON.

Quant vint au novel tens, la nef fut toute apareillie et garnie de viande et de cen qui covenoit, et fu apelee

Argo por le non d'Argus qui faite l'avoit. Jason se recuelli dedens et Hercullès, et avec euz toute leur compaignie ; 5 et tant siglerent par jor et par nuit que il vindrent au port de Troye, dont Laomedon estoit roi et sires, et maintenant descendirent a la terre, com ceaus qui desiranz en estoient. Et quant il furent au port descendu, que auques estoit pres de la ville, et ilueques se refrechis- 10 soient, com ceaus que grant volenté en avoient, la novelle vint au roi Laomedon, et tantost l'en li fist a savoir, que Grizois estoient arivez en sa terre sans congié. Et il fu de grant sens, si redouta mout le peril que avenir li poeit, se cil de Grece apreïssent a venir en son païs, si 15 lor envoya un message, a qui il encharja la parolle. Cil vint au port ou il trova les Grizois, si lor dist son message en tel maniere.

**10. COME LI MESSAGE PARLE A JASON.**

« Beauz seignor, fist il a Jason et a ses compaignons, li rei vos mande et prie que vos li voidiés sa terre, quar vos i estes entrés sans son congié, ne il ne set por quoi. Alés vos ent, quar, s'après son defens vos i estes 5 trovés, vous ne ferois pas que cortois ; car, sans faille, il redoute mout vostre soudaine venue. »

**11. QUE JASON RESPONDI AL MESSAGE.**

Jason oï la defense et le mandement dou roi, si en ot grant honte, et au message respondi : « Est cen que nous deüssons estre henourés et servis comme estrange gens, si comme nous eüssons fait a lui, se il fust en 5 nostre païs venus, et il nos a congeé si orguillousement. Or vos en alés et dites li que nous ferons ce que il nos commande ; mais seür soit il que nous n'obliions pas



ceste honte. » Tout autretel respondi Hercullès et tant plus : « Vai et di a ton saignor que, ançois que un an 10 passe, nos enterons en sa terre sans son congié en tel maniere que mout li grevera, et si ne le pora amender. »

**12. QUE LE MESSAGE LOR RESPONDI.**

Li message leur respondi : « Biaux seignorz, laide chose est de manacier, mais toutes voies vous ai ge dit mon message, si poés demorer se il vos pleist; mais je 5 vos lou que vos vos en alés. » Atant se parti, et cil demourerent mout courouciés ; et se il en eüssent le poër, il l'amendassent volentiers. Mais toutefois s'en revindrent a lor nef et se partirent de la terre, et mout regrettoient la honte que Laomedon lor avoit faite. Et tant alerent qu'il ariverent a Colcos. Illeuques descendi Jason 10 et Hercullès et toute lor compaignie si noblement vestus et acesmés que chascun sambloit un rei. Or avoit une cité pres d'ileuques qui Jaconidès estoit apelee, qui mout estoit bien assize et bien habitee, dont le rei avoit non Oëstès. 15

**13. COMENT JASON ARIVA A COLCOS.**

Le jor que il ariverent faisoit mout biau tens, si s'en vindrent a la cité o toute lor compaignie et alerent aval les rues tant que il vindrent a maistre palais ou le rei tenoit sa court. Et quant il entrerent eu palais, le 5 rei leur ala a l'encontre et les reçut mout honorablement, quant il sot dont il estoient et l'achoisson de leur venue. Après les fist aseoir au mangier, Jason et Hercullès encoste lui, et mout les henora de tout son pooir. Et quant il orent mangié, le rei envoya querre sa fille, qui 10 Medea estoit apelee, et il n'avoit plus hoir. Et elle estoit de merveillouse biauté, mais avec tout ce si estoit ele

tres sage durement en l'art de nigromance, comme cele qui tout son tens i avoit mis. Que vos dirons de ces merveilles ? Assés vos seroient merveillouses a entendre et a moi grevouses de raconter, a ce que assés avons a dire encore autre chose. 15

Medea vint en la sale mout noblement acesmee tout le petit pas, la chiere auques enclinee vers terre, et estoit de si grant beauté que nule plus ; et surquetout se sem- bloit elle si sage et de si noble maniere que tout en furent esbaïs li Grizois. Son pere le fist seoir dejoste lui, et elle li demande de quel país ces gens sunt ; et quant elle soit que ce estoit Jason, si en ot mout grant joie, quar elle avoit oï soventes foiz paler de lui, et por ce ne pooit elle ses iauz oster de sus li, quar sa forme et sa semblance li sambloit trop bele. Que vos diroie je ? Tant le regarda Medea et tant i mist s'entente que elle fu si surprise d'Amors qu'ele ne savoit que dire ; si pensa que mout priseroit son sens, s'elle pooit avoir de li sa volenté. Mais sor toutes choses ameroit ele le mariage. 20 25 30

#### 14. SI COME LA DAMOISELLE L'AMA.

Ensi souffri Medea toute une samaine cette paine d'amorz, et mout pensoit curieusement en quel maniere elle poïst avoir loisir de parler avec lui. Si avint un jor après disner que li rois la fist venir devant lui et li fist mout grant joie, et après li commanda qu'ele alast a conjoïr Jason et Hercullès, quar il le voloit bien. Et cele, qui d'Amors ardoit, s'en vient vers lor toute hontouse et mout afeitee de bien parler, et leur fait mout grant joie. Et quant elle fu assise delés eaux, si dit a Jason tout basset : « Sire, ne tenés mie a vilainie se je parolle a vos, ne ne quidiés que ce soit par folie, quar il ne vos doit grever se je me veul acointer de vos ; que droit et raison 10

me semble que quant l'en voit home d'estrange païs, que l'en parolle a lui et li done l'en loial conseil. »

15

#### 15. COME JASON MERCIA LA DAMOISELLE.

« Dame, dist Jason, de ceste grant cortesie vos mercie je mout, quant il vos pleist que vos parlastes avant a moi, quar vos en avés fait mout que debonaire, si vos en serai feel tous les jors de ma vie; et mout poés avoir grant joie que Dieuz vos a enluminee de merveillouse beauté, et sur tout ce vos a, dame, doné si grant savoir. »

#### 16. COME MEDEA PARLA.

Adonc parla Medea a Jason et dit : « Bien sai que vos estes ci venus por le Toyson d'or, mes vos ne ferés mie que sages; quar, se tous ceaus qui sont nes de mere fussent ensamble, ne poroient il engin trover coment il le peüssent avoir; et por ce vos getés hors de ceste fole enprise, quar maint home s'i sont ja traveillié, ne je n'antendi onques que nus en eschapast. Quar les dieus i ont leur gardes mises, si comme je vos dirai, quar grans mestiers vos est dou savoir. Mars, li dieus des batailles, i a mis dous buefz que, quant il sont corrociés, flambe lor ist de feuc ardant par mi la bouche, si que nus hom vivant n'i porroit aprochier que demanois ne fust tout ars; si i sont mis par art et par conjurement, et qui voudra avoir le Toison, si convendra qu'il les puisse si donter que il les face arroies traire. Encores plus i a grant peril: ce est un serpent vollant qui giete feuc distrempé avec venin, mout hidous et espoëntable. Et celui ne puet estre conquis par nul engin. Que vos feroie je long conte? La chose est si grief que nul n'en poroit a chief venir, et por ce vos loeroie je que laissiés ester ceste folie, se tu ne desirres ta mort. »

10

15

20



## 17. QUE JASON RESPONDI A LA DAMOISELLE.

Jason respondi et dist : « Dame, por Dieu merci, je vos pri que vos ne m'esmaiés pas, quar je ne sui mie por ce ça venus. Miaus ain je morir que je mon pooir n'en face, quar je seroie honis a tous jors. Mais por ce, soit mal ou 5 soit bien, mon pooir ferai de l'ensaier. »

## 18. QUE MEDEA RESPONDI A JASON.

« Jason, dist Medea, je voi bien que nus ne te poroit de ta folie retraire, si me prent mout grant pitié que je te voi si desirrer ta mort. Mes se je fusse seüre que je poïsse avoir t'amor, et que jamais ne me deüsses 5 guerpier et me preïsses a feme, je prendroie engin coment tu vendroiez a chief de ceste emprise, quar nus n'eu te puet aidier fors moi. Car je sai de nigromance tant que tout m'est legier quant que est grief. Or esgarde que tu feras et me di ton cuer sans riens celer. — Dame, fait il, 10 je vos jurerai sus tous les dieus de votre loi que je vos espouserai a feme et vos garderai loiauté, et vos henourerai comme cele qui de moi avra tous jors mais la seignourie, et vos enmenrai avec moi en mon païs, ou vos serés henouree de tous les plus haus homes de la terre, 15 et de ce vos aseürai je a vostre devis. »

## 19. QUE MEDEA RESPONDI A JASON.

Medea respondi : « Puis que oï ai vostre volenté, vos remaindrois jusques au soir, que li reis sera couchiés, et lors vendrois a ma chambre tout seul et m'aseürois a ma volenté, et je vos mostrerai la voie de vos chevir sor la 5 besoigne por quoi vos estes venus. — Dame, fait il, ainsi soit ; mes envoiés a moi quant vos plaira, quar je ne savrai ou je iroie ne a quel heure. » Et atant s'em parti li uns de l'autre. Jason s'en ala a ses compaignons,

et la pucele s'en ala a sa chambre, ou elle demoura mout 10  
entreprise, quar le soleil li tardoit mout que il fust cou-  
chiés. Et quant la nuit fu venue, si li torna a grant  
ennui que cil par la sale aloient. Et por ce aloit sovent  
veoir a l'uis de la sale se il parloient de dormir, et atendoit  
que la gent fust couchie, et se reprenoit mout entre soi 15  
meïsme et disoit : « Lasse, come fu ge folle et de quoi  
me sui je entreprise ! Ne poroie je estre blasmee plus  
que nule autre feme fust onques, quant en un home es-  
trange ai mis mon cuer dou tout ? » Et ensi se departoit  
de l'uis de la chambre et se rasiet sur son lit. Mes mout 20  
tost se leva, come cele qui ne pooit ester en un leuc ne  
demourer, et ala ovrir une fenestre, et voit que la lune  
fu levee, si quida bien que il fust pres dou jour, si fu  
mout couroucee ; et retorna vers l'uis de la sale et voit  
que les gens se couchoient, si en ot grant joie. Après, 25  
quant elle oï la noise abassee, si qu'ele quida bien que  
tous fussent endormis, si apela une sue maistresse en  
qui elle mout se fioit et l'amonesta d'aler au lit Jason  
belement sens noise faire et l'amenast avec lui en sa  
chambre. La vieille dist que volentiers feroit son com- 30  
mandement, mes couchast soi avant, si seroit plus cove-  
nable chose, « quar il est mout tart, si ne seroit mie ave-  
nant que il vos trovast veillant a tel heure ». A ce s'a-  
corda la pucelle et se coucha en un mout riche lit. Et la  
vieille s'en est droit alee vers le lit Jason et le sache a 35  
soi par la main ; et cil se leva maintenant et afubla un  
mantel a son col et s'en entra maintenant en la chambre  
après la vieille. Laiens ardoient dous grans tortis, si que  
l'en veoit mout cler. Et il s'en vint jusques au lit ou la  
pucelle gisoit. Et quant elle le senti, si fist grant sam- 40  
blant de dormir ; et cil comme cortois prit le covretour et  
le leva un poi tout belement ; et celle tressaut et se torne

envers lui comme toute esfreee de paour : « Vassal, fait elle, qui vos conduit a tel heure ? Quar trop m'a fait veillier la noise que vos avés demenee, si que hores a 45 primes estoie je endormie. — Dame, fait il, je ne requiër autre conduit que de vostre maistresse, et ne m'en soit de pis se je sui mis en vostre prison. »

**20.** [COMENT JASON JURA A MEDEA ET LA CONUIT.]

A ces parolles les laissa la vieille et s'en ala en une autre chambre. Si parla Jason et dist : « Dame, celui qui est tout vostre vos prie que vos le recevés si liement que il ne face jamais chose fors que tout vostre plaisir. » Et 5 Medea li dist : « Biauiz amis, mout me prometés grant chose, se loiaument le volés tenir, ne je ne demande plus. — Dame, fait il, a vostre plaisir soit d'asseürer vous de moi et je le vos fiancerai en tel maniere que a tort vos douterois de moi. » Adonc se leva Medea de 10 son lit et aporta un ymage dou deu Jupiter : « Veez ci l'ymage as deuz, fait elle, si me jurés a tenir et porter foi, et je vos tendrai des ore mais a leial ami et a seignour. » Tout ensi li jura Jason, ja soit chose que il s'en esparjurera après villeinement. Mes en nostre matiere 15 n'appartient pas, por quoi nos nous en soufrerons, mes que toute la nuit furent ensamble et li tolli Jason le non de pucelage. Et quant vint au jor, si dist Jason : « Dame, il m'est avis que je poroie ci trop demourer : pensés de ma besoigne, quar en vos est toute m'esperance. 20 — Ce sachiés, fait elle, que je en ai pris bon conseil. » Adonc se leverent ambedui. Après deferma Medea un petit escrignet, si en trait hors un ymage ovré par art soutilment et li bailla et dist : « Tu porteras ce aveuc toi, quar, tant com tu l'avras, riens que soit ne te 25 covient douter. » Après li bailla un sien ongement et



dist que il en deüst son cors oindre, quar ce la defen-  
deroit dou feuc et dou venim. Et puis li dona un anel  
dont la pierre estoit de tel vertu, quar qui l'avoit sus  
lui ne poroit douter ne feu ne eve ne d'estre vencus en 30  
bataille; et si avoit autre vertu, « quar, se vos tornés la  
pierre dedens vostre main, ja ne porés estre veüs, et  
quant vos la tornerés dehors, si reserés veüs come de-  
vant. Mais sur toutes choses te pri que tu le gardes bien,  
quar c'est la chose que je plus aime. » Puis li baille un 35  
escrit et li dit : « Maintenant que tu verras le monton,  
garde que tu ne voies avant jusques a tant que tu l'avras  
dit trois fois contre Orient, quar par aventure les dieus  
se coureceroient de ce que tu veus faire, et par ce les  
repaieras. Or te bailleraï ceste glus qui est par tel ma- 40  
niere faite et destrempee que ja ne toucheras a rien qui  
ja mais soit defermee : et por ce t'en vai mout tost vers  
les bues, et si lor sourmet a la bouche et au nes, et  
maintenant l'avront estoupé; et puis les feras arer quatre  
aroies. Puis va t'en tost au serpent, qui grant bataille 45  
rendra, mes de ce ne te convient a douter, quar tost en  
seras delivrés. Et maintenant que tu l'avras conquis, oste  
li trestous ses dens et les semme en la terre que tu avras  
arree, quar ainsi le convient a estre. Et de ce verras tu  
maintenant naistre dous chevaliers armez de toutes armes, 50  
et devant toi se combatront tant que andui i seront mort.  
Adonques auras tu toute achevee ta besoigne. Mais  
bien garde que por la victoire que tu avras que tu ne  
soies oublious de rendre grace as dieus. Et puis t'en vai  
vers le monton bellement, si en prinras la toison et lui 55  
laisseras, et t'en vien tout maintenant. Si t'ai ore dit tout,  
si que je ne te puis plus mostrer. Garde que de rienz ne  
soies oblious, et desormais te met a la voie, quar il est  
grant jour, ce m'est avis. »

**21.** [QUE LI ROIS OESTÈS AMONESTA JESON.]

Jason la prist adonc entre ses bras et la mercie mil fois et s'en torne a son lit atout ce qu'ele li a doné ; si estoit mout liés de grant maniere, et por le veillier que il avoit fait si s'endormi ; si s'enveilla et apareilla maintenant, 5 quar tens li sambloit d'aler. Mes ses compaignons ont de lui mout grant doute. Et quant li rois Oestès voit ce que Jason voloit faire, si li prist a dire moult bonement : « Jason, fait il, de ta mort ne veul je estre blasmés, et por ce te di que se tu mon conseil vosisses croire, que 10 tu n'iroies en nule maniere ; quar je n'oï onques paler que nus i alast qui jamais revenist arrieres, car les dieus i ont mises leur gardes : por quoi je croi bien que tu vais a ta fin. Mes ce saches tu que a force ne te reten-droie pas, quar vileinie me sembleroit. Fai ainçois ce que 15 tu voudras, mes ce est contre ma volenté. »

**22.** [QUE JESON NE VOST ENTENDRE L'AMONESTEMENT LE ROI.]

De chose que li rois die n'a cure Jason de rien, ains se part maintenant de la cité, et Hercullès et ses compaignons le convoient jusques au rivage, et illuec li cove- 5 noit passer un bras de mer petit por aler en l'ille. Puis entra ou batel sans demoure, puis si s'arma de toutes armes, puis arriva en l'ille ou le monton estoit. Medea estoit montee sus une tor, et quant elle le voit en mer, si ne se pout tenir de plorer et dist basset : « Beaus 10 douz amis Jason, en grant errour avés mis mon cuer, quar je vos ain de si fine amour et de si vraie que je ne puis estre seüre jusques a tant que vos soiez revenus ; car je ne dout autre chose mes que vos n'obliés riens de ce que je vous ai dit et enseignié, car jamais n'avroie joie 15 en mon cuer : por coi je pri les dieus qu'il vos soient amiables. »

23. [COMENT JESON CONQUIST LA TOISON ET SE RETORNA EN SON PAÏS].

Endementiers Jason a tant alé qu'il arriva a l'isle, et maintenant prent son escu et son gleive et s'en ist hors dou batel, et choisi les bues et le serpent et le monton 5 qui de fin or resplendissoit, et maintenant prist l'oignement, si en oint son cors et sacrefia la figure que Medea li bailla, puis l'atacha sor son heaume; après lut l'escrit trois fois, si come la pucelle li enseigna, et maintenant se treit vers les bues que tel feuc et flamble 10 getoient que maintenant fu son escu tous ars, se ne fust qu'il prist la glus et la lor expandi en la bouche, ne onques puis feuc ne flambe n'en issi; puis lour fist faire quatre arees. Et quant il ot ce fait, maintenant ala a serpent requerre, que si hidous estoit dou feu que 15 il getoit par mi la boche et les narilles, et de l'esbatre et dou sibler que il faisoit, que nus hons vivans ne le poroit esgarder que toute paour n'en eüst; et se Jason ne fust esté si bien garni, mors fust sans faille maintenant; mes les argumens que il avoit sur lui le guaran- 20 tirent. Toutefois ferit il sus li et depecha la lance, mais nul mal ne li fist. Après mist la main a l'espee et li done tels cols que l'ille en retentist. Et cil diable avoit la pel si dure que fer n'i pooit entrer, si avenoit mainte fois que il abatoit soz lui Jason si angouseuse- 25 ment que li sans li sailloit par mi la bouche. Si s'en failli mout pres que il ne morut, mes toutes voies s'esforça il tant que par engin aveuc l'aide de s'amie, que en la fin li coupa il la teste; et maintenant li traist les dens et en a semé la terre que il ja avoit arree aveuc les 30 beufz. Et tantost en issirent deus chevaliers tous armés qui demenois s'entrecoururent sus et s'entrocistrent.



Lors ot Jason tout finé, si rendi grace as dieus et s'en vint vers le monton et li osta la toison et se revint maintenant arierez, si comme Medea li ot dit. Et quant 35 elle le vit revenir, ne demandés s'elle en ôt grant joie, quar des hores a elle tous ses bons. Mes le rei n'en fu pas lié. Toute fois vint a la rive, et Hercullès et ses compaignons l'en menerent a grant joie et a grant compaignie dedens la ville. Tout li haut home 40 dou païs et le menu pueple estoit venus por la merveille regarder, qui leur sambloit mout grant et mout estrange. Et quant il entra au palais, Medea vint encontre lui et li fist grant joie et en l'abassant li dist qu'il venist le soir parler a lui. Et cil respondi que 45 mout volentiers, et maintenant que il fu baigiés por le venin et il fu revestus, si s'assistrent au mangier, et briefment tout le mois après sejournerent les Grizois en la ville, si que grant loisir orent li dui amans de faire lor desir. Et en la parfin l'en mena Jason avec lui en son 50 païs, dont elle fist grant follie, et mout s'en repenti après, si comme li auctor dit, quar celi lassa sur une ille de mer, et si estoit grosse de dous enfans. Et puis fist elle tant que elle se parti de l'isle et se delivra des enfans, et tant quist Jason qu'ele le trova, et lors tua 55 ses deus enfans, si en prist les cuers et les entrailles et les dona a mangier a Jason qui engendrés les avoit de sa char, et puis après geta devant lui les piés et les mains des enfans et li dist que ce estoient les membres de ses filz que il avoit engendrés, dont il avoit les 60 entrailles mangiees, et qu'ele avoit cen fait en vengeance de ce qu'ele l'avoit delivré de mort et il l'en avoit rendu aspre gueredon comme d'elle laissier en une ille sauvage. Por quoi les sages jugent que ceste fu la plus crüel mere qui onques fust. Et si ne parlerons plus de 65

li, ançois dirons de Jason et Hercullès et de leur compaignie, qui se vindrent en Grece an grant joie et mout furent bien recuillis de leur amis. Et li rei Peleüs meïsmes les conjoï mout et ne moustra pas que il fust coureciés de la venue de son neveu, quelque voloir 70 que il eüst. De ce m'en soufera je ores et parlerai de ce que je ai proposé.

#### 24. COME IL FURENT AU PARLEMENT.

Quant la chose fu reposee, cil firent assembler tous les princes dou païs et distrent le grant outrage que cil de Troie lor avoient fait et quoment il les avoient honteusement congeés de leur terre. De ce furent trestuit 5 mout dolent et iriés, et jurerent que il vengeroient cest mesfait, coment que la chose doie aler. Meïsmement Hercullès en fist grant parolle et moustra a ses amis le grant outrage des Troÿens ; et s'en ala a Parte, ou il trova Castor et Polus ; et après s'en ala a Salemine, ou 10 il trova Thalemon, et a Peleüs meïsmes en dit il assés ; et tant sarmona et dist a ces princes que trestous les a esmeüs contre les Troïens. Et proposerent de commencer la guerre si tost come leus et tens en fust, si ont appareillies trente nes mout bien garnies de 15 toutes choses.

#### 25. COM IL ARIVERENT A TROIE.

Quant vint le novel tens, Hercullès, qui tous les avoit semons, manda par tous les païs as princes et as barons, qui mout tost furent venus toz appareilliez. Et se mistrent en mer, et tant avient qu'il vindrent a la terre 5 que il desirroient. Et quant il virent le païs de loing, si baissierent lor voilles et demourerent tout le jor. Et quant le jor s'en fu alés et il fist bien oscur, si se traient

vers le port et ancrerent lor nes et enchastelerent bien et enbataillèrent, si comme il avoient mestier, et les tres-  
trent mout pres de terre, por ce que se aventure lor  
donast le peior de la bataille, que les nes lor fussent fer-  
meté et chastel.

## 26. QUE PELEÛS PARLA.

Après ce que la lune fu levee, li baron et li haut home  
issirent tout hors des nes sus le sablon por tenir lor  
parlement. Pelleüs parolle avant et dit : « Oiez, fait il,  
beaux saignors, il n'a gens au monde qui tant aient fait  
d'armes com nos avons et qui tantes victoires aient eües ;  
et tant avons conquis et tant fait que par tout le mont  
acroist nostre renomee. Or est il voirs que nos somes en  
cest païs entrés por vengier nostre honte que ceste gent  
nos ont fait, si doit chascun penser que la chose vieigne  
a tel chief que nos aions la victoire. Et por ce vos veul  
je moustrer trois choses qui bien sont a esgarder. L'une  
si est de penre vengeance dou tort et de la honte qu'il nos  
firent, quant il nos congeerent si laidement hors de lor  
païs. L'autre si est dou damagier la terre en tel maniere  
que jamès ne vos puissent riens mesfaire ; et je sui cer-  
tain que de ce avons nos grant pooir, se faire le volons.  
La tierce est que je vos faiz a savoir qu'en tout le siecle  
n'a si riche ville d'or et d'argent et de dras de soie et  
d'autre richece, si que tous tens nos et nos hoirs en  
serons riches et manant, et toute Grece en avra de miez  
jusqu'a mil ans. Or n'i a que demourer, quar la nuit s'en  
vait. Armons nos et devisons et partons nos gens et nos  
batailles par tel sens et par tel maniere que l'onor en  
soit nostre et li damages de nos anemis. Et qui veut  
autre dire, si soit entendus. »



**27. SI COME HERCULÈS PARLA.**

Herculès parla et dist que bon conseil avoit doné le rei : « Faisons armer nos gens et une partie s'en voise vers Troie et l'autre demoure a la navie. Thalamon ou toute sa gent et la nostre chevacherons avant, et vous ; venrés après, et nous nos enbucherons plus pres des murs : les autres, qui demouront ici, se partiront en trois eschielles. En l'une sera le rei Nestor, en la seconde Polus et en la tierce Castor son frere. Et je croi que, quant les Troÿens les verront, il istront hors atout lor 10 effort por combatre a ceuz, et la cité remandra toute voide, et vos maintendrés la bataille contre eaus. Et nos istrans hors de nostre enbuchement et sans nul contredit enterrons en la ville. Quant nos avrons les portes saisies et garnies de nos chevaliers, si lor vendrons par derieres 15 et les enclorons en tel guise que, se il voïssissent a la ville retorner, il les convendra passer par nos mains. Et ensi les avrons trestous mors et pris, et ce est li miaux que je i voie. »

**28. SI COM IL S'ARMERENT TOUS.**

Mout fu cest conseil loés de tous, et maintenant s'armerent trestuit et deviserent lor gens. Si chevacha tout avant Herculès et Thalamon, et bien orent en lor compaignie deus mile chevaliers ; et Pelleüs après, atout trois ; mile chevaliers trestous montés, lor enseignes beïssies. Et avant que li jors fu venus, s'embucherent au vergier delés la ville, qui mout estoit espés, si com il sunt entour le novel tens ; et por ce ne les porent cil de la ville 10 aparçoivre. Et quant le soleil commencha a espandre ses rois par mi la terre, li païsant de la contree virent ces gens et la navie, et les enseignes venteler contre le vent, si devés savoir que mout furent esfroiés. Li cri lieve par

le païs et le resson grant et horrible, et s'en vont fuiant 15  
par bois et par montaignes et par repostailles et par  
boissons. En la cité meïsme commencha li cris, quar li  
plus hardi n'estoient mie bien aseür.

**29. SI COM LI ROIS LAOMEDON SOIT LA VENUE DES  
GREJOIS.**

Li rois Laomedon, quant il oï dire que li Grigois  
estoient retornés por son païs destruire, maintenant  
s'arma a tant de gent comme il pot et s'en issi hors de 5  
la ville contre ses henemis; et tantost comme il les cho-  
sirent, les alerent ferir, et il les rechurent bien et hardie-  
ment. Et quant il orent lor lances brisees, si mistrent  
main as espees. La poïssiés veoir froissier heaumes et  
esquarteller escus et chevaliers cheoir mors de lor che- 10  
vaux et destriers aler sans leur meïstres par mi le sablon.  
Nestor et sa compaignie les encontrerent premierement,  
que grant piece mentindrent l'estor avant que Castor i  
fust venus li et Polus; mais des que ces deus virent le  
grant besoing, si commencerent vigourousement a 15  
requerre lor anemis.

**30. COMENT GREZOIS GUERPIRENT LA PLACE.**

De ceaus de Troie devés savoir que mout se force  
chascuns de bien faire et estrangement domagirent lor  
enemis, et onques de cele place ou il s'assemblerent ne  
guerpirent plein pié tout le jor, et adès creïssoit lor 5  
gens. Si veïssiés descendre enseignes par mi valees et  
par mi montaignes, dont li Grizois furent mout esbahis,  
que il resortirent plus d'une grant abalestree vers la mer.  
Et se ne fust le conroi Polus, desconfit fussent. Meis  
quant il vindrent, si veïssiés le jeu renover et gens 10  
ocirre a grant dolour. La le firent li Troïen merveillou-

sement, mais ce ne fu mie sans damage de lor gent.  
 Quant le rei Laomedon vit sa gent ensi mesler, si fist  
 soner un cor d'ivoire et fist sa gent retraire en sus et les  
 ordena par eschielles, et puis se remetent en la preisse. 15  
 Nestor li vint a l'encontre. Le rei le fiert de son glaive  
 par mi l'escu, et se li aubers ne fust si fors, mort l'eüst  
 sanz faille. Nestor refiert lui par tel vertu que il l'abati a  
 la terre; mais il se relieve vigourousement et li dona  
 trois cos de son branc sor le heaume, si qu'il le fist tout 20  
 chanceler. Un Troïen qui Cedar avoit non, mout jeunes  
 hons, quant il vit le rei abatu, si en fu mout dolent, si  
 prist un glaive et ala ferir Nestor si qu'il l'abati de son  
 cheval. Adonc vint sus li Laomedon et le feri tel cop sus  
 le nasel qu'il abati dou levre et dou menton a terre. Et, 25  
 sans faille, il ne li fust pas eschapé, se la grant presse ne  
 fust si tost sorvenue, qui les fist dessevrer. Mais avant  
 qu'il fussent remontés, i orent maint vaillant chevaliers  
 perdu les cors.

### 31. COME CASTOR JOSTA A CEDAR.

Castor ot bien veü Cedar quoment il avoit Nestor  
 abatu, et vait come fel et ireus, si encontra un qui Segu-  
 radan avoit non, cousien Cedar. Cil brisa sa lance sus  
 lui, et Castor le fiert si que le fer de sa lance o toute 5  
 l'enseigne li fist passer par mi le cors; et cil chaï mort,  
 dont il fu grant damages. Quant Cedar voit ce de son  
 cousin, si fu mout iriés, et print un glaive et fiert Castor si  
 que il le navra en mi le pis et l'abati a terre, si fu illeuques  
 retenus. Meis quant li rois Polus soit que son frere estoit 10  
 retenus, si se fiert entre eulx et tant fist que il l'ensceut  
 et le remonta, et maintenant josta au fil le roi de Cartage,  
 Eliacois avoit non, fil de la serör le rei, si l'abati mort.  
 Si en fu a merveilles dolent et fist maintenant soner un

cor et traist sa gent entor soi et lor dist : « Seignor 15  
 princes, veés ci nos enemis qui veulent nostre terre  
 destruire et nos et nos enfans et nos femes ocirre. Or  
 doit chascuns esprover sa vertu. » Et lors se firent  
 entre lor enemis, fiers et orgueilleus et plains d'ire, et en  
 ocient tant que ce seroit merveilles a raconter ; et a la 20  
 fin les avoient desconfis et menés jusqu'a la mer. Mais  
 un message vint au rei et li dist : « Sire, por quoi ne  
 vos en alés et sauvés vostre vie ? Veés ci la grant gent  
 qui viennent contre toi, et ont prise ta ville, si que lor  
 gens et lor enseignes sont ja toutes sus les murs. 25

### 32. COME LE ROI CONFORTA SES GENS.

Quant le rei l'entent, si fu mout dolent et espoëntés,  
 jasoit ce que il n'en fist semblant, ains dist a ceoiz que  
 estoient entor lui : « Ore est l'eure venue, beau seignors,  
 que nostre vertu ier esprouvee. Nos ne devons penser 5  
 d'aler vivre en autre terre, quar nostre vie seroit hon-  
 teuse : miex nos vaut a morir en defendant nostre païs  
 honourablement. Et se fortune nos consent et nos soit si  
 debonaire que nous ceste vil gent peüssons destruire et  
 delivrer nostre païs, plus grant gloire ne porïons nos 10  
 avoir. Or i para que nos ferons. »

### 33. [COMENT HERCULÈS OCIST LI ROI LAOMEDON].

Adonc se fiert entre ses annemis dolens et couroucié  
 et fiert et abat quant qu'il ataint ; mais tout ce ne vaut  
 rien, quar il voit venir par deriere lui Herculès et sa  
 gent ociant et abatant quant que il ataignoit, comme cil 5  
 qui estoit tous freis et li Troïens las et traveilliés. Si  
 seoit Herculès sus un merveillous cheval, le bran d'acier  
 en sa main, dont il feisoit droites merveilles ; quar  
 mainte fois avenoit que il copoit tout le cheval oultre,



et faisoit d'un chevalier dous moitiés, si que il ne tro- 10  
 voit nul qui a cop l'osast atendre. Si a tant alé qu'il  
 encontra Laomedon et li done tel cop que il li fist la  
 teste voler devant tous les siens. Et quant les Troïens  
 virent lor seignor ocis, chascun fu desconfit et se  
 mistrent a la voie. Mais li Grizois lor vindrent a l'en- 15  
 contre et les ocient a lor volenté.

#### 34. SI COME GRIJOIS ENTRERENT EN LA CITÉ DE TROIE.

Quant la bataille fu finée, si entrerent en la cité sans  
 contredit, quar il ne troverent que femes et enfans, et le  
 cri et le plour estoit mout dolereus. Les femes coroent  
 esperdues et ploranz, lor enfans entre lor bras, par mi les 5  
 rues et par les places et fuoient a garant par les mos-  
 tiers. La peüssiez veoir maintes dames et puceles qui ne  
 savoient que devenir, et onques si grant dolour ne si  
 crüel damage ne tel honte, come il tous en faisoient, ne  
 vos poroit nus hons retraire. Si demourerent bien un 10  
 mois après, et maint bel tresor d'or et d'argent et de  
 vaisselement et de drap de soie i troverent, si que il  
 furent tous encombrés du porter. Et puis ardirent et  
 abatirent toute la ville, que onques n'i demora maison  
 entiere ; des femes firent lor volenté, si en menerent en 15  
 lor païs Exiona, la fille dou rei. Herculès la dona a Tha-  
 lamon, por ce que il entra le premir en la ville, et il ne  
 le deigna onques espouser a feme.

#### 35. SI COME IL RETORNERENT EN GRECE.

Quant il orent toute la ville destruite et tout le païs  
 essillié, si s'en retournerent en Grece a mout grant joie, si  
 sacrefierent a leur dieus et firent grant feste, quar assés  
 avoient de quoi, que jamais povre ne seront de la richesse 5  
 qu'i troverent a Troie. Si vos ai dit l'achaison et l'eu-

vre por quoi mut si grant destruction, qui par assés  
 petite chose commença, et puis monta et crut tant com  
 vos avés oï. Car onques chose de fleibe commencement  
 n'ala a si grant peril, selonc ce que nos trovons, quar 10  
 bien pres que tuit li meillor de celui tens i definierent  
 lor vie douloureusement. Mult fu le commencement  
 foible, dont la fin fu si tres durement perillouse.

### 36. C'EST UN ESSAMPLE.

Saignor, ceste ovre devoit mostrer essample a toutes  
 gens de non estre mellis ne desmesurés, meis souffrant en  
 toutes choses meïsmement en parolles de porter et estre de  
 bel acuil as estranges et de cortoise response as privés, 5  
 car bone parolle est choise qui poi coste et mout vaut.  
 Et de ce dist li Sages que la parolle douce desbrise ire  
 et monteplie amis et adebonairist les cuers des enemis.  
 Et ces choses puet l'en chevir par parolles sages et  
 humbles plus que l'en ne poroit faire par force d'armes 10  
 ne par autre engin. Et nos trovons que trestous les sages  
 qui ont esté devant nous tens ont seü toutes choses par  
 humelité et bonne souffrance et ont blasmé ire et orgueil,  
 aveuc le quel l'en ne puet nule chose mener a bon chief. 15  
 Car, coment que le commencement en soit de grant  
 prosperité, la fin, qui est li miaus de cele evre, en est  
 tous jours pesmes et crüel. Mais de ce laisserons ores a  
 parler, quar assés i avroit a dire, et retournerons sor  
 nostre matiere, ce est a conter comment li Troïens qui 20  
 eschaperent se maintindrent après ce que leur ville fu  
 destruite.

### 37. SI COME PRIANT OÏ NOVELLE DE TROIE.

Li rois Laomedon, ce dit li contes, avoit un fil qui  
 mout fu prous et sages, Prians avoit non. Si avoit de sa

feme uit enfans, et estoit hors du païs au siege d'un  
chastel ou son pere l'avoit envoié. Et quant il oï les  
nouvelles, quoment son pere et tout son lignage estoit ocis  
et toute la ville destruite, se il ot grant duel, ce ne  
fait pas a demander. Quar tout soit il chose que home de  
grant cuer ne se doit esmaier por perte de terrienes choses,  
la vue estoit si horrible et si honteuse que humaine nature  
ne la pot eslongier de soi. Et por ce se plaint et gamente  
et regrete son pere et sa prouesse et sa beauté et son pris,  
et ses ancestres, parens et amis, et la noble cité de Troie,  
et les nobles citains et les nobles dames, et l'onour et la  
beauté de la ville, coment il sont mort a honte et mené  
en servage. Mais sus toute chose li grieve de sa serour  
que li Grizois en ont menee : de ce ne se puet il en nule  
maniere consirrer. Et quant il ot son duel demené grant  
piece, si apela ses amis qui estoient entor lui et lor dit :  
« Beaus seignors, vos avés oï la grant dolour qui est ave-  
nue de nos amis qui sont ensi mort et nostre païs destruit.  
Or nos covient il penser d'aler en nostre païs et restorer  
ce que nos poons amender. » A ce s'acorderent tout li  
baron et s'en alerent en lor païs. Or est il voirs que Prians  
avoit Ecuba a feme, qui mout estoit sage et de grant  
lignee, qui fille estoit d'un rei de Perse ; et de lui avoit il,  
si comme je vos ai dit, uit enfans, les cinc vallés et les trois  
meschines. Des fis ot non le premier Hector, qui fu le  
nonper dou monde, si comme nos vous dirons avant en  
ses euvres. Li autres ot non Paris, Deïphebus, Ele-  
nus et Troiolus. Les filles furent nomees Eleta, Cassan-  
dra ; l'autre fu nommée Polixena, qui de beauté passa  
toutes mortés femes. Et encores dit l'Escrit tant que il ot  
autres fis qui trestous furent bons chevaliers, mès tres-  
tous estoient de bas, toutefois furent il engendré de nobles  
damoiselles.

## 38. SI COME IL RAPAREILLERENT LE PAÏS.

Quant il revindrent en leur païs a tant de gent comme il avoient, il virent la ville et le païs destruit. Adonc lor doubla le couros, si firent enterrer les mors que il troverent selonc lor droitures. Et après ne tarda gaires que li rois Prians prist conseil a ses gens de restorer la ville et dist que il le feroit plus fors et plus bele et plus defensible qu'ele n'avoit esté. Et maintenant fist querre par tout ouvriers, et comencierent a trover le marbre et a refaire la ville en tel maniere que avant ne après ne fu nule de celle beauté ne si grans ne si fors. Et tesmoignent encores cil qui ont esté en la place ou elle fu que li murs estoient haut tant comme arc pooit traire, tout fait de marbre de divers colours. Les tors estoient espesses et grant sozterrees. Levee estoit en plusors leus sus une motte et avironee de grans fossés, et vint liues duroit environ, si estoit faite a maniere d'un escu, les deus parties en mer et l'une devers terre, selonc ce qu'il apert encores. Les rues estoient toutes pavees de marbre ; puis et fontaines i avoit a grant planté, qui s'espandoient par les rues et par les places, dont la ville estoit a merveilles delitable et plaisante. Une petite riviere coroit par mi la ville, qui mout faisoit gens aaisés. Maisons i avoit si beles que en la plus povre maison pooit un rei demourer por sa beauté et por delit. De l'une partie de la ville fist le rei faire sa maistre forteresse, que il appella Ylion, sus une roche naïe que toute la ville surmontoit et veoit tout le païs environ, si que parroît chose par trop grant orguel assise. Après fist le rei faire une sale jointe a un sien manoir, que ce fu la plus bele et la plus riche chose dont nus hons mortex oïst onques parler. Car la moindre chose qui i fu estoit d'argent, et assés figures et autres choses i avoit toutes de fin or et de pierres pre-



ciouses. Et a l'un des chiés avoit un autier a l'onor de Jupiter ou il aoïroient. Et ce estoit bien la merveille dou monde, quar fontaines i avoit qui sordoient par tuias d'or que nus hons, tant fust soutil, ne pooit veoir par quoi ne par quel engin ce conduit avoit esté fait. Autres merveilles de chambres et de vergiers i avoit tregete par art de nigromance, que trop i auroit a conter. Après fu la ville puplee de la gent dou païs environ si richement que nule ville ne le resambla ne ne fu onques de son pooir. Et jeu de tables et de eschas i furent premierement trovés, et mains autres delis dont li Troïen de la ville se desduisoient.

### 39. COME LE ROI FU CONSEILLIÉ.

Après ce que le rei Priant vit sa ville de tel samblant et de tel noblesse et si fort, avis li fu que tens estoit de requerre ses ennemis et de vengier son damage. Et por ce manda querre tous ses princes et ses chevaliers et ses fis fors un seul : ce fu Hector, qui en Babiloine estoit alés a porchacier de grant besoignes. Quant il furent trestous assamblés, Priant parla et dist : « Beaux seignors, je croi que tuit m'amés leaument et devons estre toute une chose, por ce que tous somes estrait d'un sanc. Bien savés le grant et le leit damage que les Grizois nos ont fait de nostre gent ocirre et de nostre ville que il destruisrent et roberent. Meis de tout ce ne m'est tant que de ma serour que un d'eauz en mena et la tient en servage. Or est ensi que nos avons fait fort ville et bien garnie de gent et d'avoir, si seroit bien tens de nostre honte vengier. Et je feïsse maintenant mon pooir, se por ma serour ne fust que je lor veul demander et savoir se il le ma rendront. Lors prendrai je conseil a vos et a mes fis dou guerrier, ou de l'atendre, ou de laisser la chose en pais.

40. SI COMME LE ROI COMMANDA A ANTENOR [D'ALER EN GRECE].

Mout fu cest conseil tenu por bon, et por ce fist maintenant le rei venir par devant lui un sien baron qui mout estoit de grant savoir et bien parlant, Antenor avoit non, 5 et li dist que en Grece aler le covenoit sa seror querre, quar il ne conissoit plus soufisant de lui por ceste besoigne faire, et li chargea que il deüst dire a celui qui la tenoit et aus autres que se il li rendoient Exiona sa serour, que de tout l'autre damage que il avoient fait ne tendroient 10 il jamais parolle, quar tout seroit pardonné. Antenor li respondi que por message ne perdrait il noient : feïst la nef apareillier, quar de plus demourer n'avoit il cure. La nef fu apareillie et se mist dedens a mout honorable compaignie, et tant fist que il ariva a Manesse, ou Pelleüs 15 estoit. Et quant il fu devant le rei, si dist son message en tel maniere.

41. COME ANTENOR DIST A PELEÜS.

« Sire, fait il, le roi Priant de Troies nos a envoiez a vous et as autres princes de Grece, quar vous li feïstes grant damage de son pere et de ses autres amis que vos oceïstes et de sa terre que vous meïstes a destruction. Et 5 sur tout ce en menastes sa seur, et la tient celi qui l'en mena en servage. Donc il vos prie par moi que vos li rendés tant seulement sa serour, et tout l'autre mesfait vos soit pardonés et quite de par lui et de par ses amis, que ja des or meis en avant n'en sera parolle ne n'avra 10 talant que il plus en face. »

42. COM PELLEÜS LI RESPONDI.

Quant Pelleüs entendit ce, si fu mout dolent et iriez, et por ce que auques li toichoit la besoigne, si respondi

que de ce n'avoit il que faire, ne rien n'en feroit por son mandement, et qu'il avoit fait que fol quant il tel chose vint noncier. Et li commanda que il voidast sa terre maintenant, se il ne voloit que l'en le feïst maintenant destruire.

#### 43. COM IL ARIVA A SALEMINE.

Atant s'en parti Antenor et revint a la nef et ne se tient mie a seür jusques a tant que il ot esloingié le port. Et s'en vint droit a Salamine et la trova Thalamon. Et quant il fu devant lui venus, Antenor li dist : « Sire, je sui chevaliers, par qui le roi Priant de Troie vos mande et prie que vos li rendés sa seror, que maint jour avés tenue, quar elle est si gentil feme comme fille de rei et de reïne, si n'est pas avenant que elle soit en tel maniere. Rendez la, si ferés grant cortoisie, quar encores sera elle henouurement mariee et a grant henour. »

#### 44. COMENT THALAMON LI RESPONDI.

Quant Thalamon oï ce, si fu alumés de mautalent, quar il comença a sospirer de fin courous et dist : « Vasal, a vostre rei n'oi je onques a faire rien de quan que il demande. Voirs est que nos fumes a Troie por vengier un mesfait, et por ce que je entrai en la ville premier, en oi je la pucele en gueredon, la quele j'ai tenue et tendrai tous les jors de ma vie, quar mout me pleist son sens et la maniere de lui. Et por ce se gart il mout bien que il jamais m'envoie par tel folie. Et a vos meïsme di je bien que mout ferés que foux se de hui en avant vos vos laissiés trover en cest país. »

#### 45. COME CASTOR LI RESPONDI.

Antenor ne fist plus longue demouree, mais maintenant

s'en vint en la nef et tant esplota que il ariva a Isse, ou il trova Castor et Polus et leur dist son message sanz rienz céler. Cil respondirent qu'il n'avoient onques forfait a Priant, « mes voirs est que son pere nos fist jadis un outrage dont nos preïmes la vengeance, por quoi vos parolles ne vostre rei ne prisons nos rien, et mieux amons guerre de li que pais, quar jamais bons amis ne poons estre : donc tieigne chascun ce que il a gaignié. Et a vos meïsme disons nous que celui ne vos ama gueire qui ça vos envoia. Alés vos ent avant que pis ne vos aveigne, quar poi amés vostre vie, quant vos ci arivastes. » 10

#### 46. COMENT NESTOR LI RESPONDI.

Quant Antenor et ses compaignons oïrent la response, sachiez bien que ne se tindrent mie a seür, si s'en retornerent sans congié penre droit a lor nef, et tant firent que il ariverent a Pire, dont Nestor estoit rei et sires, qui mout estoit crüel et fellon et as armes merveillous chevalier. Antenor ne laissa pas por paour que il son message ne li deïst, ensi comme il avoit dit as autres. Maintenant quant Nestor l'entendi, si le reguarde de travers, soupris d'ire et de maltalent : « Fis a putain, fait il, por poi que je ne vos faiz tous destruire. Par quel congié entrastes vous en ma terre ? Cuide nos vostre sire faire a croire que jamais puisse avoir pais entre nos et les vostres, que ja nos firent tant d'outrage que a la fin en furent mort et destruit ? Deheit ait que en s'amour se fierä. Face envers nos dou pis que il pourra. Et a vos di qui ci estes que vos ne vos laissiés jamès trover en cest pais, se vos amés vostre vie. » Quant Antenor et ses compaignons virent ce, ne demandés pas se il furent espoëntez, quar bien s'aparchoivent qu'il vont querant folie, et par poi qu'il ne l'ont trovee ; si se mistrent en lor nef et retornerent en lor pais. 20



47. COMENT IL TORNERENT A TROIE ET NONCIERENT  
LE RESPONS.

Et quant il furent par devant le rei venus, Antenor retraist son message en la presence de tous les haus homes dou païs, si comme il fu premierement au rei 5 Pelleüs et après a tous les autres, et les orguillous respous et menaces que il avoient faites au rei et a lui meïsme, dont le rei ot mout grant raison d'estre coureuciés, et si fu il mout. Et por ce le prist a retraire a ses fis et a ses amis et dist : « Beuz seignors, veoir poés 10 quoment les Grizois se maintiennent enver nous ; quar après le grant damage que il nos ont fait, veés coment il nos prisent poi. Or ne sai que vos die fors tant que miaux ain morir que souffrir tel honte. Et ne soions de rien esmaiés de ce que il orent contre nos victoire, quar 15 mainte fois avient que celui qui est vencus gaaigne sus son henemi. Et nos avons fort ville et grant chevalerie, si devons estre desirant de nostre honte vengier. Toute fois met je l'afaire sus vos, que vos en faciez vostre volenté, non por tant quar la moie seroit, coment il 20 en deüst avenir, que nos esleüssons de nostre gent des plus hardis chevaliers et que nos allessions celeement en lor païs, que, ançois que il s'aperceüssent, fust lor terre toute confondue et les homes mors et prises les proies. Et qui par tel guise lor orgueil peüst abatre, a 25 grant los et honour nos torneroit. Et ce me samble legiere chose, qui bien s'en voudroit pener. » A cœ respondirent tout qu'il lor sambloit buen et pleisoit. Et de nul fu contredit.

## 48. COME LE REI PARLA A HECTOR.

Adonc parla le rei a Hector son ainé fil et li dist :  
« Beuz fis, tu es li chiés de mes heirs, si seras princes et

sires de ceste euvre, quar tu es bien dignes. » Après apela tous ses fis et lor fist mout beau semblant, quar biaux et prouz et hardis les veoit, et lor dist : « Vous serés de trestous sires et meistres après vostre frere Hector. Mais gardés que vos soiés tes comme il afiert, quar celui que je troverai preuz et hardi, celi sera mes amis et mes fis, et paristra l'atendance que je ai faite et quele esperance je puis avoir en ma noretur. Je vos poroie assés dire et sermoner, mais se il alast a ma volenté, chascun de vos seroit tel que par li tout souldacheveroit la besoigne. Mes tant en vous ne demoure de bien faire quar bien conoissés que il vos covient estre prous, quant vos estes tous princes et meistres de si grant et de si noble gent et de si grant euvre. Or en facent les dieus mon plaisir ! »

49. COME HECTOR RESPONDI A SON PERE LE ROI.

Hector, qui mout fu sages, respondi et dist : « Sire, vos volentés acomplirai je tous jors volentiers a mon pooir, et de ce me troverés prest, que droit et raison me samble. Et sachiez que je ne desir rienz tant come de vengier nos de celle gent que si poi nos prisent. Car trop seroit laide chose se de si grant [tort] ne fust vengeance prise. Et je endroit de moi ne desirre tant nule rien comme d'estre a celle espreuve ; mes mout nos covient contregarder la chose en tel sens que elle puisse penre bone fin. Car ja soit le commencement la plus grant partie de la chose, a la fin apent quant que l'en fait. Et celi commencement doit estre mout leit, dont la fin est mavaise. Et por ce mieaux vaut aleissier que enprendre chose qui a mal peüst venir. Nos avons afaire, ce m'est avis, a mout fort gent et de grant seignourie, et bien savons qu'en tout le mont n'a gent miaux aprise de

guerre. Car de toute Eūrope, qui est la tierce partie de la terre, ou sont les plus vaillans as armes, ne perdront il home, quar il sont dur de guerre sus tous les autres. Et de ciaux d'Aise, ou il a tant de vaillans chevaliers qui ne servent d'autre labor que des armes, avront il la plus grant partie. Mais ne gardés pas a chose que je aie dite, ne ne quidiés que je le die par coardie ne por paour ; meis je ne voï mie coment nos soions bien apareillié d'une tel besoigne envair. Tous soi je desirrant de nos honors acroistre. » Sur ce fu respondu en plesours sens, mais ne fait tout a retraire, car ennui seroit de l'escouter. Mais oiez ce que Paris respondi.

50. SI COM PARIS PARLA DE SON SONGE.

« Seignours, dist Paris, tout ce que l'en dist entor ceste chose n'est rien, quar nos somes si riche gent et si garnis de chevaliers et de richeces que por noient douteroit l'en rien. Mes de tout le conseil ce soit la some que nos porchaçons de requerre nostre vengeance sus les Grisois, quar il ne nous en peut maux avenir. Et je croi bien que les dieus veulent nostre honour, et dirai vos coment. Il avint chose que je chaçoie l'autre jour un cerf, si avoie perdu tous mes compaignons et mes chiens, et m'en vins sur une fontaine, si m'endormis ilecques. Adonc me fu avis que je vi Mercurion, et ill amena pardevant moi trois deesses, Jovis, Venus, Minerve, et me dist : « Paris, je t'amaine ces trois deesses por un jugement ; quar une pome d'or leur fu donee escrite en grizois toute entor, qui disoit que la pome seroit a la plus belle : dont il a entre elles grant discort, que chascune dit que por beauté l'a gaaignie. Dont je lor ai loé, et elles s'i acordent, que elles s'en tendront a ce que tu en diras. » Maintenant vint chascune devant moi pri-

veement et maintenant m'offrirent a faire quant que seüsse demander. Venus me prist et promist que se je li donoie la pome por la plus bele, qu'ele me donroit la plus bele et la plus noble feme de Grece. Et je fis son plaisir : por quoi je croi bien que se je i vois en Grece, 25 que je leur forferai bien et vengerai nostre honte. »

**51. COME IL S'ACORDERENT AU DIT PARIS.**

Sus ces parolles respondi Deïphebus et dit que bon li sambloit a faire et que ce estoit bon conseil ce que Paris disoit, et que les nes fussent apareillies, quar ce estoit chose qui ne se voloit de rien delaier, et que se tous les 5 autres s'en soufrissent, que il tout seul estoit celui que la chose ne laisseroit mie atant, se il fust tout certain que il deüst hontousement morir, et que trop li sembloit grant merveille quant en si fait tort vengier il en venoit discordement, et que li sambloit que il amast poi la corone de Troies et la soue, qui de si faite euvre se retraist arrieres.

**52. SI COM HELENUS PARLA.**

Après parla Helenus, uns des fis dou rei Priant, qui grans chevaliers estoit : « Seignors, fait il, je sai bien que onques n'oïstes chose de moi que vous ne trovessiés a voire. Et je vos di certainement que se Paris amoine 5 feme de Grece, que Troie en sera destruite, et vos et vostre lignage mort a grant dolour. Et de ce me fai je mout bon maistre, quar j'en sui certain par vrai esperiment, et que en autre guise ne peut estre ne demorer la fin de la chose. » 10

**53. COME IL FURENT TOUT MU.**

Quant Helenus ot ensi parlé, trestuit furent mu et tai-



sant, ne n'i ot si hardi qui osast mot soner, quar chascuns estoit mout pensis. Adonc sailli en piés Troÿlus, uns des fis le rei Priant, et dit : « Avoi, franc chevaliers, dont vint ce que je vos voi si pensis ? Estes vos esmaiez por la parolle d'un prevoire qui dist ses mençoignes ? Ou est cil qui sache qu'est a avenir ? Nous veons que il tremble ja de paour : ce li fait dire coardie. Et nos ne nous devons pas merveillier, quar ce est maniere de prevoire d'estre tous jors en doutes des choses qui aportent peril et honor. Voi s'ent donc orer en son mostier et faire sacrefice, quar a lui appartient, et pense d'aisier son cors ; quar nos vies ne s'appartiennent pas a la lor, car nos devons tous jors aquerre travail por nostre henour acroistre. Et qui laira por ses parolles a vengier si grant honte, si doit estre departis de toutes honors que a chevalerie appartient. »

#### 54. COMME IL S'ACORDERENT A TROÏLUS.

A ceste parolle commença mout grant noise en la cort, quar trestuit s'acorderent a la parole Troiolus, dont le rei Priant ot mout grant joie. Mais a tout ce ne se tient il mie, ançois envia par tous les païs querre les grans barons, quoment il fussent loing, et lor mostra de recief la chose, si come li Grizois avoient fait et por noient son païs destruit et son lignage mort, et l'orgueilleuse response qu'il firent quant il envia querre sa serour, et que ses fis et ses amis li loënt la vengeance penre. Et il s'acorderent bien ; mais sans leur conseil ne voloit riens commencer, por quoi il prioit chascun que son plaisir en deïst.

#### 55. SI COM PANTUS PARLA.

Adonc se leva en piés un vassal mout sage qui Pantus estoit només, et commença sa raison en tel maniere : « Il

m'est avis que celi trespasse sa foi et n'aint mie loiaument son seignor qui mavaï conseil li done et qui ne s'esforce de lui defendre d'encombrier a son pooir, quant il en vient en leu et en tens. Mon pere vesqui cent et quarante ans et onques ne dist chose qui n'avenist. Et je li ai oï dire que por une feme que un des fis le roi de Troie devoit amener de Grece, que Troie en seroit destruite : por coi je vos di que mieus nos en vient ores a souffrir que commencer chose dont la fin poroit estre perillouse. Car li damages que l'en soufre par sa coupe est plus perillous et de plus grant honte que celui qui vient par l'outrage et par la coulpe d'autrui. »

**56. SI COME TOUT LE PEUPLE CONTREDIT LA PAROLLE PANTUS.**

Tout le peuple contredist l'autorité Pantus, et n'orent cure de ces argumens : de quoi le rei fu mout liez et les en mercia trestous. Puis pensa de sa besoigne haster d'apareillier les nes. Hector meïsme tramist il en maint païs por chevaliers et gens amasser, dont il amena assés de ceauz qui jamais ne tornerent en lor païs.

**57. COM CASSANDRA LA FILLE DOU ROI PARLA.**

Or est il voirs que le rei Priant, si comme dit avons, avoit une seue fille, Cassandra avoit non, qui mout estoit sage en deviner les choses qui avenir devoient. Quant elle entendit que Paris son frere devoit aler en Grece, lors mostra et dist tout en plorant que Troie et tout le païs en seroit destruit et la gent toute morte et detrencie, et encontre ce ne pooit aler nus hons vivans.

**58. DE CE MEÏSME.**

Seignors, come fiere destinee il orent et coment Fortune lor fu contraire de tout son pooir, que de tant comme

il furent garniz devant lor mescheance ne valut riens !  
 Que se Helenus ou Pantus ou Cassandra en fussent esté 5  
 creüz, par aventure encores n'eüst Troies nul mal, meis  
 encores avient il ensi por le pechié qui engigne et en-  
 combre humaine lignie ; quar plesours fois ne croit  
 l'en a bon conseil, ains ensuit l'en avant son corage en-  
 contre vraie conscience : dont li pleseurs se trovent a 10  
 la fin conchié et engignié a peril d'ame et de cors.

**59. COMENT LI ROI SEMONT PARIS ET LES AUTRES QUI VONT EN GRECE.**

Quant il vint au novel tens, Paris, Deïphebus, Eneas  
 et Polidamas et les autres barons et chevaliers qui devoient  
 aler en Grece furent apareillié. Le roi Priant lor pria et 5  
 parla et dist : « Beauz seignors, mout me fie en vostre  
 grant sens et en vostre prouesse, et bien savés le grant  
 droit que nous avons et le grant tort de nos henemis ; et  
 croi que chascuns ait bone volenté de l'amender et de la  
 venjance prendre. Non mie por tant sus toutes choses 10  
 vos pri que vous porchaçois dou tout coment je puisse  
 avoir ma suer Exiona. Et se cen ne puet estre, faites  
 lor damage en ce que vos porés. Et je me fi tant en la  
 valor et au sens et en la grant prouesse de vos, Eneas,  
 Polidamas, que je ne vos ferai mie lonc sermon, meis 15  
 metés vos en la voie : que les dieus vos en donent le  
 henour ! »

**60. SI COME IL SE MISTRENT EN MER.**

En mer se mistrent li Troïen et s'en alerent en Grece.  
 Et endemantiers que il aloient, Menelaus se departi de  
 son païs et aloit a Nestor, qui mandé l'avoit. Cist Mene-  
 laus estoit un roi dou païs mout amés, et avoit a feme 5  
 une dame de mout grand lignage, Eleine estoit apellee.

Ce nos raconte li Auctors que ce estoit la nonpere  
feme de beauté qui fust en Grece. Et li Troïen alerent  
tant que il ariverent a une isle que l'on apeloit Cithera :  
c'est l'ille qui est apelee Cetri. Illeuques avoit une 10  
grant feste, si que tous ciaux dou païs i estoient venus,  
au temple que il avoient fait en l'onor de Venus. Meis-  
ment dame Elaine ou grant compaignie de chevaliers et  
de dames et de damoiselles i estoient venues. Paris et sa  
compaignie alerent offrir a sacrefice a la maniere de 15  
Troie mout acceptablement, si que mout plost as  
Griex. Dame Elaine reguarda Paris et mout le pris a et  
sa beauté et sa contenance, et Paris d'autre part, si que  
tant fist que ensemble parlerent, et bien sambla a Paris  
qu'elle consentiroit auques sa volenté. Quant vint le soir, 20  
Paris et ses compaignons se traistrent vers lor nes, et quant  
il furent tout ensemble, Paris parla et dist : « Beuz sei-  
gnors, vos savés bien tuit por quoi nos somes en cest  
païs venus, et je endroit de moi vodroie que nos eüssons  
tant de force que nos poïssons une cité envair et prendre ; 25  
mais de ce n'avons nos le pooir, se n'est par enging ou par  
larrecin. Et il est voirz que en ceste ille avons trové belle  
troeve, se prendre le volons ; car grant partie de lor bone  
gent de cest païs sont venus, homes et femes et enfans,  
por sacrifier. Meïsmement la reïne de cest païs i est venue, 30  
por quoi nos poons nostre honte vengier mout legiere-  
ment. » A ce s'acordent tous ceaus qui l'oïrent, et main-  
tenant ordenerent lor affaires. Et quant vint entor la mie  
nuit, si se mistrent a la voie vers le temple et troverent les  
gens que li uns se dormoient et les autres faisoient feste, si 35  
comme gens qui estoient sans nul regart.



**61.** [COMENT TROÏENS ENVAHISSENT LI (*lis.* LE) TEMPLE ET PRISTRENT DAME ELENE].

Quant il furent au temple venus, maintenant firent bou-  
sine soner et commencierent a ocirre et detrenchier  
quant qu'il ateignoient. Paris s'en vint maintenant la ou 5  
il quida trover Elaine et la prist, et elle ne fist mie grant  
samblant de contredire. Li autre alerent par tout, ociant  
et prenant et robant quant qu'il ateignoient; si ne vos  
poroit nus dire la grant occision qui i fu faite ne le grant  
gaaing des prisons et d'or et d'argent et de robes. Meis 10  
ensi que il en aloient, les gens dou chastel qui estoit  
sus le port, Ysee estoit apellés, oïrent le bruit et la  
criée. Bien s'aparçurent que ce pooit estre, si saillirent  
sus as armes et firent lor pooir des prisons rescourre;  
mes en la fin furent desconfit par les Troïens, et ensi 15  
doubra lor damages. Et quant il orent ce fait, si se  
retornerent a lor nes. L'endemain se partirent dou port et  
tant firent que il ariverent a Thenedon qui est quinze  
liues de Troies, si envoierent un message au roi, dont 20  
mout grant joie fu faite.

**62.** SI COME LES DAMES EN PRISON DEMENOIENT GRANT  
DEUL A THENEDON.

Entandis comme il sejournerent a Thenedon, dame  
Elaine et les autres dames qui estoient prises avec lui  
faisoient merveillous duel de ce que leur seignor ne 5  
veoient et de leur terres qu'eles laissoient. Paris, a qui il  
en pesoit sour tous les autres, si commença a reconforter  
dame Elaine et dist: « Dame, trop me grieve la vie que  
vos menés, quar se tous le siecle fust miens, ne poroie je  
avoir joie tant comme vous fussiés en tel point. » Et ce 10  
meïsmes dist as autres dames, que por Deu ne se des-  
confortassent mie, « meis soiés asseüres quar vos ne

vo barons n'avrés nul mal, mes lor serés rendues et a plus grant joie serés en cest païs que la ou vos fustes nees; quar por amor dame Elaine vos fera l'en toutes honors, 15  
 quar elle sera dame de tout le païs. »

**63. SI COME DAME [ELAINE] RESPONT A PARIS.**

« Sire, ce respont dame Elaine, mout me poise de ce qu'avenu nos est ; mais puis qu'il est ensi, je voi bien que souffrir le nos covient, quel gré que je en aie. Meis por Deu vos pri que vos nos gardés de honte et de contraire. » 5  
 — « Dame, vostre vouloir sera acompli, dist Paris, si come vos le saverés deviser. » Adonc la prist par la destre main et la fist seoir sus un faudestuel, et fu encoste d'ellé come por conseillier et li dist : « Dame, sachiés que quant je vos vi premierement, je fus de vos sou- 10  
 pris, ne ne poi torner aillors por chose qui avenist, et or voi que vostre amor m'a si lacié et soupris quar je ai mis en vos m'entente et tout mon cuer, si vos espou- serai et vos serai loiaus amis des ores en avant. Et se je vos ai amené de Grece, vos avrés assés plus biau païs et 15  
 tant riche que vos diriés que le vostre est povres. Après serés de toutes gens si honoree come celle qui de tout sera dame ; quar ja chose ne voudrés que je desveulle. »  
 — « Sire, fait elle, je ne sai que je die fors que assés ai ire a mon cuer tant que onques feme n'en ot plus ; et se 20  
 je desdisoie vostre plaisir, poi me vaudroit. Ensi voi je bien que consentir me covient a vostre volenté, quar defendre ne m'en puis. Ce poise moi, meis se vos me portés amor et foi, vos l'avrés salve a mon pooir. » Adonc commença si fort a plorer que Paris en ot pitié mout 25  
 grant, si la comença a reconforter, et celui soir la fist servir et honorer de tout son pooir. Mais ci vos lairons un poi de Paris et de Elaine et de lor compaignie et

retournerons au roi Menelaus, qui ot sa feme perdue, et as ceaus de Citri, qui si malement furent domagié. 30

64. SI COME IL SORENT EN GRECE QUE TROÏENS AVOIENT PRISE ELEINE.

Or dist li Contes que Renomee, qui tost cort, ala maintenant par Grece du grant damage que li Troïens avoient fait par le païs et coment il avoient Elaine prise, et ce fu 5  
mout tost conté a Menelaux, dont il fu a merveilles dolent et angoissous; si se revient maintenant en sa terre et amena avec lui le rei Nestor, qui mout estoit ses amis et que mout li pesoit de son damage. Maintenant prist Menelaux un sien message, si l'envoia a un sien 10  
frere, Agamenon avoit a non, mout bon chevalier et sage et a merveilles bien parlant, si que de ce n'avoit il son per en toute Grece; et li fist assavoir le damage que il avoit receü par les Troïens et coment il avoit sa feme perdue. Mais atant laisse ore le Conte a parler de ce et 15  
retorne a Paris et a ceaus de Troie.

65. SI COME LE ROI PRIANT ET TOUS LES TROÏENS VINDRENT A L'ENCONTRE DE PARIS ET LE REÇUIRENT A MOUT GRANT JOIE.

Paris, qui a Thenedon, lui et sa compaignie, estoit, quant il virent le jour venir, si se leverent et chargierent 5  
tout lor avoir et tous les prisons que il avoient amené de Grece, et puis monterent et s'en alerent mout liés et joiant envers Troie. Paris chevauche tous jours decoste dame Elaine por lui reconforter. Le rei Priant et tous ceaus de la ville qui la nouvelle savoient issirent hors a 10  
l'encontre et mout lor firent grant joie, quant il s'entre-virent de près, et ceaus que il menoient, les prisons et l'avoir offrirent au rei, dont il fu mout liés. Mais sur

tous les autres fist grant joie a Paris. Et cil li a toutes  
des evres contees par ordre et coment il alerent et vin- 15  
drent, et quoment il avoient desconfis les Grizois et  
confondu tout le païs. Après lor mostre dame Elaine,  
dont le rei fu mout joiant sur toutes choses, quar il quide  
estre certain que por ceste ravera il sa suer et li feront li  
Grizois droit a sa volenté. Et maintenant se traist vers 20  
lui et la prent par la resne de son pallefreïn mout cor-  
toisement et la comença a conforter et a dire et a pro-  
mettre quant que il peut, et qu'elle iert si bien venue come  
celle qui iert dame dou païs. Et tant chevauchent que il  
vindrent a Troies, ou la feste estoit merveillouse. Et 25  
l'endemain espousa Paris dame Elaine, si ne vos poroit l'en-  
dire la grant joie que ceauz de Troie en firent. Li roiz  
Priant et la reïne, qui mout estoit sage dame, et tous  
des fis au rei Priant firent dame Elaine mout grant  
honor. Mais Cassandra, la fille du rei, de la quelle nos 30  
avons parlé devant, qui tant savoit des choses qui estoient  
a avenir, en fist duel merveillous et commença a crier et  
a braire comme feme forsenee, et disoit : « Haï ! lasse  
gent chaitive, que menés joie de ce dont vos deüssiés plo-  
rer ! Haï ! rei Priant, qui de ceste euvre as esté conseil- 35  
lieres, coment sera ton cors muëz, quant tu verras tes  
enfantocirre et ta ville destruire ! Et tu meïsmes en mor-  
ras a grant dolour honteusement. Haï ! mere Ecuba reïne,  
quel dolerous damage verras encores de ta bele porteüre !  
Haï ! belle gent de Troie, ou prendreis vos tantes larmes, 40  
quant il vos convendra plorer ? Haïlas ! quel dolor de  
toutes dames et pucelles qui desiritees seront, et lor peres  
et lor barons et lor lignage livrer a mort hontouse et  
vilaine verront ! Haï ! noble cités de Troie, qui porra  
souffrir de veoir verser ces tors et ces sales et tout metre 45  
en feu et en flambe quant qu'il verra et quant que il i



avera? » Ensi plorant et dolosant se demenoit, et ne le voloit laisser par nul chastement. Si la fist le rei enfermer en une chambre où elle fu puis longuement. Mais de tant laisse le Conte a parler de ceaus de Troie et retourne a conter de Menelaux et de Agamenon et des autres princes, si comme chascun prist la chose sur soi. 50

**66. SI COME MENELAUS SE PLEINT A SON FRERE AGAMENON DE SON DOMAGE.**

Or dit li Contes que tant atendi Menelaus que le rei Agamenon son frere fu venus. Quant il le vit, si se plainst a lui de son damage et sus toutes choses de la perte de sa feme. Agamenon, qui mout fu sages, li dist : « Biau frere, gardés que por nule rien ne faites nule dolour ne ne moustrés mauvais semblant de chose qui avenue soit. Et membre vos que li sages homes des anciens tens ne conquistrent pas l'onor que il orent por plorer de leur pertes ; quar, se il alast ensi, cil qui sont de vil et de povre corage eüssent tout le mont en lor subjection. Mais ils tenoient autre chemin, quar, quant il recivoient outrage, si prenoient enging et cure coment il le peüssent amender. Et ensi doivent faire tous gentis cuers quant il ont aversité. Car coment acroistra sa vertu et son honour celui qui se tendra ocïeus sans desir de vengier son damage ? Romenbrez vos ancessours qui l'onor que il orent et qu'il nos laisserent conquistrent par enging de cuer et par fine force de cors. Or n'i a rien de plus souffrir, ne longues parolles n'ont ici point de leu ; meis pensés de prendre la vengeance en maniere que vostre honor i soit acreüe, et envoions maintenant letres par toute Grece as reis et as dus et as princes et lor faisons a savoir l'outrage de ceaus de Troie. Et il n'i avra ja nul que volentiers n'i viegne a Troie por la vengeance prendre. Et 25

puis que nos avrons aculli nos gens ensemble, je sui certain que nos ferons tous nos voloirs de nos anemis. »

**67. SI COME IL MANDERENT LOR LETRES PAR TOUTES LES TERRES DE GRECE.**

Sans prendre plus de respit envoïrent par message et par lettres a tous lor amis la chose devisee com dit avons. Et maintenant s'apareillirent tous de venir a Parthe, ou li doi frere estoient. Si poés oïr les nons d'auques de ceaus qui plus estoient : Achilles, Patroclus, Diomedès, Eteolus, Neptolonus, li duz d'Athenes et autres assés de grant pooir, qui promistrent par lor messages, que trop lointain estoient. Cil establirent lor afaire, et jasoit ce que il i eüst de plus riches, si firent il de Agamenon chevetain et souverain prince de tous por le sens et por la valor qui en lui estoit. 10

**68. COMENT CASTOR ET POLUS SE MISTRENT EN MER POR ALER A TROIE.**

D'autre part, Castor et Polus, qui estoient freres d'Elaine, quant il sorent la nouvelle, si manderent par toute Grece a leurs amis et s'assemblerent et firent appareillier lor nefz ; et, anchois que la quinzaine fust passee que Paris avoit Elaine prise, se mistrent ces dous en mer por aler vers Troie. Et maintenant qu'il furent dou port partis, une tormente lor prist en mer si grant que l'enquide que eaulz et toute lor compaignie noiassent en la mer, quar onques puis ne furent veüs. Veez ci beau commencement que cil orent por dame Elaine, qui leur serour estoit. 10

69. [QUE TOZ LI TERRIENS PRINCES ASEMBLERENT A TROIE].

Oïr poés coment la besoigne est comenciee et enprise, et sachiez vraiment c'onques au siecle ne demoura un terrien prince qui n'i fust, qui dehors por envair 5 ceaus de Troies, qui dedens por defendre la ville. Ensi comme vos porés oïr, la plus grant partie d'eauz i definirent lor vie douleusement, et cil qui eschaperent furent puis destruit avant que il se peüssent largement reposer en lor país, si comme le vos deviserai, 10 quant tens en sera. Et por ce que vos l'entendés mieux quant l'en en pallera, si vos en deviserai les nons et l'estre des princés de dehors et dedens. Et laissons ester de Castor et de Polus, qui en la mer sont péri.

70. ICI DEVISE LES FAÇONS DES PRINCES.

Dame Elaine [estoit] leur suer, et por ce qu'ele fu achoisor de ceste douleoureuse euvre, la metons nos premierement. Si vos di que ce fu [la plus bele feme] que l'on trovast en Grece. Agamenon, que lor princes 5 estoit, fugrant de cors et brun, mais engignous et biaux parlieres fu sus tous les Grizois, et a merveilles sambloit bien dignes d'estre sires. Menelaus, qui estoit ses freres, ne fu pas trop grant ne trop petit, mais a merveille estoit agreable a tos ceaus qui le regardoient. Achilès fu home 10 de grant biauté, grant et membrus et fiers et hardis en mi la chiere et mout amiables vers ses amis. Large fu mout en despendre et mout sages et bien parlant. Chevalerie ama sur tous homes et pris d'armes ot il sur tous les Grizois. Si fu [filz] Peleüs le roi, dont nos avons 15 parlé. Patroclus fu jeunes hons et de merveillouse biauté. Les iauz ot vairz et rianz et tous jors sambloit honteus come une pucele. Larges estoit en doner et miaux estoit tailliés a sejourner delicieusement que a travail d'armes.

## 71. DE CE MEÏSME.

Un autre Aÿas i avoit qu'en surnon fu Thalamons apellés ; si fu mout chevalerous et, selonc la grant valour qu'il avoit, mout se prisoit petit, dont son pris li dobroit entre les autres. Ulixès les sormontoit trestous de grant 5 savoir et de soutil enging et de souverainement parler. Jeus et gabois disoit trop volentiers, meis foi ne loiauté n'avoit nule envers ses amis. Dÿomedès fu de toute bone taille por estre fors et hardis, et si fu il sanz faille un de[s] souverains qui fust en l'ost de Grece, mais mout 10 estoit felons et estoux en ses parolles, et mout ama par amors ; et en la fin endura il grant poine. Nestor fu mout grant et biaux de cors et riches hons de grant maniere, et si estoit mout sages parliers et de bon conseil envers ses amis ; mais quant il estoit soupris d'ire, il per- 15 doit toute mesure, mais pou demouroit en corous. Prothiselaus estoit biaux hons et de graut enprise, et estoit si hastief qu'a poine tant pooit souffrir avoir faite la chose que l'en l'eüst compliement dite. Thoas le roi, qui cou- siens Achillès estoit, iert de meindre estature, si fu mout 20 sage et amesurés en parler et as armes fu de merveillouse espreuve. Neptolonus, li dus d'Athenes, fu grant et gros de cors. Mout fu covoitous, mais de plais [et de lois] savoit assés ; et des armes fu de merveillous pooir, si come vos orrés. Palamedès fu grailles et bien tailliés 25 et de belle forme, et sur tout desiroit seignorie et honor. Philiptoas estoit de bele façon, mais il estoit si orguil- lous que nus ne pooit a lui durer. Machaon iert un merveillous roi et de grant travail en penser [et] en veillier au damage de ses henemis. Le roi Cercès estoit 30 uns hons de grant porpens et mout amoit bons chevaliers, et por cen en ot il assés au besoing en son servise. Briseda fu fille Calcas de Troie, dou quel vos



orrez avant coment il se contint; meis de [sa] fille  
dirons quar elle fu de mout grant biauté et de belle 35  
fachon et de grant maniere sage et bien parlans, etmout  
mist son cuer en amor, ensi come vos orrés.

**72. COME IL DEVISE LA FAÇON DES PRINCES DE TROIE.**

Or vos ai dit l'estre et la maniere des princes de Grece,  
si porés oïr après de ceaus de Troie. Le roi Priant  
fu de mout bele façon et de mout bele taille, mais un  
poi avoit la vois cassé et douce; et loial fu sur toute 5  
rien, et larges fu en doner, et mout se delitoit en choses  
de solas. Bons chevaliers ama sus toutes riens, et il  
meïsme fu au besoing merveillous as armes de sa main.

**73. CI ENDROIT CONTE L'ESTRE HECTOR.**

De ceaus de Troie et de tous ceaus qui furent devant  
son tens fu son aîné fis Hector li souverains, et croi que  
de tous ceaus qui i estoient ne qui estre devoient le  
fist Nature por le plus souverain, car en toutes bontés que 5  
puisse mortex home avoir moustra elle tout son pooir  
en lui, tout soit il chose que le poïst avoir fait plus bel;  
meis de meïllor croi je que Nostre Sire li commanda que  
elle i meïst sa force, si qu'ele restorast en lui toutes ses  
defautes; et se rienz mesavenoit en lui, trestout estoit 10  
covert par son bien faire; quar vos savés que par bone  
euvre sont maintes laides fachons couvertes, meïsmement en  
homes plus que en femes. Si vos dirai la some de lui  
qui de vaillant pris sormontoit tous homes, mais un poi  
estoit baubes et borgnes d'ambedous les iaus. Onques 15  
d'escharnissour n'avoit cure et, quant au besoing venoit,  
ne fu onques nus hons trové de sa force ne si asseür as  
armes. De sa largesse ne fu nus, quar se tout le siecle  
fust a son commandement, si l'eüst il doné as gens d'a-

vantaige et de vallour. A lui ne duroit ne or ne argent 20  
ne drap de soie ne bon cheval, quar sa proësse le semo-  
noit tous jours de bien faire. De cortoisie fu il tels que  
tous ceaus de Troie et de Grece furent villein envers lui.  
D'estre regnables et amessurés surmonta il toutes crea-  
tures, quar onques por ire que il eüst ne por joie ne dist 25  
chose que l'en le peüst a droit reprendre. Por quoi je ne  
croi que jamais soit homs de sa valour ne qui des armes  
peüst ensi faire son plaisir, si com il en faisoit. Onques  
ne fu homme tant amé en ville come ceaus de Troie  
l'amoient, et ce estoit bien droit, quar il sembloit que il 30  
fust freres a trestous. Tout autel estoit Helenus come son  
pere, et Deïphebus ses freres, et mout estoient et biaux  
et gens de cors et mout semblables, mais de corages  
estoient divers. Quar Deïphebus estoit mout fort et  
penable as armes, Helenus estoit bons clers et bons 35  
devins a merveilles. Troiolus fu merveillous chevaliers  
et grant et bien tailliés de membres, le visage cler et  
amiable, les iauz pleins de joie, et as armes fu tels que  
nus ne se peüst apareillier a lui fors seulement Hector  
son frere, qui fu sires et roi des autres et d'armes por- 40  
tanz, meis cestui li en tient bien fraternité et compaignie.  
Larges et cortois fu et mout mist son cuer en amor.  
Paris fu mout fort de cors et bien fait, mais sus toute  
chose desiroit seignorie, si fu archiers merveillous.  
Chiens et oiseauz amoit; de son cors fu merveillous 45  
chevaliers au besoing. Eneas fu gros et petis de cors et  
sages en parler et en euvre, et mout soit bien sa raison  
moustrer par parolles, et fort et vertuouz fu a desmesure,  
et de chevalerie ot grant pris. Antenor fu de bele  
forme, et mout fu tres sages et de bon conseil. Un 50  
sien fil ot qui ot non Polidamas, dont l'Escrit ne se  
doit pas taire, quar il fu mout sages et cortois sor

toutes creatures et passible comme une damoiselle; mais en fais d'armes fu il mout merveillous, si comme vos orés avant. Le roi Menon fu mout grant et gros, 55 et bien sambla [sages] comme il estoit. Par lui ne pooit l'en granment traire de lui parolle, quar tous jors sembloit il pensis. As armes fu il de merveillouse proesse et maintes choses fist il dont l'en parlera as tous jors mais. Et Ecuba la roïne, la feme dou roi Priant, fu 60 mout tres sage feme et bone vers Dieu et grant almosniere, et si n'avoit en mont de choses feminin tallent. Andromata ot non la feme Hector, qui mout fu bele et sage et de noble maniere. Grans almoniere<sup>e</sup> fu sus toutes dame[s] et grant amor et grant foi ot vers son seignour. Cassan- 65 dra fu bele de façon, mais de clergie fu sage a merveilles, quar ele sot d'art tant que nus humains cuers en poroit plus savoir. De la biauté de Polixena ne vos poroit l'en escrire la menor partie, quar elle fu longue et graille, estroite en mi les flans. Le chief ot blond come fin or, 70 les sorciz deliez et votis, le vis blanc et colouré par mesure, si que miauz sembloit espirituel chose que humaine. Que vos diroï je? Se la biauté de toutes les autres femes fussent ensemble, si seroit plus celle de Polixena. Autres grans gens ot assés a Troie et par dehors dont le 75 Livre ne fait pas mention, quar assés i a d'autre chose a traitier.

**74. COME GRIZOIS ASSEMBLERENT LOR GENS QUE IL ORENT AMASSÉ A ATHENES.**

Quant l'iver s'en fu alés, ce fu entor demi mars, que li Grizois, qui mout avoient porchacié s'assemblerent a Athenes tuit, ne onques si grant gent ne fu veüe ne si grant estoire de nes come il i ajosterent, que par amor, 5 que par priere, que par doute; quar mout estoient cremus

par mi le monde ; et ci après orrés comme bien de nes il  
i ot et qui les amena.

#### 75. CI CONTE LE NOMBRE DES NES.

Agamenon i amena [de Micene] cent nes, et Menelaus  
son frere de Parthe quarante. De Boëte et del honor en  
amena Protenor quarante. Alermus et Archelaus, qui  
dous freres estoient, en amenerent trente. Epistrophus et 5  
Secondus cinquante. Thalamon Aÿas en amena de Sale-  
mine cinquante ; si ot en sa compaignie cinc grans  
princes : Teücer, Emplimar, Dorion, Polixenart et Tiseüs.  
De Pile en i ot li viax Nestor cinquante, et autres cin-  
quante Thoas de Telias. Oïlenus et Aïax en orent de lor 10  
terre trente et set. Eminecus, de la cité de Heminois, en  
ot soissante et trois. Philiptoas et Santipus en ame-  
nerent de Calsidoine trente. Ydomenés et Merion en  
orent cent. Ulixès d'Acaye en ot cinquante, Emelius dis.  
De Pilasta Portacus cinquante, et avec lui fu Prothese- 15  
laus. Macus et Polidri en orent trente et dous, de la terre  
de Lescope. Achilès en amena de Sezilles septante, et de  
Rode en amena Empolida cinquante. Santipus d'Elide  
en ot trente. Polixetès et Lavertin en amenerent de Larise  
soissante. Diomedès, Cerilus et Aurialus en orent d'Ar- 20  
gues et de l'onor uitante. Liotède de Melibee en ot set.  
Eümenus en i ot onze. Menesteüs, li dus d'Athenes, en i  
ot quarante.

#### 76. CI ENDROIT LE NOMBRE DES PRINCES DE GRECE ET DES NES QUE IL AMENERENT.

Ensi come vos poés oïr et entendre fu la some des rois  
et des princes trente et sis. Des nes furent mil et dous  
cens et dis. Si devés savoir que mout i ot d'autre gens. 5  
Et quant il furent tous assemblé a Athenes, Agamenon,



que il orent fait prince, fist assembler dehors la ville tous les barons et l'autre pueple por tenir parlement, si comença sa raison en tel maniere.

**77. SI COME AGAMENON PARLA.**

« Saignor », fait il, « me plaist dou riche concille et de la noblesse que je voi ci assemblee, et me semble que en grant peril se met celui qui se reveille contre nos et poi aime [sa terre] et son henor. Quar, selonc mon avis, 5 j'en vois tel mil que celui qui meins a de pooir devroit par la force abatre l'orgueil de celui qui ci nos a fait assamblar. Et ore est il voirs que a notre droit et a grant tort de nos henemis est guerre venue entre nos et eauz. Et nos somes ici por la venjance prendre, que reprochié 10 ne soit a nostre lignage, quar nos ancessors nos laisserent grans henors, ne nos ne devons souffrir que la hautesce et la seignorie de Gresce ahaisse entre nos mains, ançois devons pener que nostre renomee, que tant [s']estent loins, reluize et resplendisse plus et plus 15 par mi le monde. Et nos somes si d'une acort que il n'a nulle generation de gent au monde qui osast faire contre nos, fors que ceste mavaise gent, qui mal virent lor folie. Et bien poés savoir que il ont mavais conseil, quant il ne se membrent que un soul poi de gent des- 20 truirent autre fois toute la ville de Troiez. Et ce me fait penser que lor outrequidance soit tele quar qui leslaisseroit sans venjance prendre, qu'il quid[e]roient encores sousmettre a lor seignorie tout cest païs. Et bien soi qu'il ont encores enforcié lor ville et gens aqaise de maint 25 païs por eaus defendre contre nos. Et tout soit il chose que mout sera legiere chose de eauz destruire, selonc mon avis, si conseil je endroit de moi que, avant que nos meüssons de ci, envoïssons a Apollo a prendre con-

seil de ceste besoingne et a quel cief nos en porons 30  
venir. Et je sai que les dieuz nos en diront le voir, quar  
a ceauz se doit l'en conseilier de toutes choses, et puis  
porrons plus seürement ouvrer. »

**78. SI COME ACHILLÈS ET PATROCLUS SACREFIERENT AU  
TEMPLE D'APOLIN.**

Cist conseil fu mout loés de tous, et maintenant i en-  
voierent Achillès et Patroclus. Il s'en alerent au temple  
Apollo et sacrefierent, et après demanderent lor respons 5  
que il lor dist : « Allés, si nunciez as Grizois que sans  
faille ou disme an avront de Troie tout lor vouloir et des-  
truiront la ville. Achillès mist en escrit ceste response.

**79. SI COME CALCAS ET ACHILLÈS S'ENTRECONTRERENT  
ET L'UN DISCOVERIR SON CORAGE A L'AUTRE.**

Celui jor meïsme i avoient li Troïen tramis Calcas.  
Calcas estoit uns viauz hons et grant prince de la ville,  
si come evesque. Et vint par l'achoisson meïsme que 5  
Achillès estoit venus et ot respons des dieus en ceste  
maniere : « Vai t'en a la compaignie des Grizois et garde  
que tu ne torne jamais a Troie, quar il covient qu'ele  
soit destruite et la gent morte, et tu aideras as Grizois  
de tout ton pooir. » Endementiers que il avoit eü ceste 10  
response, il et Achilles s'entrecontrerent et descovri l'un  
au l'autre son secré, et se firent mout grant joie. Achil-  
lès l'en mena as Grizois aveuc soi et le herbeга mout  
honorablement. Puis retraist as Grizois la responce as  
dieuz dont il orent mout grant joie. Calcas meïsmes lor 15  
dist quoment li Troïen l'avoient envoié et la responce as  
dieuz et coment il li commanderent que il ne repairast a  
Troie, ains venist a Athenes et se tenist o les Grizois,  
quar as dieus plaisoit que la ville fust destruite. « Por

quoi je vos lo et vos conseil que vos vos hastés du plus 20  
 tost que vos porés d'aler a Troies, quar obeïr-vos covient  
 a la volenté et as grés des dieus. Et je meïsme sai que  
 mout me blasmeront ceauz de Troie, mais je ains plus  
 faire la volenté as dieus que as Troïens. Quar qui ne les  
 voldra obeïr, il covient que il en vigne a male fin. » 25

# 80. [EXAMPLES].

Ileuques poés veoir quoment les gens de celui tens  
 estoient foux et de folle creance ; quar ces dieus que cil  
 creoient si fermement n'estoient autres choses que ymages  
 de fust ou de cuivre et d'autre metal, et d'yables avoient 5  
 tant de largece que il se metoient dedens et parloient as  
 gens qui par folie les creoient, dont il estoient mainte  
 fois deceüz. Et voirs est que d'yable ont pooir de dire la  
 certaineté des choses qui sont a avenir, qui obscures sunt  
 a l'humanité en aucunes manieres ; quar onques ne per- 10  
 dirent celui sens que Nostre Sire lor dona quant il les  
 cria premierement, mais chascuns homs qui a sens et  
 discretion doit penser que quant Nostre Sires les trabucha  
 por lor orgueil dou souverain ciel en asbisme, et quant il  
 perdirent toute lor santité, puis que il orent toute 15  
 santité perdue, en lor ne demoura point de verité. Et  
 ensi poés croire que se il se vent, il ne veulent pas dire la  
 verité que il ont en l'umaine lignie. Et ce demoustrerent  
 il bien des Grizois, qu'il lor distrent que il destruiroient  
 Troies, si lor celerent il bien le grant damage que il lor 20  
 en avient, et meïsmement a Achillès, qui villainement morut,  
 come l'Etoire devisera, et a maint autre, qui en lor me-  
 toient lor esperance, qu'il en finerent hontousement.  
 Mais puis que li benois fis Deu vint en terre por raembre  
 l'umaine lignie, lor iniquité et lor pooir fu refrenés et 25  
 estanchiés ; quar, se por le pechié as gens ne fust, il n'eüssent

nul pooir au monde. Mais nostre pechié meïsme lor done la poësté que il ont sur nos. Dieux nos doint grace de merir ce por coi il n'aient pooir sor nos !

**81. SI COME IL ORENT GRANT JOIE DE LA VENUE CALCAS.**

Or retournerons sus nostre matiere et dirons quel grant joie orent li Grezois dou respons que Achillès lor aporta, et plus assés de ce que Calcas lor dist. Et por ce li firent il grant honour et distrent que par son conseil ovre-  
roient. Et il lor dona et loia assés que il se deüssent haster d'entrer en mer, et il si firent ; et tant nagirent o toute lor navie que il arriverent a Thenedon. Et maintenant mistrent pié a terre tous armés et asaillirent le chastel. Et cil se defendirent angoissousement et mout en ocistrent  
des Greux ; mais tout ce ne lor valu noient, quar a la fin furent vencus et ocis et le chastel ars et tout abatu. Après alerent par le país robant et ociant, si que nule arme n'i estoit a seür. Si se retrairent les gens du país a  
Troies.

**82. SI COME AGAMENON AJOSTA UN GRANT PARLEMENT.**

Après que ce fu fait, ne tarda gaires que li Grizois ajosterent un grant parlement ou tout le barnage de l'ost s'asembla. Agamenon parla premierement, qui mout estoit sages et curious de la besoigne : « Oiez, saignor,  
fait il, que je vos veul moustrer, que li saiges homes doivent haïr orgueil sur toutes choses, quar onques nus hons n'i gaaigna riens. Par orgueil vient maint henemi, ne nule chose ne peut a bon cief venir qui par orgueil est comencie ; quar, quoment que li commencement en  
soit bons, la fin est tous jors perillouse : por quoi nos devons orgueil partir de nous en toutes guises, quar c'est le vice que les dieus plus heent. Et mainte fois en



ont il pris si haute vengeance que chascuns le doit geter  
 de sa compaignie. Et por un ami que li orgueilleus 15  
 trove, si a il cent henemis mortex. Et por ce vous veul  
 je ci orendroit faire entendre la chose dont il nos covient  
 plus a penser et prendre endroit soi chascuns la cure sus  
 lui. Nous somes entré en la terre de nos anemis et tant  
 les avons ja domagiés, dont il ont grant ire. Et si devés 20  
 savoir que grant defense metront en lor ville defendre  
 [con celle qui est mout fort d'enging et de gent d'es-  
 trange maniere] qui de plesours leus i sont venus. Et  
 celui a grant avantage qui en son païs se defent, quar  
 doubler li doit sa force. Et vous savés que une petite 25  
 forteresse done aucune fois grant travail avant que l'en la  
 puisse penre. N'ente[n]dés pas que je pense que il se  
 puissent longuement tenir encontre nos; mais, si come  
 il m'est avis, sur toutes choses devons garder nostre  
 honour et gouverner nostre euvre par sens et par mesu- 30  
 rable conseil, quar laide chose seroit se nous, qui avons  
 ajosté ci tous les plus sages homes dou monde, feïssons  
 ja chose qui a droit peüst estre reprise; quar l'en set bien  
 par tout le monde coment ceste euvre esmut et qui a  
 droit ou tort. Et Laomedon, qui fu li commencieres, l'a- 35  
 cheta trop chier, si qu'encores se plaignent ses hoirs. Mais  
 le roi Priant de Troies nos fist antan requerre mout amia-  
 blement sa serour, et rendre ne li vosimeſ, dont je vos  
 di bien tant que ce fu folie et grant orgueil; quar nos lor  
 avïons tant mesfait que la pais estoit mout bone par 40  
 devers nous; quar de grant povreté de sens vient a  
 non redouter les choses qui peuent avenir. Quar, se  
 Exiona fust rendue adonques, il n'eüssent pas Elaine  
 prise ne nostre terre robee: por quoi vos et eaus i avons  
 grans damages. Mais je lou que nos faisons tant de ce 45  
 que l'en ne nos teigne a orgueilleus et que l'en ne die

que le tort soit nostres quant nos les averons destruit, et que nostre loënge i soit doublee par juste victoire ; que nos mandons a Priant par nos messages que il nos face Elaine rendre et nos face droit dou mesfait que Paris fist 50 en Grece ; et se il ce nos fait, que demanderions nos plus ? Je voudroie que a l'onour de nos fussions ja retournés en nostre país. Mais ne quidiés ja par mes parolles que je soie de rien guenchis, quar bien sachiés que je ferai tant que nus hons ne m'en pora a droit blasmer. 55

**83. SI COME ULIÈS ET DIOMEDES S'EN ALERENT MESSAGES AS TROIENS.**

Sur ce fu respondu en plusors manieres. A la parfin, fil'en envoyer a Troies ; si chargierent le mesage as dous des plus proisiés princes de tout l'ost : li sages Uliès et 5 Diomedès, ce furent les dous. Si vindrent a Troies et descendirent a la maistre sale, ou il troverent le roi et ses barons qui conseilloyent sur leur besoignes. Quant il furent par devant le roi, Uliès parla et dist :

**84. SI COM IL FURENT DEVANT LE ROI PRIANT.**

« Roi Priant, je ne te salue pas, por ce que nostre gent ne t'aime point, et assés i a grant achoison d'une part et d'autre. Agamenon et les autres princes de Grece nos ont tramis ça, et vos mandent que sans nul respit nous 5 faciés dame Helaine rendre et nous amendés le mesfait que Paris fist en nostre terre. Et saches que se tu lor faiz droit a lor volenté, que il sont si sage et amesurés que il le prendront et s'en iront en lor país arieres et ferme pais vos tendront des ores en avant. Por ce soiés 10 sagez, quar se vos ce ne faites, onques tel damage n'avint comme vos i averois, et si le poriés ores legierement eschiver. Or vos conseillés de ce et si nos respondés, quar maintenant nos en volons aler. »

## 85. SI COME LI ROIS RESPONT AS MESSAGES.

Li Rois respont et dist : « Vassal, poi estes sages et ceaas  
 qui ci vous envoïrent, quant vos quidiés que je si faitement  
 me honisse. Ce n'est a faire riens de ce que vos deman- 5  
 dés ; quar, se il m'eüssent en lor prison, ne me deman-  
 deroient il autre chose ; ne il n'ont mie encore tel  
 pooir sus moi por coi je veulle tel chose faire que  
 reproiché soit a mes hoirs ; quar assés lor avroie plus  
 a demander que il a moi, que tout avant sans achoison  
 destruirent il ceste terre et ocistrent mon pere et mes 10  
 amis, dont je n'avrai jamais joie jusqu'a tant que vengeance  
 en soit prise. Et de ce en ai je bien torné le droit devers  
 moi, quar je les fis proier par Antenor qui ci est que  
 il ma serour me rendissent, et il respondirent assés vilai-  
 nement et poi priserent moi et mon messages, et encores 15  
 la tient deshonoreement celi qui l'en mena, dont je  
 ai grant duel en mon cuer ; et après dient que lor face  
 droit ! Or dites a Agamenon de par moi que je li mant  
 que, tant que je porterai corone, pais ne porra avoir de 20  
 moi ne des miens, si lor ferai savoir quel cuer je ai et  
 mon lignage contre eaus, et quels amis, et quel aide  
 nos est creüe puis un mois. Et se je les trove en ma  
 terre, il troveront autre defense que il ne quident. Et se  
 vos ne fussiés messages, trop malement vos alast. Partés 25  
 de moi hastivement, quar ja tant come je vos verrai ne  
 sera mon cuer lié. »

## 86. SI COME DIOMEDÈS RESPONT LE ROI PRIANT PAR GRANT FELONIE.

Diomedès comença par grant felonie : « Sire rois,  
 fait il, se il vait ensi que vos dites, jamais sans ire ne  
 serrés, quar anchois que mois passe, en porés veoir tant 5  
 trestous armés sor lor chevaux qui ne vos laisseront

mie ester bien asseür dedens ces murs de vostre ville, et si verrés tant de vos gens morir et vos murs abatre. Quel cuer avrés, se il ne s'enmaie ! Et quant vos avés pensée de nos qui somes tous desarmés, bien la deverés donques 10 avoir de ceauz, quar chascun soi penera a son pooir de vos domagier. Bien voi que longement vos durera ceste dolour. »

### 87. SI COME LE ROI GARANTI DIOMEDES DE MORT.

Grant noise firent trestuit cil de laens de ce que Diomedès ot dit, si en i ot assés de ceaus qui se traistrent avant por lui occire ; mais li rois se mist entredeuz qui a grant peine le rescoust, si ne demora pas por Eneas 5 ne por les autres que il n'eüssent honte. Mais Hector les convoia hors de la salle tant qu'il monterent en lor pallefrein, si s'en vont avau la ville, ou il resgardoient mainte richoise et maint orgueil, et tant de nobles choses que bien lor sambla de merveillouse afaire et de grant 10 defense, si en furent tous esbahis dont si grant richeche pooit venir. Et tant firent que droit a Agamenon i vindrent ; et la furent assemblé tous les barons et tous les princes de l'ost, et il retraistrent par devant tous la responce dou roi Priant. 15

### 88. SI COM ACHILLÈS ET PATROCLUS GASTERENT LE PAÏS.

Endementiers pristrent li Grizois conseil que il avoient a faire, si s'acorderent d'envoïr en fuerre par le païs entor Achillès, qui en mena Patroclus avec lui. Et grant domage firent a toute la contree de villes et de chastiaux 5 ardoir et de gens destruire. Et puis repairierent a grant joie, et tant apporterent de viandes et de proies que l'ost fu mout plenterous. Mais dèsoremeis m'est il avis et drois est eins que ge aille plus avant, que vos die ques



gens vindrent Troies defendre : non mie por ce que je 10  
tous les sache nomer, mais des plesoûrs porés oïr les  
nons.

**89. LES NONS DE[S] PRINCES QUI VINDRENT SECORRE  
TROIES.**

D'un païs que l'en apelle Cacton, qui mout est loing  
entre souleil levant et septentrion, vindrent dui rois,  
Pandarus et Adastrus : cil amenerent merveillouses gens 5  
as armes, plus de sis mile chevaliers. D'une autre contree  
que l'en apelle Colophon vindrent Caras et Marcius et  
Phimacus et Nestor : cist quatre vindrent Priant secorre  
a grant compaignie de chevaliers qui furent entor de  
uit mile. Dou roiaume de Lice en fu Glacon et Sarpendon 10  
son filo quatre mile chevaliers. Eüfrates, le soudan dou  
Coigne, qui hons estoit dou roi Priant et ses voisiens, i  
amena sis mile chevaliers, qui mout i firent d'armes.  
De Larise, qui est au comencement de la terre d'Egypte,  
vindrent deus dus qui freres germains estoient, Upos et 15  
Cüpresus, si amenerent trois mile chevaliers. Et de  
Cisoine vint Remus le roi, et avec lui uit contes,  
dont li pires valoit un roi ; et amena dis mile chevaliers.  
De Trace, ou il a mout hardie gent, y vient Pilex et  
Calamus qui trois mile chevaliers amenerent et cinc cens. 20  
De Peoine, ou il a maintes merveillouses choses, avint  
Pretenisis, qui roi en estoit et avec lui Trepeu et Cas-  
con<sup>1</sup>, qui amenerent dous mile chevaliers. De Frise i fu  
Antyophus, Miserès et Calamon, que chascun i amena  
mil chevaliers. De Boëtes i vint Amphimas, et Forthins 25  
a dous mile chevaliers. Dou regne de Bethine vindrent

1. Ce nom propre surajouté vient peut-être de *cosiens* mal lu et mal com-  
pris. Cf. ch. 99 il est mis pour glaucon.

Poëtès [et] Pistros qui quatre mile chevaliers amenerent en lor compaignie. De Paphagoine i vint le noble roi Felimenis. Paphagoine est une terre endroit le levant et mout lontaigne. Et estoit Philemenis plus grant d'un 30 autre chevalier, et sa gent mout merveillouse et tous armés d'autres manieres que les autres, et ça avant vos orrés coment il se contint. D'Ethiope i vint le roi Persès, et avec li amena deus mile et cinc cens chevaliers qui des armes ne savoient point, mais archiers estoient 35 mout merveillous et estoient tout ausi noirs come pois. De Terrache vint Thiseüs et Archilagus ses fis, qui orent chascuns mil et dous cens chevaliers. D'Agreste, une ille estrange mout durement, y furent dous rois, Phion et Edras, avec trois mile chevaliers. De 40 Lizoine, qui est près dou roiaume de Femenie, i vint Epistros le roi, qui [mout estoit sages et engignos. Cestui] amena avec lui le Sagitaire, que grant merveille fu a esgarder, si come vos oreis ; avec lui mil chevaliers.

**90. COME TROÏENS FIRENT GRANT JOIE DE LOR VENUE.**

Tuit cist que només vos ai et maint autre vindrent defendre Troies, que por requeste, que por homage, que por honor aquerre et pris. Si n'oï onques nus hons parler de si grant diversité de gent et de languages, dont la 5 terre fu bien garnie. Et furent nombrés les princes a cent et trois, et de trestous fu Hector maistres et sires, quar bien en estoit dignes. Paris, Troÿlas, Deïphebus, Antenor, Polidamas, Eneas, chascun fu chevetaine des siens. Et tous les ordena Hector par certain nombre et que 10 chascun obeïst a son souverain et de l'armer et del monter et de l'issir hors de la ville selon le commandement de son prince. Les geus a pié furent tous ordenés en quel maniere et en quel euvre par nuit et par jour il

devoient estre et a quel prince et a quel baniere et en 15  
 quel endroit de la ville chascuns se devoit tenir : non  
 mie por ce que il se doutassent d'estre assaillis as murs,  
 quar tout en fust assés loing et il issoient tous contre  
 eus, si comme vos orés; mais ce faisoient il por estre  
 plus ordenés en toutes lor affaires. Mais ci laisse le Conte 20  
 a parler d'iaus et retorne as Grizois, qui sunt a Thenedon.

#### 91. SI COM PALAMEDÈS VINT A THENEDON.

Li Grizois, si come di vos ai, se tenoient encores a  
 Thenedon. Atant vint Palamedès, qui estoit un des grans  
 princes de Grece, mais por la maladie qu'il ot ne pot  
 estre a Athens quant les autres acueillirent la mer. Quant 5  
 il vint, si amena avec lui trente nes mout bien chargies  
 et bien garnies, dont li Grizois furent mout liés et orent  
 grant joie. Or est il voir que par mainte fois avoient il  
 pensé d'aler assaillir la ville par nuit, mais aise n'en  
 avoient, quar mout redoutoient et cremoient l'aprochier 10  
 de la ville et dou port, et sor ce avoient maint conseil  
 tenu. Mais un jor estoient a conseil por ceste besoigne  
 et avoient parlé en divers sens, meis n'a mestier de  
 retraire le conseil de chascun. Mais or poés oïr que Pala-  
 medès en dist, qui mout estoit cremus et redoutés par 15  
 son sens et par sa valor et que de grant pooir estoit.

#### 92. SI COME PALAMEDÈS PARLA ET DIST.

« Saignours, dist Palamedès, mout grant honte  
 poons avoir dou grant dommage et dou grant sejour que  
 nos avons ci fait, quar bien a un an que vos fustes ici,  
 et encores n'avés Troie veüe, ne ne savés quel gent il i 5  
 a. Et si devés savoir que grant loisier lor avés doné de  
 garnir et d'enforcier la ville, et mout mostrons grant

semblant de coardie. Et sachiez qu'il nos doubteront moins assés : por quoi il me samble que celui qui dona le conseil de ci arester ne fist mie que sage ; quar se l'en fust 10 adont alés tout droit a la ville o toute la navie, je ne croi pas que nos eüssons trové grant contredit a l'ariver. Et sur ce je ne dirai plus, mais faisons nos nes appareillier demain sans plus atendre et nos en alons envers la ville et nostre pooir faisons de conquerre la, quar ce nos 15 covient il faire, que qu'il en doie avenir ».

### 93. COM IL S'ACORDERENT TUIT ET SE MISTRENT EN MER.

A cest conseil s'acorderent tuit. Et quant vint l'endemain, si se partirent de Thenedon a toutes lor nes toutes armées et bataillies de quant qu'il i convenoit, si les mistrent par eschielles cent a cent. La veïssiés si grant 5 merveilles de voilles que par toutes les quinze liues ne peüst l'en veoir se petit de mer non. Et ensi apareilliés s'en vont tout droit au port de Troies. Et quant cil de la ville les choisirent, maintenant corurent as armes et issirent encontre eaus sur la marine, que onques li peres 10 n'i atendi son fil ne li fis son pere ne l'un ami l'autre, et s'arengierent trestous armés sus la marine.

### 94. COME LES TROÏENS ISSIRENT CONTRE EAUS.

Cil dedens virent lor henemis si appareilliés, si sorent bien que autre conseil n'i avoit mestier mais que laisser l'alér, si fu changiés li cuer a tous les plus hardis. Prothiselaus, qui rois estoit de Pilargues, vint chevetaines 5 des cent nes qui premieres estoient. Et il, come seür prince, se lascia aler a terre, si i ot [assez] des nes peries et maint haut home noié. Et ceaus qui de la mer eschapoient vis recuilloient li Troïen, qui a grant martire les ocioient. Nus hons vivans ne poroit conter la grant 10



dolor ne la grant poine que il orent a l'ariver. Et ja estoient toutes les cent vencues, quant les autres cent ariverent et maintenant mistrent pié a terre. Si veïssiés estour dur et felon, et la mer estoit grosse, si les espaventoient mout les undes. Li Troïen lor estoient au 15 devant, qui les ocioient come bestes et aucune fois les reculoient jusques a la mer; si les convenoit entrer dedens, lor boëlls traient par la mer meïsmes. Aucuns i avoit qui miauz amoient a morir a seche terre qu'estre noiés.

#### 95. COME ARCHILAÛS MIST PIÉ A TERRE.

Atant ariva Architelaüs et Protenor: voilles levees s'en vindrent a terre et malgré lor henemis issirent fors des nes et lor compaignie meïsmes. Mais, ançois que il fussent hors, les domagirent mout Troïens. Et quant il furent 5 arivés avec les nes, si firent merveilles de lour cors. Li rois Esdas et Alignus arieverent après, qui grant estour rendirent as Troïens; mais tout cen ne lor valut rienz, quar les Troïens le firent refuser jusqu'a la mer, ou il ot plusors qui burent a outrage; si le eüssent 10 tous mors, quant Ulixès ariva et sa compaignie, que sur le sablon descendirent, quel gré que les Troïens en eussent. Et meïsmes Phelimenis li nobles et li prince i vinet tuit a cheval contre Ulixès, la ou il estoit tout a pié, et li met le fer dou glaive par mi le cors si que a poi 15 que il ne l'a mort, et le versa nafré a terre. Mais maintenant saillî sus et le feri de l'espee et li perça l'escu et li mist l'espee par mi la gorgiere et le porta a terre. Dont fu sa gent mout esbahie, si en porterent son cors en la ville, quar bien quidoient que il fust mors. Endementierz 20 ariva Agamenon et amena des autres princes assés qui traistrent lor chevauz hors des nes et monterent, que ce pooient il bien faire, quar li Troïen estoient refusé por

la rescusse Felimenis. Et quant ces princes furent montés, lor veïssiés chevaliers entremesler et gens ocire, 25 enseignes desploier et venteler contre le vent, chevaliers voidier selles et crier et braire, que la mort sentoient. Que vos dirai je ? Trop horrible chose est a raconter la grant mortalité que illecques fu faite et d'une part et d'autre. 30

**96. SI COM LI ROIS PERSÈS VINT CONTRE GRIZOIS ET LES DOMAGA.**

Endementiers que la bataille estoit si grant, les nes furent toutes arivees et trastrent hors les chevaux. Maintenant s'armerent et monterent qui monter pot. 5 Adonc issi li roi Persès a tous ses archiers, qui mout domagirent lor henemis, si les remistrent par force sur la marine. Adonc Palamedès, qui ja estoit montés, dist a ses gens : « Veez, biaux seignorz, que les Troïens font de nos amis. Alons les secoure, quar grant los i averons. » 10 Lors se met avant et fiert un frere germain dou roi Menon, Sicamor estoit apellés, et le rua mort a terre. Ensi fait tant par sa proësse et par sa compaignie que il firent les Troïens refuser plus d'une archie loing. Et adont vint Hector fier et hardi come lion, si point par mi la 15 presse et troeve Prochiselaus, celui qui premierement ariva, et li dona tel cop que le cuer li parti et il cheï mort a terre. De ses cous furent espaventés tous les plus hardis de Grece, si les veïssiés plorer et mēner grant duel et laisser le champ come esperdus. 20

**97. SI COM ACHILLÈS VINT EL CHAMP MORTEL.**

Hector, qui est entre eus, ne fine d'ocierre gent et detrenchier la ou il va et ou il les puet ataindre. Si l'ont li Grizois en poi d'oure conu come ceauz qui le redoutent

trestous et s'eepee ausi comme la mort, et fuient ausi 5  
 devant lui comme le lup devant les chiens. Et maintenant que il estoit un poi las, si reprenoit cuer et, tant  
 comme il estoit en l'estor, ne se pooient Grizois plus tenir. Ensi firent le jor plesours fois, tant que Achillès o toute  
 sa compaignie vint a l'estor, et si estoient fuïs et les 10  
 autres mout las. Si fist Achillès a celle fois que jusqu'a  
 lices furent li Troïen mené. Mais ce ne fu pas legiere  
 chose a faire, quar l'Estoire nos raconte que merveillous  
 esfors i firent tous les princes et d'une part et d'autre.  
 Si fu l'ocision si grant que tous li chans i fu jonchié de 15  
 mors. Mais atant les fist la nuit departier, si se remistrent  
 en la ville les Troïens a mout grant poine.

#### 98. SI COM IL TENDIRENT LOR PAVILLONS.

Agamenon fist maintenant ordener quoment li chans  
 seroit assis. Si ne veïstes onques si grant richece de pavellions de drap de soie et des enseignes coment iluec  
 furent despoïes. Et tout soit il chose que les Grizois ;  
 eüssent grant mestier de reposer, les Troïens ne les laissierent mie, que maintenant que le jor vint s'apareillierent  
 de lor henemis envair. La veissiés ville garnie d'esseignes  
 et de merveillouse beauté, si oïssiés par desus les murs  
 et par desus les tors tanbour sonner et estremens de 10  
 diverses manieres, si que trop sembloit ville de grant  
 afaire et de grant pooir.

#### 99. SI COM HECTOR ORDENA SES GENS PAR ESCIELLES.

Hector fist assambler tous les gens de la ville et fist  
 Tardanidès ouvrir, et ce estoit une des meïstres portes de  
 Troie ; et illeuques mist ses eschilles et mist en pre-  
 miere un de ses freres bastart que Celianor estoit apel- 5  
 lés, et Cascon, le fil le roi de Lice, fu avec ices gens,

et Thiseüs et Antilogus ses fis ; et ot a ceste premiere bataille trois mile chevaliers, si s'aresterent dedens la cité foreine. En la seconde mist Mere, le roi de Frise, Sanchipe, Calcamus, et lor princes fu le vaillant Troiolus, et portoit un escu d'asur a lionchiaus d'or, et seoit sus un merveillous cheval. Hector l'apela et li dist : « Biauz douz amis, gardé vos de trop grant desroi, quar je croi que de ci a dous ans porés vos bien moustrer vostre chevalerie et vos et les autres. Por ce vos prije que vos ne vos enbatés follement, quar paor me fait le grant corage que je conois en vos. » Atant se mist o toute sa bataille, qui estoient quatre mile chevaliers par conte. Au tierz conroi fu li grans Compos, le roi de Larse, o Cunpresus : avec lui furent trois mile et trois cenz ; et les guia Caradans, un des fis le roi, si se mistrent avec lui dous roiz. En la quarte bataille fu Remus, le roi de Cicoine, et ot avec lui cinc mile chevaliers ; et Polidamas fu lor chiés, qui bien lessot conduire et que grant joie en demena. En la quinte bataille furent cil d'Oürappe, dont estoit roi Presenteus et Trepex, qui estoient les mellours archiers que l'an seüst ; si les guia Deïphebus. En la sizeme eschielle furent cil d'Argistre et lor roi Edras et Phion. Cist Phion avoit un char de merveillouse beauté et richece, et il estoit armés par desus. Et li chars estoit covert tous d'on cuir d'olifant boilli, si le traioient dous dromadaires, et si estoit li chars si bien armés de haches et de dars que merveilles estoit de l'esgarder. Hector li bailla un de ses freres qui Pitagoras ot non. En la septime bataille mist Hector Eneas et tout cil dou Coisne et Eüframes lor roi, si en pria mout Hector Eneas por ce que vieus hons estoit. Adonc dist Eneas : « Pensé de chevauchier, quar cil dehors furent pieça as lices ». Hector respont que ce feroit il maintenant. En l'utisme bataille fu Paris a tous



ceauz de Perce, qui furent quatre mile chevaliers. En la 40  
 nuevime bataille fu Hector; avec lui tous ceus de la  
 ville et dis de ses freres bastars. Et furent encores dis  
 mile chevaliers, tous merveillous et desirrant de lor  
 terre defendre. Hector monta sor Galaste, qui fu le plus  
 biaux destriers dou mondene qui jamais soit veüs; et bien 45  
 estoit dignes de tel maistre. Et quant il ot la teste armee,  
 si ala parler au roi Priant et li dist : « Je m'en irai pre-  
 miers, et vos après a tout cest autre conroi. Et la gent  
 au pié nul n'en isse dehors se je ne le comant, quar vos  
 nos serés forteresce et donjon. » Le pere respondi : « Fil, 50  
 ta volentez soit faite, quar mout me fie en ta destre  
 main que par elle soit vengie nostre honte et li tors  
 que nostre henemis nos ont fait. Va, meis garde que tu  
 reveignes souvent a moi. Que les dieus nos aient en lor  
 garde ! » 55

#### 100. SI COME HECTOR ISSI HORS DE LA VILLE.

Adont issi Hector hors de la ville et le heaume lacié  
 monte sur Galaté et bien ressembloit home de gros cuer  
 et de grant fierté : por ce le moustra il bien envers ses  
 enemis. Un escu pendoit a son col, dont li chans estoit 5  
 trestous d'or a un lion vermeil, et autels estoient sez  
 conoissances. Ensi trespassa tous les conrois et lor dist  
 que il chevauchassent vers les tentes. A Dieus ! qui  
 adonques veüst les merveilles de Troies et les enseignes et  
 les conoissances et lor testes armees dire peüst que en tout 10  
 le mont n'eüst tant de beles gens. Les dames de la ville  
 estoient par desus les murs paourouses et esfraees, et ce  
 n'est mie de merveille.

**101.** SI COM LI ROIS PANDARUS REMEST EN LA VILLE POR GARDER, ET AUTRES ROIS AVEC LUI.

Li rois Pandarus de Cesure et Alphon et trois autres rois ne se issirent mie le jor, et grans gens d'autre chevaliers, quar il ne voloient la ville pas desgarnir. Et de l'autre 5 part, il estoit drois que il en eüst tous jors des fres por refrechir les traveilliés. Mais de ceuz vos lairons ici un poi por raconter coment cil de l'ost establirent lor batailles.

**102.** COMENT AGAMENON ORDENA SES BATAILLES PAR ESCILLES.

Agamenon, qui lor princes estoit, ordena ses batailles, si mist Patrodus en la premeraine, qui ot avec lui trois [mile] chevaliers : ce fu la gent Achillès, quar ce que li 5 uns avoit estoit a l'autre, et Achillès estoit un poi dehaitez. Emanoïst fist la seconde, et avec lui deus mile chevaliers. Et en la tierce Meneteüs, li dus d'Athenes, o quatre mile chevaliers. En la quarte li rois Esclafus de Conmenie, et Alienus son fil guida la quinte bataille ; et 10 orent en ces deus batailles cinq mile chevaliers. La seste bataille guida le roi Archelaus de Boëte et Protenor son cousin, qui orent trois mile chevaliers. La septime ot Menelaus et aveuc lui ses Precheois, qui furent quatre mile chevaliers. Ephistros et Celidis firent l'utieme bataille 15 o deus mile chevaliers. Le roi Thalamon Aÿas o ciauz de Salemine conduit la noveme, et avec lui maint riche home et quatre mile chevaliers. En la diseme bataille fu li rois Thoas, et avec lui ciauz de Logre et li rois Odinat o quatre mile chevaliers. En la unzieme bataille fu Phi- 20 lipthoas ou dous mile chevaliers. En la doseme fu Merion le roi et Idomex et cil de Trace, avec lui quatre mile chevaliers. Nestor ou cil de Prie fist la tresieme et ot cinc mile chevaliers. Imeirs li rois ou tout ses Eximious

fist la quatorsieme ou tout trois mile chevaliers. Ulixès 25  
 fist la quinsieme o ciaz d'Acaye o quatre mile che-  
 valiers. Eminus, le roi d'Espagne, fist la seiseime bataille,  
 si ot trois mile chevaliers. La gent Prochilaus, qui  
 Hector ocist a l'ariver, fu la dis et setteme, si la guia Porta-  
 cus, et furent dous mile chevaliers. Polidarius et Macaon 30  
 firent la dis et uitieme o quatre mile chevaliers. Tercians  
 le roi ou Trepolex firent la dis et novieme o mil che-  
 valiers. Eripilius de Conmënie fist la vintieme. Cil de  
 Lile firent la vint et unieme et Saptipus le roi les  
 guia. Pholibès, li rois de Larce, fist la vint et dousieme 35  
 et Nertinus avec lui, et orent cinc mile chevaliers.  
 Diomedès, Estlinus, Erialus firent la vint et troisieme  
 et orent sis mile chevaliers. Cil d'Argues firent la vint  
 et quatrieme bataille et orent deus mile chevaliers. Cil  
 de Cypre la vint et cinquieme et les guia Cineüs lor roi. 40  
 Cil de Manasse ou lor roi Protolinus et orent en lor  
 bataille quatre mile chevaliers, et fu la vint et sisieme.  
 Le roi Capanor de Capadoche fist la vint et setieme  
 bataille et ot trois mile chevaliers. En la vint et uitieme  
 bataille fu Palamedès et ot uit mile chevaliers. En la vint 45  
 et novieme bataille fu li sages Agamenon et ot sis mile  
 chevaliers. En la trentieme bataille furent tous ceaus qui  
 sans seignors estoient, si les conduit Agias, et avec  
 lui toute sa gent ou furent bien dis mile chevaliers.

### 103. DE CE MEÏSME.

Ces gens vos ai conté et només par non, por ce que  
 vos les entendés miaux, quant vos orés parler de lor che-  
 valerie. Si veïssiés, que d'une part, que d'autre, tantes  
 enseignes de paille et de samit et tantes conoissances et 5  
 tant heaume et tant escu reluire contre le soleil et tantes  
 lances branloier qu'il n'est nus hons qui peüst penser dont

tantes gens pooient estre conqueilles ensemble. Et quant il murent por assembler, la oïssiés bousines, tambour et cors et estrumens sonner, et chevaux henir; si estoit la mute si grant que toute la terre croloit sous les piés : por coi il n'i ot si hardi qui ne muast corage.

**104. SI COME HECTOR ET PATRODUS ET LOR GENT S'ENTRECONTRERENT.**

Hector assembla premierement, et Patrodus essi de sa part. Lor destriers les porterent mout tost, si feri Patrodus Hector par mi l'escu et brisa sa lance. Mais Hector ne s'enmaia de rien, ançois refiert li si que escu ne hauberc ne le guaranti qu'il ne l'abati mort de la selle. Si ne fu onques nushons qui si belles armes eüst, et Hector les voloît avoir, si descendi sur lui ; et ja les eüst traites, quant Merion point sus lui et l'escria : « Leus enragiez, autre viande vos covient porchacier; que lion ne tigre ne feïst ce que tu veus faire. Et bien descendoies en estrange leuc, qui vois dis mile chevaliers que chascun se poine de toi ocirre. » Si le fier sus son escu si que il l'abati a terre. Mais ja por ce ne guerpi son destrier, ançois le tient par le reine et monte avant que lor gent fust assemblee sur li : si peut Merion estre certain que il a sa mort porchaciee. Les gens Patrodus s'esforcierent de lor seignor vengier, que il voient bien que mors est, si i font droites merveilles. Glacon, Tesseüs, Archilogus, Diomedès, tous cist estoient rois, si sont venus en la bataille a toute lor gent ; si veïssiés estour fier et merveillous a la rescousse Patrodus por son cors, si ot sus lui tel meslee dont plus de mil perdirent lor vies. Atant Hector revint a l'estor sor le cors l'espee en la main et descendi por les armes que il desiroit a avoir por lor beauté. Mais Merion vint sus lui. La ot grant bataille, si que Hector se



tint en mal point. Mais quant il se voit entrepris, si comence a ferir a destre et a senestre et a trenchier chevaliers et chevaux, si que il en a ocis et mahaignié grant 30 partie, et por tout cen ne laissa il son destrier. Merion pristle cors sus le destrier et le mist devant soi et le tira hors de la presse, dont il fist que cortois. Hector remaint entre ses henemis, qui ne le laissent remonter ; si peüst il legierement prendre et avoir damage, quant un sien 35 escuir, qui Dodinet avoit non, le vit assi grant mescief, qui portoit dous lances a son seignor, si se traist pres de lui et vit un grant prince qui Carti avoit non, qui mout grevoit son seignor, se li lança une lance, si l'abati mort. Puis se refiert en la bataille et lança une autre lance, si que 40 il abati un autre chevaliers. Et puis se comence a escrier : « Franc chevalier, retournés ! » Cicilianor l'entendi, si retourne o grant compaignie de chevaliers, et il se fiert entre ceaux qui son seignor requeroient et le fist monter. Quant il fu montés, lors veïssiés homes courou- 45 ciés ei plains de matalent plus vers Merion que vers nul autre. Endementiers vint a l'estor le vaillant duc d'Athenes, qui assembla a la bataille tant que il encontra Troiolus et l'abati de son cheval en mi la preisse. Pereillou- 50 sement cheï Troiolus ; si l'avoit celui saisi par la ventaille, et l'eüst trait hors de la presse, quant Miterne comença a crier : « Or tost, franc chevalier, aidons a nostre prince. » Et adonc retorna le roi Arcamus et fiert le duc d'Athenes, si que a fine force le firent guer- 55 pir et le monterent ; si comença a faire si grans merveilles d'armes que il met a mort quant que il aconsiet ; mais mout i rechurent Troïens grant damage por la gent le duc d'Athenes.

**105.** SI COME HECTOR VINT A L'ENCONTRE DOU ROI CALOS DE TRAMENIE ET LI FIST GRANT DOMAGE.

Adonc regarda Hector entor soi et chosi la doloureuse bataille, ou tant de gent perissent; si point en celle part ou il voit le roi Calos d'Arcomenie, qui secouroit Menes-  
tus le duc d'Athenes, si li vint a l'encontre. Cil tost fist  
arester lui et toute sa baronie, si i ot merveillous estor,  
ou Hector souffri assés d'ennuie; mais mout mal mist de  
lor gens, ensi que nul attendre ne l'osoit, quar trop lor  
faisoit de damage et trop lor sembloit s'espee dure et  
merveilleuse. Et cil de Troies meïsmes qui sur les murs  
estoient le veoient bien et sovent prioient Deu que il le  
gardast de contraire. D'autre part, li dus d'Athenes estoit  
mout dolent de son prison que tolu li ont li Troïen; por  
ce josta a Misertès le roi, si l'abati en mi la presse. Atant  
vint Upois et Carpersins le grans o tout ciaus de Larise,  
si encontrerent Archelaus et Protenor. La veïssiés bataille  
mortel et orrible, la oïssiés crier et braire et morir.  
Tant et tant en gisoient par mi les chans que par poi  
lor chevaus ne metoient piet a terre se non sus mors.  
Après i revint le roi de Thicone, et Polidomas avec,  
que li dist: « Nos ne porons avenir a nos henemis de  
grant piece, quar il i a grans gens des nos entre nos et  
eaus: por ce lor alons a travers. » Ensi le firent, dont  
il domagirent mout les Grizois. Menelaus estoit ja  
venus en la place; et quant il vit la merveilleuse ocision  
d'une part et d'autre, si en parla a sa gent mout mer-  
veilleusement en poi de parolles: « Seignors, or est  
veüs, par la grant besoigne que venue est, qui onques de  
riens m'ama, quar bien savés que je n'ose mie estre entre  
vos come roi, mais come compaignon. Or vos pri que  
vos me rendés le guerredon. Véez ci nos henemis mor-  
teuz: gardés que vos le faites si bien sus tous les autres

que vos veés, que por vengier ma honte seulement sont  
 ici assemblé itant roi et tant prince : par quoi je ameroie 35  
 miaus morir que nus de nos feïst samblant de coardie,  
 quar sur nos apent tous li afaïres. » Atant se met avant  
 et tuit li sien après, si trova chascun sa joste apareillie.  
 Mais qui abat le sien, il ne s'en vait pas avec li che-  
 val : autre chose li covient faire, quar li plus hardis 40  
 estoit tous encombrés de soi defendre, si se portèrent des  
 archons a terre entre Menelaus et Remus. Et adonc ocist  
 Polidomas Melaus, li duc de Biert, qui estoit neveu de  
 dame Elaine, dont Menelaus fist grant duel et a merveilles  
 fu courouciés ; si fiert Remus desus le heaume, si que 45  
 pasmé le fist cheoir a terre, dont sa gent quiderent que  
 il fust mort, si voloient le champ guerpier quant Poli-  
 domas se fiert en mi la bataille, et tant fist que il ot le  
 cors a grant poine, et sa gent l'en portèrent hors de la  
 preïsse tout pasmé. A cel point lor fist Menelaus grant 50  
 domage. Li rois Silidis, qui estoit li plus beaux armés  
 de tout l'ost, ala ferir Polidomas si que l'escu li perça et  
 l'auberc pres de la char. Et Polidomas, qui fu fiers  
 mout, lor court sus l'espee en la main et le fiert si que  
 nule arme ne le pot guarantier que il ne le fendist 55  
 jusques as dens : dont sa gent fu desconfite, car Hector  
 lor venoit a l'encontre, si les retorsa sus le conroi Thala-  
 mon de Salemine par vive force. La veïssiés gens amasser  
 ensamble, mais trois batailles estoient contre une des  
 Troïens. Teücer, de la compaignie Thalamon, ala joster 60  
 a Hector, et se il n'eüst sa lance brisee, il l'eüst mort ;  
 meis se il ne fust esloingié de lui, mort l'eüst et tost en  
 fust vengiés. Quar a Hector ne samble pas jeu l'afaïre,  
 quant il voit tant de gent entor soi, et voit bien que  
 secours li tarde trop, quar en dous cens places se com- 65  
 batoient.

**106. SI COME LE ROI THISEÛS SECORU HECTOR.**

Un roi avoit en l'ost qui Thiseüs estoit apellés, qui n'avoit porté armes que trois ans et mainte fois en avoit mené de grans ouvres a fin ; si veoit la grant gent qui se combatoient a Hector, si pensa avant que il peüst avoir secours, le peüssent bien avoir mort. Si se porpensa de tel chose, par grant gentillece de cuer, qui au grant profit li torna, ne tarda pas gaires : « Sire Hector, fait il, vos soufrés ici mout grant travail et grant poine, et vostre secours, ce m'est avis, poroit bien trop targier, et grant peril i averoit se vos cheiés ci entre nos. Mandés, beau sire, a vos gens que il chevauchent, quar en poi d'oure mesavient a un home, et cil n'est mie sages qui ne crient meisaventure. Et a Deu ne plaise que aiez mal par nul de nos ! » Hector l'en mercie mout et dit que mout volentiers li en rendroit le guerredon. Endementiers Thalamon avoit abatu Polidomas, et Menelaus l'en menoit pris, quar il avoit ja s'espee perdue et son heaume frait et tout esquartelé et torné sus le vis, si i avoit grant bataille entor lui. Mais Hector le vit, a qui il en pesa, si point celle part et perce toute la bataille et tant fait que par fine force le lor tolt. Et bien sachiés que plus de trente lor laissa mors, et il fu tant ferus que merveilles semble a ceus qui le voient coment il peut tant souffrir.

**107. COM LES DIS FRERES HECTOR LE VINDRENT SORCURRE, QUI GRANT MESTIER LI ORENT.**

Ces rois que vos avés oï nomer pristrent une voie contre Troïens tel que par force les jeterent hors dou champ : ce fu Espitros, Thalamon, Menelaus et toutes lor gens. Mais oiés con grant mestier orent a Hector ses dis freres. Quant il se furent parti de lui, si en avoient grant crieme et dient que se il se pooient ajoster a lui,



que ja mais ne le guerpiroient. Et quant il virent la resplendissour des espees sur lor frere, si criënt : « Or tost, 10  
alons a nostre seignor. » Si vindrent celle part hardis et fiers come lions, et troverent que Hector estoit cheüs en mi la preisse, et si n'i avoit si hardi Grizois qui l'osast aprochier. Mais un prince, qui Amphimacus ot non, se lança vers lui et le cuida saisir, meis Hector l'ataint et li 15  
coupa la teste. Thiseüs abati Eneas, Epistros, Antonius; Endion feri Thalamon et li fist une grant plaie, et Doim Polisenarta et l'abati a terre, et puis prist le destrier et le mena a son frere Hector, qui monta maintenant. Adonc veüssiés homes fiers et de grant felonie plains. Si fiert un 20  
amirant, Cecinor avoit non, et l'abati en la presse. Que vos diroï je? Tous les dis freres josterent et n'i ot nul qui son cop perdist, si lor ont fait mout grant damage. Thiseüs aloit par la bataille faisant grans martires des Troïens. Atant le choisirent dous des fis le roi et l'aba- 25  
tirent, et ja li eüssent li chief coupé, quant Hector i vint et dist : « Laüssiés le, fait il, tout coi, quar il ne vos damage ». Et maintenant le fist remonter sor un cheval, et Thiseüs l'en mercia mout.

#### 108. SI COM LE ROI THOAS VINT EN LA BATAILLE.

Atant vint le roi Thoas en la bataille ou bien cinc mile haubers et fiert Cassibenant, un des bastars le roi, qui bons chevaliers estoit, et l'abati mort. Et quant ce vit Hector, si en ot grant duel, et por ce moit il en- 5  
contre ses henemis, ausi come lions aufamé entre les aigniaz, et feroit et ocioit et detrenchoit tout quant que il ataint, si que par fine force fist la bataille toute remüer. Si ne vos poroit on dire la moitié de ce que il faisoit, 10  
fors que ciauz que il encontre fait aler a la mort, si que mout aloit malement as Grizois, quant Nestor vint que

s'encontra a la gent Esdras et Phion, que le riche curre avoit et estoit desus tous armés, et plus resplendissoit et ressembloit devine chose que humane, et mout damagoit ses hennemis. Et a la fin fu il navrés d'une saiete en mi la chiere : por coi li Troïen guerpirent place, quant Eneas i vint, que par son effort recouvrent li Troïen le champ. Adonc Ayas i vint, et quant il vit les siens fuïr, si dist : « Ha ! Dieus, a coi tornera ceste chose ? » Si se torne envers sa gent et les semont de bien faire et se met en l'estor, et tant fait que il trueve Eneas ; et cil josta avec lui si que ambedeus furent abatu, et après se recouvrent as brans mout asprement, si que li sanz vermeil lor court par mi la ventaille. Après vint Philithoas, qui mout se poine des Troïens desconfire, si josta avec Hector et brisa sa lance. Hector le fiert et versa lui et son cheval en un mont nafré, que il jut pasmé une grant piece. Après vint Ulixès et feri Paris, si que il li fist les archons voidier, et mort l'eüst, se Troiolus ne fust qui feri Ulixès sor le heaume, si que il li trencha la coife de fer et par poi qu'il ne l'abati. Mais toutes voies s'esforcirent tant li Grizois, a cen que il avoient quinze conroi mis encontre set, que par fine force le refuserent jusques as lices. Et quant Hector vint près de la ville, si trova le conroi des chevaliers de la cité dont il s'estoit le matin partis et fait sans eaulz mainte chevalerie. Et il estoient fres plus de dis mile, tous nes dou païs. Et quant il virent lor seignor, si prirent cuer et hardement. Hector s'en vint vers euz et lor dist : « Biaux seignor, veez l'ouvre qui fort se demoustre, ne sai quele en sera la fin : le commencement est mout stranges. Ceste gent, qui sont venus sor nos, sont de grant force et font tout le pooir de nos adomagier, et jamais ne s'en iront se par bataille non : se il nos peuent laidir, toute lor force en doublera.

Mais crüel damage lor avons fait, et or gardons que 45  
 l'onor soit nostre. Vous veez que chacié nos ont et qui-  
 dent çaens recouvrer o nos et ocirre nous et nos femes  
 et nos enfans, et nostre lignaige ; por quoi nostre force  
 nos doit doubler : par un quatre des lor devons valoir. Et  
 por ce, se vos me volés aidier, nous les ferons par force 50  
 traire en sus et lor ferons chier comparer la mort de nos  
 charnés amis. Et pensés, biaux seignors, que nos ancestres  
 conquistrent a grant poine l'onor que il nos laissirent,  
 que ceste gent nos cuidoièrent tollir. Et si m'ont hui mort  
 un de mes freres, et autel feroient il de nos tous, se il 55  
 eüssent le pooir. Por quoi je vos en pri que nos lor mous-  
 trons nostre esfort, ne ne soions esmaïés por paour, que  
 chascun morra a son terme, et plus douce doit a l'ome  
 sembler la mort franche et henourable en son païs que en  
 estrange terre honteuse et merçiable vie. Et certes mon 60  
 cuer me dit que il seront hui tout desconfit. Et m'est avis  
 que je les voie trestous mors gesir as pointes de nos  
 gleives. » Atant se met a la voie, et cil se porpensent  
 de gaaignier, si eschiverent toutes les batailles et furent  
 sus lor hennemis de travers. La veïssiés gens esperdue des 65  
 Grizois qui orendroit quidoient avoir tout gaaigné.

**109. SI COM LI DUS D'ATHENES DELIVRA LE ROI THOAS DE TROÏENS.**

Li rois Thoas aloit par la bataille et mout damage ses  
 henemis. Atant le choisirent les fis le roi ; si vient vers  
 lui li un d'eaus qui Odinel avoit non et le fiert cil que il 5  
 l'abati a terre en mi la presse, et li autre li corent sus et  
 l'asaillent de toutes pars, et cil se defent mout vigourouse-  
 ment. Mais s'espee li brisa, et cil le pristrent, et en ce  
 que il le tenoient et le trayoient hors de la preisse por  
 lui ocire, i sorvient li dus d'Athenes, et fiert Odinel et 10

l'abati a terre, et tant fist que il delivra Thoas, qui mout estoit enpressés et mout bleciés. Atant i vint Paris et vit le domage que li dus d'Athenes lor faisoit, si le fiert d'une saiete en mi le vis, dont il fu durement bleciés.

**110.** SI COME HECTOR FU FERU D'UNE SAIETE EN MI LE VISAGE, QUE LI ROIS D'ESIMIOIS LI TRAÏ.

Hector, qui de riens ne s'enmaie, met tout son penser en desconfire ses henemis, et tant a fait a l'esfort de sa gent que il les a tous remüés. Et atant vint a l'estor , le roi des Muors, si trait d'un arc que il avoit en la main et fiert Hector en mi le visage, et par un poi que il ne l'a a mort nafré. Mais Hector s'en venja assés tost, que maintenant se traist pres de lui et le fendi jusques es dens. Et s'aïre mout de cen qu'il seignoit, si li doubla son har- 10 diment. Et maintenant fist por apel soner un cor, si se traistrent envers lui tous li nes de la ville et, comant se li jeu fust tout novel, se laissent aler entre lor henemis et fendent la bataille par mi et se traient pres des autres conrois ; et Hector s'en vait au Roi son peré et li dist : 15 « Nos henemis sont desconfit sans recouvrer, se nos de ci les poons geter et retraire ariere. Or me baillés dous mile chevaliers por refrechier nostre conroi, et vos chevauchiez après nous a toute vostre gent ; quar il seront maintenant vencu et desconfit, ou nos i morrons trestuit. » 20 Priant li dist : « Biaux fis, des ores mais aproinent et il bien apert quels sont li jeuz, quant je vos voi ensanglentés. Va et fai ce que tu dis. Que tous les dieus soient garde de toi. » Maintenant s'en revint Hector en la bataille o tout les dous mile chevaliers et grant partie de ses 25 freres, si josta de venue Aÿas, dont ambedous furent abatus. Et Menelaüs ocist Marrot, un grant amirall. Marguariton abati Thalamon, Aiasbrus abati Protenor et Matan



abati Ulixès. Digus feri le duc d'Athenes, si que il le  
 porta a terre et la selle avecques, et si le feri en mi la chiere, 30  
 si que grant partie du nes li abati. Et quant Nadamor  
 vit son frere feru, si refiert Mesteüs et le fist flatir a  
 terre ; mais il resailli en piés et se defent contre les trois  
 freres mout hardiement ; mais riens ne li valoit, se ne  
 fust Teücer, qui le rescoust a grant poine. Adonc vint le 35  
 roi de Perce sur Thalamon Aïas : si peüssiés veoir  
 estor fier et merveillous et gens sor gens et chevaliers  
 decoupés et mal mis issir de la bataille ; si estoit la crie  
 et la noise si grant que il sembloit que tous li siecles  
 deüst perir ensemble. 40

**111. SI COM HECTOR ASSAMBLA AS GRIZOIS ET COPA LA  
 TESTE A EMERION.**

Atant vint Hector o toute la gent que li rois li avoit  
 baillie, qui estoient tous fres et desirrant de la bataille ;  
 si i firent tant par lor esfors que li Grizois lor tornerent 5  
 le dos, et les ont chaciés jusques es tentes. Si choisi Hec-  
 tor Merion le roi par devant un pavéillon et tout a cheval,  
 ou il defendoit soi meïsmes et li sien, si li court sus et li  
 dist : « Je veul que vos soïés compaignon as mors por  
 l'amor de la rescousse Patrodus. » Si le fiert par desus le  
 heaume et l'en porte a terre dou chevaul. Et puis il ressaut  
 mout asperment, et cil se defent quant que il puet, come  
 vigourous chevaliers. Mais sa defence ne li valut rienz,  
 quar la teste i perdi, dont il fu grant damage, car trop  
 estoit hardis et bons chevaliers. Et Hector vit le cors 15  
 el pavillon que celui qui la teste en a perdue i avoit  
 porté, si mist son pooir d'avoir les armes : dont il me poise,  
 quar trop en faisoit que vilein. Et bien s'en pooit souffrir,  
 se son plaisir fust ; meis a poi que il nes achata trop chier,  
 quar li dus d'Athenes, qui mout se prenoit garde de lui 20

souprendre, se trait près de lui, ou il estoit sus le cors descendus, et le fiert dou trenchant de l'espee qu'il tenoit, et li faussa l'auberc et li fist une grant plaie, mais ne s'aresta point. Hector se torne et fait sa plaie bender d'on bendel et remonte et mout couroucié fiert entre ses henemis. Et se nos raconte l'Istoire que mil ou plus en ocist il le jor de sa main. Et a la fin se mist en fuie parmi les tentes, si commençoit a abatre payeillons et derober et ocire quant que il ataignoit. Si fust celui jor fin de la bataille, se Fortune et Destinee ne lor fust contraire a ciaus de Troies, et vos dirai coment.

**112.** SI COM HECTOR RECONUT SON COUSIN, FILS DE EXIONA, LA SEROR LE ROI PRIANT, QUI ESTOIT EN L'OST DE GRECE.

Dit vos ai ça en arieres quoment Priant avoit une suer qui fu prise quant Troie fu destruite et son pere mort. Et Thalamon de Salemine, si come dit vos avons, si en ot un fil qui Thalamon fu apellé, bons chevaliers de grant maniere et hardi. Si se reconurent en la bataille lui et Hector et se firent grant joie. Si li pria mout Hector que il venist en la cité por veoir son grant parenté, mais il ne li otria pas. Et quant il furent une piece conjoï ensemble, celui pria Hector que il feïst sa gent retraire, « quar chascun jor i porons a ce venir. » Hector li respondi : « Biau cousin, je en ferai vostre plaisir, tout que mout m'en soit grief; quar ceste gens nös ont fait mout grant damage, quar il ont tout nostre país destruit, et si ne sevent pas por quoi. Mais je croi que a la fin il seront destruit et honis, car li drois est nostre et le tort est leur. » Ensi departi la bataille sans plus faire, quar ja voloient il les nes alumer, que nul contredit n'i avoit; mais de ce n'avront il ja mais loisir, quar se Fortune eüsse

volu, celui jors estoit tous lor travail finis. Aï ! Dieuz, comme fait a doloir cele jornee, quant par issi petit d'achoison remest lor delivrance ! Por coi je croi que Fortune avoit envie de lor hautesse.

25

### 113. SI COME HECTOR VINT EN LA VILLE.

Ensi par Hector fu laissié celi jour, dont il porrat tous jors mais estre dolens. Et departirent de la bataille li uns liés et li autre dolent, quar qui pert son charnel ami, il n'est pas merveilles se il est dolent, et mout en i ot des mors. Si en vait chascun a son ostel, mais Hector entra le derrain en la ville. Si issirent tuit contre lui, et quant il le virent entrer par la porte, assés en i ot qui de joie plorerent, quar dame ne borjoise ne damoiselle n'estoit demouree que issue ne fust por li veoir. Et toutes et tous crioient a haute vois : « Bien veigne la flor de chevalerie, et celui qui nos vengera de ceaus qui tort nos font ! Li souverains Dieus soit de lui garde et le nos defende, si come il nos est mestiers ! » Se li dura tant que il descendi au palais, ou sa mere le reçut entre ses bras, et ses serours li delacierent son heaume et li osterent son hauberc, qui fraint de mailles estoit. Si demora en un auquenton que il avoit le jor vestu toz froiz, que toz estoit glaciés de suoir et de sanc ensi qu'a grant poine le porent oster. Et firent venir mire por ses plaies regarder, et ensi fist l'en a tous les autres nafrés. Et après furent les tables mises et manja qui en ot pooir et volenté. Et quant vint après mangier, si commencirent a parler de chevalerie et des grans ouvres que le jor avoient esté faites. Les dames demanderent mout qui en devoit avoir le pris. Hector le donoit a Troÿlus, et après a Polidomas et a Paris. Et après loerent mout la chevalerie des Bastars. Et quant il vint l'endemain, cil de la ville estoient tout

25

apareillié por issir hors de la ville, quant li Grizois lor quistrent trives ; si furent donees por dous mois. Et alerent 30 as chans ou la mortalitez estoit, si orent les mors delivrés et les chans avant que les dis jors. Si plouroit chascuns son ami et son parent. Cassabilant en fu porté en la ville et fu si honourement enfoï come fil de roi.

#### 114. SI COME ACHILLÈS PLOROIT PATROCLUS.

Cil dehors firent assement de lor amis. Qui veïst Achillès plourer Patroclus dire poroit qu'il l'amoit de tres grant amor, quar il se paumoit sus le cors menu et sovent, disant : « Biauz dous amis, trop fis que vilein 5 quant je vos laissez aler sanz moi en la bataille : mauvaise amor et mauvaise compaignie vos moustroie adonques. Et bien reconoi que li tors est mien, quant vos estes mors sanz moi. Quar se je eüsse esté deriere vos a dolourouz conroi, je ne croi mie que nus hons peüst 10 nostre compaignie departir : por coi je di que jamais n'avrai amor ne compaignie avec nulle rin qui vive, quar avec vos en portés mon cuer. Haï ! biaux amis, estiez debonaires et biaux et prouz : por coi je ne croi que jamais ferai chose dont joie me peüst venir, quar 15 après toi que j'ai perdu ne seroit ou je metroie jamais mon cuer qui si bien fust emploiés ; quar vos m'amîés plus que nule chose, et je vos, assi comme celui qui ert tous miens, et je vostre. Por coi tous jors mais vos plaindrai en lermes et en dolours, mais sur toutes choses 20 me penerai de vos vengier. Et bien sache Hector, se jamais le puis trover en leuc, ou il ocira moi, ou je lui. Haï ! las, que je n'i fui, quant il descendi sur vos ! » Et alois se pasma, et puis fist le cors ensevelir. Et illeuques ment le proverbe qui dist que home mort n'avra 25 ja amis. Mais Achillès li moustre a la mort coment il



l'avoit amé a la vie. Et d'autre part fist Agamenon ensevelir Merion et Prothiselaus si honourablement come roi. Et quant ce fu fait, si sereposerent d'une part et d'autre.

**115.** SI COME PALAMEDÈS PARLA MOUT IRIÉ A AGAMENON.

Cil de Grece sont tous jors en grant cure coment il peüssent lor henemis conquerre, et sur ce ot conseillié mout de fois et parlé en diverses manieres. Mais sur tous les autres se travaille Palamedès, quar nus n'i est plus curious ne qui tant i face. Mais sachiés que mout li poise de la seignourie que Agamenon a sur lui et sur tous les autres, si en dist mainte fois grosses parolles oiant tous les princes : « Seignor, fait il, je ne sai por quel chose c'est que au plus bas home qui soit entre nous avons fait seignor et prince de si grant oevre. Et sachiés que je ne veul ne ne le ting pas asseür, quar nos somes tels gens qui bien deüssons enlire un home de plus grant valour qu'il n'est et qui plus peüst souffrir a besoing. Et nos n'estions encores ajosté quant il ot la bailie. Por quoi je ose bien dire que il n'est pas covenable que il ait la seignurie sus tant rois qui plus haus et de plus grant auctorité sont que il n'est. Endroit de moi ne le veu ge plus, et ce diroi je bien et por verité ; car, se il est sage, je ne le sui mie mains et si ai plus chevaliers et gens que il n'a, et plus riches home sui que il n'est, et ausi bien saverai je doner un grant conseil que il savroit ; et plus penable home sui que il n'est. Puis que je ai tant de ces vertus com il a, dont n'est il mie drois que il soit maistre de moi outre mon gré. » A ce fu respondu diversement, quar a icé traoit a Agamenon et as autres a Palamedès, qui mout estoit doutés. Mais a celle fois n'i ot plus fait, si vient li termes des trives.

**116.** SI COME AGAMENON APAREILLA SES ESCIELLES  
POR COMBATRE.

A l'endemain dou terme que li jor aparut, si fist Agamenon ses eschielles. Achillès ot la premiere, et les autres après, si come il soloient. Ensement firent les Troïens ; les lors, si fu Hector en celle devant, et les autres après, si come il orent ordené. Les dames estoient as fenestres, qui regardoient les gens qui assembler devoient, si estoient mout païrouses. Li conroi s'assemblerent, si josta Hector a Achillès cors a cors, que pas ne s'amoient, si s'en porterent a terre. La ot estor fier et crüel, ou maint chevaliers perdirent la vie. Toutes fois furent li doi prince remontés par l'esfort de lor gens. Mais Hector, qui courouciés estoit dou cheïr, fiert et abat et trespasse la bataille tout outre, et cil qui voie ne li faisoient estoient 15 maintenant fenis. Achillès fait ce meïsmes sus les Troïens et lor vent son ire mout chierement. Il seoit sus un merveillous cheval mout noblement armé, et tant ot alé que lui et Hector s'entrecontrerent, si se corurent sus maintenant chaut et plains d'orgueil et de felonie, si se percent 20 les escus et les aubers as fers de lor lances. Si cheï Achillès a perhurter, et Hector maintenant saisi le cheval ; mais ce ne fu mie legiere chose a faire, quar maintenant fu Achillès remontés par l'esfort de sa gent et vint contre Hector et le fiert si durement de son branc sur le heaume 25 que tout le fist chanceler. Mais Hector mist la main a l'espee et le fiert tel cop sus le heaume que celui ot tout le visage ensanglanté. Si avoit tel jeu commencié entre eaulz que li uns ou li autres en covenist morir par aventure. Mais lor gens se meslerent entre auz dous, dont Hector 30 fu mout courouciez.

117. SI COME TROYLUS ET DIOMEDÈS ABATIRENT L'UN  
L'AUTRE.

Troÿlus et Diomedès s'assemblerent o toutes lor gens. La veïssiés chevaliers et chevauz ocire ; la veïssiés gens abatre et detrenchier et crier et braire, quar li doi 5 prince abatirent li un l'autre. Diomedès remonta premiers et recourt a Troÿlus tout a cheval et li done tels cols que le heaume li escartelle. Et cil fiert le destrier et l'abat mort. Or sont ambedui a pié en la bataille et se grievent mout a lor pooir. Mais toutes fois montent a mout grant poine, mais mout i ot ançois 10 mort de lor gens. La bataille est mout grans en plesours leuz et de grant peril, quar grezille ne pluie ne chiet si espesement come saietes et dars ; et li conroi estoient tous assemblés et se combatoient en plesours leus par grant ire d'une part et d'autre, et souvent gaignent et 15 perdent, si come il est usage de tel foire. Li rois Boètès vint en l'estor mout desirrant de faire chevalerie, et si eüst il fait, se Hector ne l'eüst desavancié. Si s'entrefirent des lances sur les escus, si qu'il perdirent lor helmes. Hector prist maintenant son tor et li dona dou brant sus 20 le heaume tel cop que il le fendi jusques es dens, dont li Grizois furent mout esmaiés. Et Antilogus, qui son cousin estoit, quant il le vit cheïr a terre, tout soupris d'ire, broiche son cheval sor Hector et li dona tel coup que por escu ne por le hauberc ne por le branc ne demoura 25 qu'il ne li mist par mi le costé fer et fust ; et se la lance ne fust brisee, mort l'eüst. Hector fu enferés, mais toutes voies li corru sus et li dona tel cop que il le fendi jusques au nombril, dou quel cop il fu puis mout redoutés ; et prent le cheval a la destre main, quar il avoit encores 30 celui de Boètès en la senestre, et les bailla ambedeuz a un suen escuir. Adont comencierent li Grizois a perdre place, et li Troïen les menoient a lor volenté. Mais

Achillès, lor souverains as armes, i est venus par devant les autres, si faisoit droites merveilles de son cors, et 35 coupa le teste a un des Bastars, dont il reçurent puis mains grans cols. Ceste mort comparerent trop chiër li Grizois, quar Troÿlus i sorvint, quar il semble que il les veuille trestous devorer, et n'i a nul si hardi qui a droit cop l'ose atendre. Mais une grant mescheance avint as Gri- 40 zois, quar Prothenor, le roi de Boëtes, qui estoit un des souverains Grijois, feri Hector de travers et l'abati, et quida saisir Galate. Mais son pechié l'en fist entre-metre, quar Hector courouciés et hontous estoit : tout ensi a pié le court sus l'espee en la main et le fiert 45 de tel force que ne escu ne auberc ne le pot garantir que il ne lè parfent tout, dont ce fu grant damage. Hector monta et prist le cheval, qui de grant pris estoit, et s'en revint en la bataille fel, irous et crüel, l'espee traite en la main, dont mout de chevaliers perissent. Et quant 50 Archelaus voit que il ot Prothisenor ocis, qui son oncle estoit, si ot grant duel que a poi que soi meïsme n'ocioit, ne onques par force ne par poine ne porent avoir le cors. Si se pensa mout Archelaus et en fist maintes chevaleries sor Troïens, mais a la fin lor covint le cors laisser en la 55 place, quar avoir ne le porent. Si furent Grizois par fine force chaciés jusques as tentes, si que autre chose eüssent fait, mais la nuit les despart. Les Grizois s'arestèrent a lor tentes et les Troïens s'en alerent a la ville, qui mout l'orent le jor bien fait.

**118. SI COME GRIJOIS PARLERENT DE LA MORT HECTOR.**

Quant li Grizois furent revenus a lor paveillons, sachiés que por la jornee que il orent eüe ne se tienent pas bien a seür, et chascun est mout dolens de ce que il se voient domagier; si redoutent mout Hector plus que la mort, 5



quant il se recordent de ses ouvres. Et por ce, quant il orent mangié, avant ce que il alassent couchier, furent trestous les princes mandés au tref Agamenon, si poés oïr de coi il parlerent. Agamenon lor dist : « Seignor barons, vos estes trestous de grant renomee, et vos ances- 10 sors le furent assi, ne onques l'onor que il nos laissirent ne vousistes por rien baissier, ançois l'avés tous jors acreü. Et ce est la chose que vos sur toute rien devés garder. Or avons une tele euvre comencie que, se vos n'en venés au dessus, vostre pris et vos trestuit alés a 15 noient. Et se vos ceste besoigne ne menés a bone fin, vostre renomee ne durera plus a grant honour ; le grant los que vos avés aporté jusques a ores, dont il en iert tous perdus et peris et vostre terre et vostre henor ; et vos hoirs en seront honis as tous jors mais. Mais se 20 nos che poons mener a bon chief, nus ne sauvroit retraire ne dire le grant pris ne le grant honour que nos i ave- rons. Mais la chose qui plus nos peut contralier nos covenroit avant destruire, quar bienfait henemi, pesme et crüel, avons trové en cest home. Et bien veez le lait 25 domage que il nos a hui fait, que tels trois rois nos a ocis qui mout estoient de grant renomee et de grant valor. Si en doit estre chascuns dolens et porchacier de son cors destruire, quar se il vit longement, je me dout que il ne nos face plus couroucié. Et ce est lor chastiauz 30 et lor forterece et toute lor esperance. Quar tout avant est si sages que il ne font rien se par lui non, et d'autre part il vaut tant as armes que il fait hardis tous le plus coars. Dont je croi, qui lor peüst tollir, que il n'istroient jamais hors. Et por ce vos ai je dit et mandé que nos 35 nous en metons en grant paine et en si grant esfors que nos en soions delivre. Et je croi bien que se tant de vail- lans homes que je voi ici s'en veulent entremetre, il peut-

estre aseür de sa mort prochainement. Et mesires Achil-  
 lès, qui ci est, en fist hui tant que, se sorcors li eüst poi 40  
 targié, il nos en eüst delivré. Et por ce vos recort et pri  
 que chascuns i mete son entente en tel maniere que  
 demain soit ou mors ou pris, quar grant henor avront li  
 dieuz otroié a celui qui au desus en vendra. » Sor ce  
 respondirent coumunalment que chascuns en feroit son 45  
 pooir. Li plesour en prient mout Achillès, et il respont  
 que « preïre n'i a mestier, quar se tous eüssent sa vie juree,  
 si nes peut il eschaper de moi, quar il m'a mis au cuer  
 la dolor que jamais n'en istra. Et si laisserai trestous  
 autres affaires por cestui, quar je le metrai a la mort, ou 50  
 il en fera tant de moi come de Patroclus. En cen ai mise  
 toute m'entention. » Et autretel redistrent tuit li autre.  
 Adonques partirent dou conseil et comanderent que  
 Ulixès feïst celle nuit la garde.

#### 119. COME TROÏENS FONT GRANT JOIE.

Cil de Troies sont mout asseür, si font grans festes  
 par les tors et par lor gardes. A l'endemain, si tost come  
 li jors aparut, armerent lor cors et deviserent lor conroi. 5  
 Si fu Hector le premerain qui de la ville issi, et après  
 Eneas, Troïlus, Paris, Deïphebus, si estoient cent mile  
 haubers. Et cil de l'ost font autretel. Et quant il furent  
 venus ensemble, la peüssiés veoir brisir lances et cheva-  
 liers cheoir sans relever. Si n'i a si hardi que toute paor 10  
 n'ait de perdre la vie et qu'il ne soit encombrés de soi  
 defendre, quar maint en voient morir as lances et as  
 espees et as saietes, si s'entrocient come bestes et d'une  
 part et d'autre sans merci avoir. Mar virent nee icelle  
 feme por qui est tant de sanc espandu. Si furent tuit li 15  
 conroi assemblé si mesleement que il n'i ot fete nulle  
 joste ; por coi li Grizois n'en orent nul pooir de doma-

gier Hector. Si estoit la bataille si felenesse que sans  
 nombre estoient li abatus des espees. De relever n'i a  
 point : dont je ting por fol tout le plus sage, quant si 20  
 malement s'entrocient por si poi d'ochaison. Et Agame-  
 non i fu entrepris trop malement, quar Hector li perça  
 l'escu et le hauberc et le porta dou cheval a terre ; et  
 mors ou pris i fust, se ne fust Achillès qui le secoru  
 l'espee traite en sa main, qui en feri Hector tel cop qui 25  
 le haume li fist voler de la teste. Atant vint Troÿlus  
 et Eneas sur li, qui mout le requistrent asprement ; mais  
 il se defendoit, que onques lion ne lupart ne fist ce que  
 il faisoit, quar il ocioit chevaliers et chevaus et lor fai-  
 soit merveillous damage. Que vos diroi je ? La moitié 30  
 de sa proësse n'i poroit estre retraite, quar son escu estoit  
 tous alés et son heaume li gisoit sus les espaulles par  
 pices et par quartiers. Et a tant estoit venus li jeus quar  
 Hector l'avoit saisi par le col et le traoit hors de la  
 preisse, quant Diomedès survint et fiert Eneas, si que il 35  
 l'abat dou cheval a terre durement nafré. Et puis met  
 main a l'espee et en fiert Hector, qui Achillès tenoit, tel  
 cop sus l'escu, dont il couvri sa teste por ce que il estoit  
 sans heaume, que il li fist une grant plaie. Et tout ce ne  
 fist il que il en fust granment esmaiés. Achillès li eschapa, 40  
 quar grant mestier en avoit. Hector fu a merveilles irés,  
 si court sus a Diomedès et le fiert de son brant si que il  
 l'abati dou cheval a terre. Troÿlus descendi sus lui, qui  
 mout le haoit, mais cil ressaut sus et se rendent dure  
 escremie, et d'autre part se combatent Hector et Achillès. 45

#### 120. COME CIL DE TROIE ET DE L'OST S'ASEMBLERENT.

Endementiers que ce duroit, s'assemblerent tous li  
 rois et les princes et d'une part et d'autre, si ne fu onques  
 si grans richeces de beles armes et de riches covretures

et enseignes come il i avoit. Si veüssiés l'or et l'asur et 5  
 les pierres precieuses qui estoient sus les heaumes et sur  
 les escus qui reluisoient contre le soleil. Si i ot faite  
 mainte chevalerie belle; por ce que tout l'orgueil et la  
 noblesce de l'ost et de la ville estoit assemblé. Agamenon  
 josta a Pandarus le roi, si qu'andoi voidirent les archons. 10  
 Menelaus josta a Paris et l'abati, dont il ot grant honte  
 por Elaine et por les autres dames qui le virent. Ulixès  
 josta a Adratus et le nafra par mi la bouche et l'abati.  
 Li dus d'Athenes josta a Archilogus et s'entrabatirent  
 mout felenesement. Et Polidomas fiert sur Palamedès et 15  
 li perce l'escu, mais de la selle ne le remua; et il refiert  
 lui, si qu'il l'abati tout en un mont. Li rois Stheleneus et  
 li rois Carras se requistrent par mout grant ire, si fu  
 Carras abatu, et cil li ocist son cheval et le feri en la  
 chiere. Li dus d'Athenes josta a Philimenis et li perça 20  
 son escu, et cil le nafra en la main et le porta a terre.  
 Sapredon josta a Thalamon Aÿas, que andeus s'en por-  
 terent a terre.

#### 121. COME ACHILLÈS ET THOAS SE COMBATEMENT A HECTOR.

Entre Achillès et Thoas, qui cousien estoient germain,  
 se combatirent a Hector, si que lor heaume lor estoit  
 vollés des chiés, ne onques de hours ne de sengler ne de 5  
 lion ne fu veüe si fiere ne si deseperee bataille, quar par mi  
 les mailles des aubers lor sailloit le sanc, si que toute la  
 terre en estoit vermeille. Si ot Thoas le nes copé, et si  
 les avoit Hector andeus atains que poi avoient de pooir.  
 Celi jor parut sa grant enprise, quar chascun d'eaus le 10  
 quidast avoir conquis par lui soul, quar de tel force  
 estoient que nus hons vivans ne deüst avoir contre eaus  
 duree.



**122. COME HECTOR GUARANTI PARIS DE MORT.**

Pour le roi Thalamon, qui nafrez estoit, si se retrais-  
 trent Grizois ariere et maint bon chevalier i perdirent. Si  
 fu pris li rois Thoas et l'en mena Deïphebuz en la ville.  
 Mout fu parlé de ceste bataille dedens et dehors, por ce  
 que tous les princes et les rois d'une part et d'autre  
 avoient josté cors a cors. Assés i perdirent et gagnirent,  
 quar ce est usage de guerre. Mais, ausi come il se re-  
 traoient, Paris avisa Menelaus et le fiert d'une saiete en mi  
 la cuisse, si qu'a poi ne cheï de son cheval por la dolour  
 que il sent; si issi hors de la presse et fist estanchier sa  
 plaie, et puis revint en la bataille, il et Aÿas, fier et  
 cruël por vengier soi. Et bien en eüst loisir, quar Paris  
 estoit desarmés, por ce que il les veoit departir, estoit  
 tot haut. Mais Hector, qui ot veü nafrer Menelaus et puis  
 retourner arieres, pensa bien que por autre chose ne  
 venoit que por soi vengier, si se trait d'une part. Êneas  
 avec Menelaus avoit recouvré une espee trenchant, si  
 en cuida ferir Paris, et mort l'eüst sans recouvrer, quant  
 Eneas se mist entre deus et reçut le cop sus son escu et  
 en mena Paris en la ville. Mais aveuc tout ce si l'eüst il  
 mort se Hector ne fust qui par l'esfort de son cors fist  
 Menelaus et les autres Grijois retraire, si n'i ot plus fait  
 celui jor.

**123. SI COME HECTOR RETORNA EN LA VILLE.**

Hector s'en vait en la ville sans nul conroi, quar tous  
 estoient entrés devant lui dedens, et il après les autres.  
 Et ja estoit bas vespres, si n'ala pas descendre a son palais,  
 ançois s'en vait amont et aval la ville par mi les ostés,  
 gardant et reconfortant les nafrés, et por commander que  
 il aient mires et tout cen que mestiers lor estoit. Puis  
 vient au palais meïsmes, ou l'en le desirroït a veoir, et

se desarme, que autre escuir n'i ot. Et quant il fu desarmés, si vos di bien que il ne sembloit pas home qui de joër venist, quar il estoit tous tains des armes ; en mi le front li paroient les mailles de son hauberc ; son visage estoit tout enflé et les eaus tous pleins de sanc et toute sa char perce. Et por tout ce ne sembloit il mie morne ne pensis. Et Paris, qui estoit avant venus, avoit ja parlé a dame Elaine, qui grant joie li avoit faite, et il meïsme li avoit dit comme Menelaus l'avoit abatu et il l'avoit feru auques perillousement : « Sire, fait elle, il n'a pas tort se il vous heit, et por ce a vos et a lui couvient miaux garder autre fois, quar mestiers vos en semble. » Et quant elle ot assés demouré avec Paris, si dist qu'ele iroit veoir Hector. Si s'en vont par mi la sale tout droit la ou il estoit. Et quant il l'aparçoit, si se drece contre elle et li fait grant joie et la commence mout a conjoir par parolles et li dist : « Dame, se vous veïssiés hui vos dous barons abatre et nafrer li un l'autre, grant paour en eüssiés vos, se de rien les amessiés. » — « Sire, fait elle, jè ne les voi, ne je ai por ce mains de paour, ains sui tous jors en grant doute, quar trop redout les meschaances qui a venir sont. Dieuz nos en defende, s'il li plaist ! » Adont commença a larmer.

**124.** SI COME PRIANT FIST ASSEMBLER LES PRINCES ET LOR DEMANDA QUE LE FERAIT DE ROI THOAS, QUI PRIS ESTOIT.

Endementiers manda li rois Priant por tous ses barons et lor dist : « Biaux seignors, le roi Thoas est pris, qui mout de grant renon estoit. Si nos estoit venus desirreter, et por ce veul je savoir vostre conseil, se nos l'ocirons ou en quel guise li ferons sa vie finir. » Sor ce respondi Eneas et dit : « Sire, je endroit de moi lou que il

n'ait nul mal, quar il est trop fors rois et si a mout d'amis, 10  
et si devés savoir que se aucuns de nos i fust pris, que il  
recevroit autretel. Et vos avés assés fils et amis, por coi il  
ne puet estre que se li afares dure longement, que il n'i  
ait despris, qui adonc seroit a mal port arivés, quar il  
poroit tel estre que por ceste chambre pleine d'or ne 15  
vorions nos qu'il eüst nul mal. Si vos en ai dit ce que a  
moi en semble. » Adont respondi Hector et dist : « Eneas,  
vos dites assés bien, et por ce soit ores bien gardés,  
et prochainement porois savoir ce que l'en en devra faire,  
et tous jors i porons recouvrer, quar nos ne savons pas 20  
ce que il a a venir, quar uns chevaliers est pris assés tost,  
et il n'i avra nul de si grant afaire que nos ne l'aions  
bien parcestui. Ensi nos est il tresor et raençon. » Adonc  
respondi li Rois et dit : « Saignor, je me dout que l'en  
ne le pusse torner a couardie, se ensi le faisons. Mais 25  
toutes voies je le met sor vos, que vos en faciés vostre  
pleisir, et je m'en tendra a vostre conseil. » Et ensi fu  
pris le respit. Et ne passa pas un mois que cest conseil  
fu mout loés. Et atant partirent dou conseil, si alerent  
entre Troylus et Eneas et Polidomas veoir dame Helaine 30  
et les autres dames qui estoient en la salle, ou il en avoit  
plus de septante que chascune estoit fille ou feme ou  
seror de roi. La roïne Ecuba se leva encontre les barons  
et les acueilli mout honorablement, quar bien en estoit  
aprise. Et commencirent a parler de maintes choses. Et 35  
la roïne les commença a parler de parfont sens comme  
bone dame et sage, et oreis coment.

**125. SI COM LA ROÏNE ECUBA PAROLLE A ENEAS ET A  
POLIDAMAS ET A TROYLUS.**

« Saignors, fait elle, je sai bien que dou profit mon  
seignor et de son henor et de haucier nostre corone

et de maintenir nostre droit ne vos traïtes vos pas ariere, 5  
 mais tous jors nous avés porté leiaul amor et enterine foi.  
 Or est la chose venue a tant que il nos covendra conoistre  
 qui nous amera de fin cuer. Et l'en dist tous jors que le  
 besoing est veraie espreuve des amis. Et il est ores  
 tel venus que ci peut l'en moustrer son sens et sa valor, 10  
 quar, tout soit la guerre chose de grant peril, assés i peut  
 uns vaillans hons esprover sa vertu et son honor acrois-  
 tre : por coi i paristra l'atendance et la foi que nos avons  
 en vos. Quar je sa bien que por doner un bon conseil et  
 por fornir une haute besoigne vos estes tels come il 15  
 i aïert. Et por ce a le roi grant droit, se il est del tout  
 mis sur vous. Et bien veez que cest signe est mout peril-  
 lous, si i covient grant cure et grant poine et grant por-  
 pens, quar legierement avient grans mescheances a  
 ceaus qui ne se porvoient de toutes pars. Por Dieu, faites 20  
 la ville bien garder et ne vos laissiés mie vos honors et  
 vos heritages tollir ; quar se vos faites bien, l'onor en  
 sera vostre por tous tens, et tous jors en serés plus  
 henourés et plus doutés, et vos hoirs qui le regne avront  
 après vos en ameront les nostres toute lor vie ; et se nos 25  
 les abaissons, li abaissement en seroit vostre ausi. Ores en  
 aient li dieus pitié, si que nos en aions joie, et cil en  
 soient honis ».

#### 126. COME IL RESPONDIRENT A LA ROÏNE ECUBA.

« Ha ! dame, distrent il, ceste ouvre est mout peril-  
 louse, quar la chose est alee tant avant que jamais ne  
 puet demorer que nos ou eauz n'en soient destruit et  
 vencus. Et se li dieuz le veulent, mout tost en serons au 5  
 dessus et delivres, mais a lor plaisir en sera. Non mie por  
 tant nos metrons et avons mis nos cors et nos avoirs en  
 abandon, et nos charnés amis ausint. Et sachiés que nos  
 en ferons nostre pooir sans riens laïssier. »



**127.** SI COME IL PALERENT A DAME ELAINE, QUI LOR DONA DE SES JÜAUS.

Grant piece demourerent puis en la chambre et mout parlerent a dame Helaine et la reconforterent en plesors manieres. Et elle lor fist mout biau semblant et lor dona 5 de ses riches joiaus ; mais sur toutes les autres l'ot chier Polidomas, et bien croi que plus en voudroit avoir, mais il n'est pas a sa volenté, ne parole n'en dist, ne elle a lui, dont l'en puisse retraire se cortoisie non, quar mout est grief chose a savoir les corages ne les pensees as gens. 10 Trop faillent villainement cil qui se font devinors des amors des autres : por coi je depri Nostre Saignor que tel maniere de gent puissent avant lor mort esprover semblabe jugement. Si nos souferons ores de ce, et dirons que le seneschal fist l'eve crier en la grant 15 sale.

**128.** SI COME TOUS CEAUS DE GRECE ESTOIENT EN GRANT PAOUR.

Or vos lairons de ceaus de Troies ester, et dirons de ceaus de l'ost, qui se tiennent si coi que l'en n'i oit home parler, et sont en grant doute, quar trop lor mes- 5 chiet sovent, ce lor samble. Si doutent mout Thalamon que il ne muire, et ensement pleurent le roi Thoas, qui pris est. Si n'i ot cele nuit fait nule joie, et fist si obscur et si lait tens que mil paveillons furent la nuit verseit por le grant vent et por la grant pluie. Mais pres dou 10 jor estoit, si rapaisa li tens et fu biaux et clers, si s'armerent trestuit, et cil de la ville ensement. Et viennent les uns contre les autres, les lances levees et droites, chascuns entalentés de faire chevalerie. Agamenon et Menelaus s'en issirent avant, et puis que fu la bataille, Achil- 15 lès se parti de sa gent et vint poignant sus un destrier

fort et isnel et un gleive court et gros a fer trenchant en sa main, si encontra Eupor de Larisse, qui estoit rois, qui mout estoit fort chevalier et grant. Il fiert Achillès par mi l'escu et le point issi que il li met le fer dou gleive par delés le flanc, si que poi s'en failli que il ne le mist a mort. Achillès fu pleins d'ire et de maltalent, si fiert Eupor par mi l'escu que il li mist s'enseigne par mi le cors et li fendi tout le cuer. Ensi fu mors li rois de Larise, dont li Troïen orent grant desconfort. Ensi assembla d'anbedeuz pars li estors, qui fu cruël et felon, ont tant fenissent de chevaliers que nul n'en savroit le conte dire. Si avoit en l'ost un riche roi d'Inde, Orcomenis estoit apellés, si ala joster contre Hector et brisa sa lance sur lui. Hector le fiert sus son escu, mais l'auberc ne le pot garantir que il ne li meist son brant par mi les dous costés, et l'abati mort. La ot grant bataille a la rescousse dou cors, mais li sien traistrent le cors d'entre les chevaux. A tant vient Diomedès et ala joster au roi Santipus, et le fiert en tel maniere que il li expandi la cervelle et les entrailles par dessus les archons de la selle, dont li Troïen firent trop grant duel. Et trop grant perte orent, et bien i parut a Hector que il en pesa mout, si feri un duc qui Palamedès avoit non, qui mout avoit le jor fait de chevalerie, si que il li parti l'arme dou cors. Après si vindrent a l'estor dui roi de mout grant renomee qui frere jemel estoient : li uns ot non Eptropus et li autres Sceüs, si vos dirai coment il lor avint. Quar Epretropus tenoit un gleive, si voit que Hector lor faisoit trop grant damage, si s'adresce contre lui et le fiert si durement que il li fist le sanc voller contre terre, mais de la selle ne le remue. Hector le fiert de son brant si que mort le rue en mi la preisse. Quant Setedius vit que son frere que il tant amoit estoit mors, ce ne fait pas a demander si il estoit

dolans ; si s'adrece en tele maniere envers Hector, il et 50  
tous ses homes, et li donent de grans cols d'espees, et  
l'eüssent pris ou mort, se Eneas ne fust qui le secorut,  
qui i vint a grant compaignie de chevaliers. La ot estor  
grant et merveillous, si que poi en i avoit qui seüssent  
d'iaus penre conroi. La fu Hector abatu de son cheval, 55  
que il ocistrent desous lui et il lor livra estal ; si sem-  
bloit que il fust senglier, et il fussent li chien ; si se traist  
vers li Scedius por vengier son frere et le fiert sus son  
heaume de son brant, que il en abat un grant chantel a  
terre. Et puis recouvre un autre cop et li done sus le nai- 60  
sel, que, se l'espee ne li fust tornee en la main, auques  
eüst acompli son vouloir. Hector esprent d'ire et de mau-  
talent, si s'adrece vers lui et li copa le bras destre et tout  
le costé jusques au nombril. Et cil chiet mors a terre. Et  
maintenant monta Hector par l'esfors Eneas et de sagent. 65  
Adont comença l'estor cruël et merveillous et pesme,  
quar Paris et Polidomas et Antenor, et par poi tous les  
vaillans Troïens i sorvindrent et sormenerent les Griex.  
Eneas josta a un roi, Anfiniacus, qui mout estoit reno-  
més et le rua mort a la terre. Atant vint d'autre part 70  
Menelaus, Ulixès et Agamenon, Diomedès, Aÿas et ple-  
sours princes de l'ost, chascun a tout son pooir, si que,  
par le grant esfors qui d'ambedeus pars i vint, fu la bataille  
si perillouse que maint en i ot des mors. Et par quatre  
fois ou par sis en orent li Troïen le meillor et li Grisois 75  
ausi. Si vint Achillès encontre le roi Eüframis et li copa  
la teste, dont mout pesa as Troïens, et meïsment au roi  
Priant, qui son neveu estoit. Si i perdirent mout adont  
ceaus de la ville, mais cil qui n'estoit pas lent ne coart,  
Hector, li souverains de tous, i est venus l'espee en la 80  
main, chaus et embrasés d'ire, si trova en son venir dous  
rois, Espinor et Dormus, si les mist andeus a mort.

**129.** SI COME LE ROI PITROPLEX AMENA LE SAGITAIRE  
EN LA BATAILLE.

Grant hennui seroit de raconter et de dire cen que chascun fist endroit soi, et les grans merveilles d'armes et la grant occision que il i ot d'une part et d'autre et les durs assaus que les princes faisoient ensemble et coment lor gens se traveilloient quant il veoient lor seignors entrepris. Mais dirons qu'en la ville avoit un roi de Nubie, qui merveillouse gent amena avec soi por defendre Troies et por garnir, Pitroplex avoit non, si estoit mout sages des escriptures. Et quant il oi que les Grizois tenoient si merveillousement le champ contre Troïens, si issi hors de la ville bien aveuc trois mil ferverstus, et aveuc lui amena un Sagitaire, qui mout estoit felon et horrible chose a veoir, car il estoit en forme d'ome dou nombril en amont, mais non pas mout avenant, quar il n'avoit autre vesteüre que de ses pels meïsmes, si estoit tous vellus comme une beste, et avoit forme de cheval par tout l'autre cors. La chiere avoit noire comme charbon, les eaulz reluisans come chandoille ardans, si que de mout loing le pooit l'en veoir. Et si n'i a riens el monde qui en lui esgarder ne fust tout esfreés. Un arc portoit en sa main, non mie de fust, mais de cuir boilli et de glus sodés par grant maïstere, et cent saietes de fien acier a son costé. Et dit l'en que tels manieres de bestes conversent ou parfont midi. Ensi issirent contre Grizois, que ja estoient pres de ville venus ; et les alerent ferir et lor rendirent estor fier et dur et de grant peril, quar toute la terre estoit coverte de mors. Illeuques ocist Hector Polixenart, le duc de Salemine, cousin Thalamon Aÿas. Adonques laissierent aler le Sagitaire cil qui le tenoient et li moustrent par lor signe as quels il deüst traire. Et il se trait avant criant et demenoit



grant joie, et brait si hidousement que par tout estoit oïs  
 et regardés a grant merveilles. Et mout s'en merveillent 35  
 ceaus de l'ost quant il virent cest diables qui traoit contre  
 eaus, si furent si esfreez que maintenant se traient ensus.  
 Et cil lor vait a l'encontre et lor fait estrange damage,  
 quar a soul cop en ocioit trois ou quatre, si que en poi  
 d'oure en ot mout ocis, quar de la boiche li sailloit une 40  
 escoume que il toichoit a ses saietes que maintenant estoient  
 envinemees, si que, se ceste chose durast gaires, un toust  
 seul n'en fust eschapez. Car il lor ocist le jour plus de  
 mil chevaliers et les desconfi et les traoit par mi les  
 tentes, ou il perdirent assés. Et sachiés que il estoit fin 45  
 de bataille, se ne fust une merveillouse aventure qui  
 avint.

**130.** SI COM DIOMEDES NAFRA LE SAGITAIRE, DONT IL  
 MORUT.

Li Grizois, si comme je di, se defendoient a grant  
 meschief, quar le Sagitaires n'en feroit nul que mainte-  
 nant n'en fust alés, quar nulle armeüre n'i avoit mestier, 5  
 et il aloit par tout. Si avient que Diomedès passoit par  
 devant un paveillon fuiant le Sagitaire, qui nafré l'avoit  
 d'une saiete, mais non pas a mort, dont il estoit mout  
 iriés. Ensi a cheval come il estoit s'embat par desus le  
 Sagitaire, si n'en sot quel conseil prendre quant il se vit 10  
 si entrepris, quar se il retorne ariere, bien pence que la  
 vie i poroit bien perdre et que retourner par mi les Troïens  
 li covenoit, et d'autre part il voit le dýable par devant  
 soi qui ja l'avoit choisi et commenchoit a braire et a  
 henir, si que la terre crollot sous ses piés. Et trait a lui 15  
 et li perçe l'auberc et l'escu, si que par poi que il ne  
 cheï a terre de la grant angoisse que il sent. Et quant il  
 voloit recovrer a prendre saietes, Diomedès estoit pres de

lui l'espee en la main, si li trancha andeuz les costés; et cil que estoit d'ome cheï en mi la place, et cil qui estoit 20  
cheval ala corant après grant piece, tant que il fu abatus: si leur eüst fait grant damage et desconfis les avoit, se ne fust le fil Thideüs. Adonc repristrent Grizois hardiment et chacerent lor henemis hors de lor tentes. Si avoit un roi dedens qui Filius estoit apelés, si ala joster a 25  
Achillès, si fierent andui grans cols si que andoi voiderent les archons. Mais Achillès remonta premiers et prent Galace et s'en torne maintenant, quar mout desiroit le cheval Hector a avoir. Hector s'escrie vers les siens et lor dit : « Franc chevalier, ne l'en laissiés pas 30  
mener, quar se ensi le moient quitement, jamais n'avrai joie. Or i parra que vos en ferez. » Lors broichent tuit ensemble por le cheval recouvrer, dont maint reçurent mort, et assés en fist chascuns son pooir; mais li Bastart 35  
le rendirent a son seignor, dont Achillès fu mout dolent et bien le moustra, quar il prist Antenor et l'en mena. Et quant Polidomas, son fil, le sot, si fu si dolens que tout se voloit abandoner por son pere recouvrer; mais li sage home d'une part et d'autre firent la bataille demourer, 40  
quar ja estoit pres de la mie nuit, se s'en vont les uns a la ville et les autres as tentes et as paveillons.

**131.** SI COM LES PRINCES DE GRECE AJOSTERENT UN GRANT PARLEMENT.

La nuit ajosterent les princes de Grece un grant parlement et ce fu la some de lor conseil, quar Agamenon les conforta mout, disant que « grant conseil et grant 5  
secors lor vendroit de plesours pars. Et veez quel demoustrance que les dieus nos ont fait d'un dyable horrible et hidous, que si grant bataille nos a hui rendue que tous estions desconfis, se ne fust Diomedès qui mout en a son

pris essaucié, et bien ressemble a la chiere son pere. Et 10  
d'autre part un des plus sages qui fust en Troies et par  
qui conseil il faisoient toutes lor besoignes avons nos  
pris, et sachiés que tous nos voloires nos feïst faire.  
Mais malement nos vat por le roi Thoas que il tiennent  
pris. » Sor ce respondit Achillès et dist : « Mout me 15  
seroit bel se nos por Antenor le poïssons avoir, quar trop  
avons en lui perdu. » De ce li sorent mout bon gré tous  
ceaus de l'ost. D'autre part se desconforterent mout  
ceaus de la ville por Antenor ; mais ce les reconfortoit  
mout, que il ont Thoas en prison. Après ont mout parlé 20  
dou grant Sagitaire et se plaignent mout de ce que il si  
tost l'ont perdu. Après ont mout plaint leur rois et lor  
princes qui mort estoient en la bataille, quar sis en furent  
mort celui jour. Si poés savoir que la ou il ot sis rois  
ocis, que mout i ot mort d'autre gent ; mais auques les 25  
reconforte ce que Hector a fait, que il tout seul en a  
mort set et Eneas en ocist quatre, et ce fu la quinte  
bataille.

### 132. COM IL S'ASEMBLERENT A MORTEL CHAMP.

La nuit passa et tout fust il que il eüssent mestier de  
repos, quant il virent le jor, si n'entendirent plus as  
parolles ne dehors ne dedens, ançois vinrent au mortel  
champ. Illeuques s'entreferirent premiers cils qui de 5  
greignor pris estoient. Si veïssiés espandre sanc et entrailles  
et cervelles, si s'entrocioient sans merci avoir. Et tant en  
gisoient en mi le champ que nus n'en seüst esme faire,  
si domagirent mout Grizos lor henemis celui jour. Mais  
il n'en orent mie chastel, que ce est usage de guerre que 10  
celui qui plus y gaaigne, se il raconte toutes ses pertes,  
jamais n'avra bien emploié. Ensi avint as Grizois, que se  
il destruirent Troies finaument, toute voie lor fin fu mout  
perillouse, si come nos raconterons.

**133.** SI COME ULIXÈS ET DIOMEDES ALERENT POR DEMANDER TRIVES.

Or retournerons sus nostre matiere et dirons que la bataille dura tant celui jor que la nuit les despart mout greveusement. Et li Troïens s'en retournerent en lor ville sans noise faire, taint de suör et de sanc trestos pers, et li cuirs lor estoit failliés des mains. Si sunt mout dolent de lor amis que il ont laissié frois mors en mi les chans, et bien lor semble que lor damage aproiche durement, et si faisoit il, si dolerous come vos porois oïr. En l'ost meïsme sont mout esmaïé de la perte de lor rois et de l'autre gent, et bien lor semble que fort guerriers ont trové, et voient ensement que la ville ne crient nulle rien; et tout soit il chose que Calcas les reconforte mout sovent, si voient il bien que mortel guerre les defie. Si vos dirai que ceste huiteme bataille dura uitante jors sans trive ne repos prendre. Si i ot maint dur estour, quar Hector et Achillès s'i josterent et combattirent par maintes fois au pié et a cheval cors a cors. Et tous les plus prisiés des princes de une part et d'autre, si que, avant que li termes venist des uitante jors, la terre estoit toute vermeille de lor sanc, et les aives en avoient toutes lor colours changies des charoignes qui lonc tens i avoient geü. Si estoit si grant la fleirour que mout de gent en astoient malades. Et por ce fist Agamenon ajoster tous les princes et lor dist : « Biauz seignors, vos veez bien la grant mesaise ou nos somes, et por ce avons nos mestier d'autre conseil, quar ceste pouour nos ocist et la terre est toute si joncie de mors que plus de vint jors i a que nos n'asemblames se sor mors non : por quoi il nos covient trive requerre, si que nos puissons ceste place voidier des mors. » A cen s'acorderent trestous, si i alerent Ulixès et Diomedès. Et quant il aprochierent de la ville,



nuit estoit, si troverent un chevalier de la ville qui Dolon  
 avoit non. Et quant il soit qui il estoient et l'achaison 35  
 de lor venue, si les convoia jusques au maistre palais, s'i  
 troverent assis le roi et sa compaignie, et si n'en i avoit  
 gaires qu'il ne fussent plaiés, si que bien lor paroît quelz  
 li jeuz avoit esté. Et quant il orent lor message dit et  
 demandé la trive de trois mois, li rois se conseilla a ses 40  
 barons, et tous la lorent, fors soulement Hector, qui  
 dist que il li estoit avis que trop grant trive requeroient :  
 « Et ce n'est pas nostre profit, mais por faire nos gaster  
 les biens que nos avons chaens, et toute fois nos coven-  
 dra il combattre. Que nos vaut donques ces repos ? Et si 45  
 poons savoir que il ne le font por autre chose que por  
 nos engignier, quar piecha que il n'ont en l'ost eü loisier  
 de porchassier viande et porquerre la loing, et après  
 ont il requis si lonc terme. Et ja i avront il assés de quinze  
 jors por enterrer les mors. Oïl, certes, mais lor malices 50  
 et lor engins ne conoist nus. Mais non pas portant trop  
 seroit grant orgueil se je desvoloie tout seul ce que plai-  
 roit a vos autres. » Sur ce ont dites maintes paroles  
 ainçois que la trive fust donee. Mais por ce que mout  
 estoient traveilliez tout li plesours, si fu otroiee. Et li 55  
 rois Priant la ferma de sa partie trois mois. Atant les  
 messages s'en tornerent en l'ost, et Dolon les reconvoia  
 par toute la force de la ville. Et distrent come la trive  
 estoit donee, si en firent grant joie trestous. A l'endemain  
 se leverent d'une part et d'autre et vindrent as chans et 60  
 enfoïrent et ardirent lor cors que grant piece i avoient  
 demouré. Si dura l'arcion et l'enfoïr quinze jors, ainçois  
 que il en fussent delivres. Et les rois et les princes fist  
 l'en enterrer a la maniere de lor usage solonc lor droi-  
 tures.

**134.** SI COME ANTENOR FU DELIVRÉS EN ESCHAINGE  
DOU ROI THOAS.

Quant la terre fu delivree des mors, si que li airs  
amenda et fu mout soëf, si se reposerent ciaux qui orent  
la poine. Li Troïens ne finerent d'adrecier lor murs et  
d'enforcier la ville. Si avint un jour que tuit li rois et li  
princes dehors et dedens s'assemblerent, et li rois Prians  
et tout si fil et ses barons d'une part, Agamenon et tuit  
li prince de Grece de l'autre part, por auconne chose que  
il se requistrent. Mais nule requeste que li uns feïst a  
l'autre ne fu celui jor menee au fin fors celle dou roi  
Thoas et de Antenor, qui furent quites et delivres l'un  
par l'autre. Et voirs est que Calcas, dont j'oiz autre fois  
palé cha en arieres, qui revelés estoit des Troïens,  
avoit laissié une soue fille en la ville qui Brigida  
estoit nommee, qui mout estoit bele et sage, si l'avoit  
Troïlus amee longement par amors. Calcas son pere la  
fist demander, que il le voloit avoir. Sur ce fu respondu  
en plusours manieres, et li rois Priant dist que il li plei-  
soit bien qu'ele fust rendue, quar ja chose qui apartenist  
a traïtour ne retendroit, quar trop avoit fait que desloial  
et que cruël.

**135.** SI COME ACHILLÈS ALA VEOIR HECTOR.

Achillès ala veoir Hector lui et sa compaignie, et Hector  
et les siens vindrent encontre lui, et salua li uns l'autre.  
La veïssiés de chascune part grant richeces de biaux  
chevauz et de dras de soie et d'or. Si furent sus une  
riviere li uns d'une part et li autre d'autre et se firent  
mout beau semblant selonc gens qui henemis estoient.  
Si parla premierement Achillès et dist a Hector : « Biau  
sire, voirs est que je ne vous vi onques se armé non. Et  
si demoustrés si bien vostre proësce vers moi que bien

puis dire que mavaise amor me moustrés. Et certes mes  
 armes le tesmoignent, qui sovent sont desmaillees par les  
 cos de vostre espee, que mainte fois s'est ja moillee de  
 mon sanc; si puis bien estre certain de mort, se de vos  
 ne me puis defendre, que tant se moustre vostre fellon 15  
 cuer envers moi que il me semble que vos n'aiés nul autre  
 henemi. Et mout avés doné en mon cuer grant duel de  
 Patroclus, que vos oceïstes, dou quel jamais la dolour  
 n'obliera. Il estoit la chose au monde que je plus amoie,  
 dont vos m'avés tollue la compaignie. Mais se je puis, je 20  
 vos en ferai repentir; mais ce sera a tart, quar miaux  
 ameroie estre mort que je mon pooir n'en face de lui  
 vengier. Et ce vos mousterai je bien, se nos maintenons  
 longement la guerre. Et por ce ne vos fiés en moi, quar  
 vostre lance, dont vos mon chier ami oceïstes, toicha jus- 25  
 ques a mon cuer. Por quoi je vos di que je porpence  
 chascun jor de faire vostre vie finer par mes mains, ou je  
 porte vostre mort. De ce ne poés eschaper que je ne  
 confonde le grant pooir qui en vos est; et ce sera pro-  
 chainement, se Dieuz plaist. 30

### 136. COMENT HECTOR RESPONT A ACHILLÈS.

Hetor qui mout estoit sages et amesurés, li respondi  
 tout en riant mout simplement et dit : « Sire Achillès,  
 se je sui vostre henemi, ce n'est pas de merveilles, quar  
 vos savés que de guerre ne vint pas amor. Et si devés 5  
 savoir que, quant il me sovient que vos me volez desirreter  
 et occirre, que je en sui mout dolent. Por coi je vos di  
 que ce seroit mout grant contraire se je fusse vostre amis.  
 Quar quant il me membre coment vos feïstes vostre  
 pooir de moi desirreter, dont je sui tant espris d'ire et 10  
 de mautalent, que tous li cors me tressue et trenble d'an-  
 goisse, et ne poroie dire la mesaise que je ai en mon cuer.

Mais se je puis longement vivre, assés en ferai a vos et a tout le plus fort de vostre compaignie. Et non porquant, si ai je dit come vileins, quar manacier ne partint pas a franc 15  
 cuer, et meïsmement entre nous covient user plus ouvres que parolles. Et por ce vos di je que li poins en est venus, se vos avés tant de proësce en vos come vos demoustrés ici par semblant, et se vos avés talent de vengier Patroclus que vos tant amastes, de quele amor 20  
 aucune folles gens distrent cruël vilenie, la quel chose je ne vossice por amor de vos por mil mars d'or que ce fust voirs. Mais tout ce laissons ester, et vos soiés cor-tois et vaillans et vos conbatés a moi cors a cors por la 25  
 vostre partie, et je por la moie, quar a nos dous apent li affaires. Et ensi porons saver la vie as maintes gens qui n'ont pas deservi a morir. Et por ceste achoison, se vos me poés outrer d'armes, je vos laisserai la terre et tout le reaume, et de cen vos ferai je bien seür. Et se je vos 30  
 puis outrer d'armes, autre chose ne vos demant, mais que seulement me quités ma terre sens plus. Et se moi semble que vos ce ne devés refuser, quar ensi doit uns frans hons user et vengier soi de son henemi. Et puis, se vos me conquerés en champ, tout vostre pris en sera 35  
 doublés.

**137.** COMENT ACHILLÈS VOUT OTROIER LA BATAILLE, SE NE FUST AGAMENON.

Mout ot Achillès grant vergoigne et ire des parolles que Hector li ot dites, si se traist avant maintenant pres de lui por la bataille plevir. Mais il ne le pot faire, quar 5  
 Agamenon et les autres ne le vostrent souffrir : dont il fu contre eaus mout courouciez, quar bien sachiés que devers lui n'en fust pas demouré. Et quant la nouvelle fu seüe par mi la ville que Hector se voloit combatre por



eaus, si ne veïstes onques si grant duel faire a nulle gent 10  
comme il faisoient. Mais qui qu'en fust dolens et cou-  
rouciez, li roi Prians ne s'esmaie point, por ce que il set  
mout bien en quoi il se fie; si voudroit volontiers la  
bataille, se par les Grizois ne demourast.

**138.** COMENT TROÏLUS FU MOUT CORROCIÉS, QUE  
DEPARTIR LE COVINT DE S'AMIE BELLE.

Qui que soit en joie et en leesche, Troïlus est dure-  
ment esmaïés por la requeste de la fille Calcas, quar il  
l'amoit de tout son cuer, et elle lui. Et quant elle sot 5  
que il la covenoit aler en l'ost, si commença a faire grant  
duel : « Lasse, fait elle, quel dolor doi je avoir quant il  
me covient laisser la terre ou je sui nee et la gent entre  
qui je sui norrie et aler m'ent entre gent estrange ! Haï !  
Troïlus, biaux dous amis, qui sur toutes choses m'avés 10  
amee, et je vos avoie si durement mon cuer doné que  
je ne sai coment je puisse sans vous durer ! Haï ! roi  
Priant, puis que il te plaist d'envoier moi hors de ta  
cité, ou je ai eü tous les biens et les honors, ja Dieu  
ne place que je vive jusques au jor ! Veigne la mort, 15  
quar sur toutes choses la desir. » Troïlus vint cele nuit  
a lui, si desconseilliés come celui qui cuide toute terriene  
joie perdre. Et ploient andoi mout tendrement, quar  
bien sevent que demain seront loing l'un de l'autre,  
ensi que jamais n'avront joie ne loisir de lor volenté 20  
faire. Si prist li uns de l'autre tant come il orent le  
loisir ; et disoient come a grant dolour les ont mis  
ceauz qui departir les font. Ensi a joie meslee de plour  
et entre desduit et poine si demoinent tele vie jusques a  
l'ajornement. Et quant Troïlus s'en fu alés, la damoiselle 25  
apareilla son oire et fist enmaler et trosser tout son riche  
tresor et ses dras de soie, et puis prist congïé de maint

qui mout en furent dolent. La roïne et dame Elaine et les autres dames et pucelles en plorerent mout tendrement. Et celle, qui mout estoit couroucie, s'em part de la ville a mout grant dolor, quar trop estoit esmaïee. Troïlus o grant compagnie de chevaliers la convoia, et la prist par mi le regne, come celui qui mout l'amoit. Mais or faudra icelle amor : por quoi chascun pleure durement. Mais se la pucelle est iree, ne li durera mie longement, quar mout tost avra changié son corage, et tornera s'amors envers qui onques mais ne la vit nul jor ne elle lui ; quar tele est la maniere des femes que lor doulor dure poi, et quant elle pleure a un eul, si rit elle a l'autre. Et si sont si muables par nature que mout legierement changent lor cuer<sup>s</sup>, dont l'en devroit tenir toute folle la plus senée. Quar, quant elle avra assés amé sis ans ou plus, obliera elle en un jor, quar elles ne sevent contenir en lor doulor. Encores ont femes un autre vice, quar ja tant n'avra elle mesfait de nulle laide chose que a lui semble que elle en doie estre reprise ne blasmee. Et ce est trop grant folie a non reconoistre ses defautes, et de tres grant povreté de sens muet. Qui en elles met son cuer, il engigne soi meïsme. Et de cen dist le Sage : quar qui poroit trover une fort feme, il devroit loër Nostre Saignor. Il dist : « fort », por la floibece qui est en elles, quar mout est fort celle qui se defent d'estre surprise de folie. Quar biauté de feme et chasteé ne s'acordent mie ensemble, quar riens nulle n'est tant desirree come est beauté de feme. Por coi il avient sovent que por l'enchanz des priëours en sont maintes conquises, quar devine merveille seroit se nulle s'en peüst defendre a cui l'en peüst sovent paler. Et por ce, qui la troveroit loial et belle, un angere de Paradis ne devroit estre pas tenus plus chier. Et sor toutes choses

poroit l'en assés dire, mais il n'est ores ne tens ne leus, si retournerons a nostre matiere et a nostre proposement.

**139.** SI COME LA DAMOISELLE DE SON AMI TROÏLUS A MOUT GRANT DOULOR.

La damoiselle n'atent autre chose que la mort, quant elle se voit partir de celui qu'ele soloit tant amer. Et por ce li prie mout doucement que il ne l'oblit mie, quar en 5 toute sa vie n'amera se lui non. Et cil li redit et prie que s'elle onques l'ama, que elle ores i pense : « Et de par moi vos di je vraiment qu'il n'enpirera de riens que tous jors ne vos aime de fin cuer entier, si que je ne vous changerai por nulle qui soit. » Et ce plevist li uns a l'autre. 10

Et tant le convoia Troïlus que il furent hors de la ville. Et la liverent a ceaus qui l'atendoient, qui la reçurent a mout grant joie : ce fu Diomedès, Ulixès, li rois Thalamons Aÿas ; si qu'ele ploroit si durement que nus ne la 15 pooit reconforter. Et d'autre part Troïlus s'en torne desconfortez. Et maintenant que la damoiselle fu entre ces chevaliers, Diomedès se mist de coste lui et li dist :

**140.** COMENT DIOMEDES PAROLLE A FILLE CALCAS.

« Belle suer, cil a droit se poroit prisier qui vraiment avroit vostre amor. Et je sui celui qui volentiers avroit vostre cuer en tel maniere que je fusse vostre tous les 5 jors de ma vie. Et se ne fust por ce que il est trop tost et que nos somes si pres des pavellons, et que je vos voi si esmaïe et pensive, je vos criasse merci que vos me receüssiés a vostre chevalier. Et sachiés que je ameroie miauz la mort que je a ce ne veigne ancores. Mais grant 10 paour me fait que vostre cuer ne soit aïrés vers moi et envers ciauz de nostre partie, quar je croi que vos amerés tous jors les gens entor qui vos avés esté norrie et

nee : et de ce ne vos doit nus blamer. Mais mainte fois  
avient de gens qui ne se virent onques que il s'aiment de  
tres fin cuer. Et ce vos di je por moi, qui onques ne vos 15  
vi ne n'amai par amors, et or voi què Amors m'a-tout  
doné a vos : et ce ne me semble pas merveille quant  
je remir vostre grant biauté dont vos estes enluminee.  
Et por ce veul que vos sachiez que jamais ne quier avoir  
joie devant que je soie asseür d'avoir vostre amor et que 20  
je aie de vos enterine joie. Et por Dieu vos pri que il ne vos  
soit grief ne ne me tenés por vilein de chose que je vos ai  
dite, quar vos venés en tele part ou sont tous les princes  
dou monde et tous les envosiez chevaliers, qui vostre  
amor vos requerront. Mais sachiés que se vos faites vostre 25  
ami de moi, vos n'i avrés se non honor, quar de grant  
pris doit estre celui qui est dignes d'avoir joie de vos. Et  
por ce vos pri je, ma chiere dame, que se je vos ai mon  
cuer doné et offert mon cors, que vos ne le refusés pas,  
quar tous jors mais vos serai loial ami. Et ce devés 30  
savoir bien et croire, quar maintes pucelles et maintes  
dames ai je ja veües et ai esté lor acointes, ne onques a  
nule n'en priaï de lor amors avoir en la maniere que je  
fais vos. Et sachiés que vos serés toute la deraine, que,  
se je fail a vos, jamais por nule autre n'en serai en poine. 35  
Mais je ne croi mie faillir, quar, se je puis vostre amor  
conquerre, je le garderai bien sans riens fausser, et jamais  
n'orois de moi retraire chose qui grever vos doie. Et se  
Dieu plaist, des grans sospirs et des grans plors dont je  
vos voi chargee vostre cuer enleesché sera et se recon- 40  
fortera en tel maniere dont vos recouvrerés joie et  
leesche; quar de vos servir sui tous abandonés, come  
celui qui avra grant joie, se vos me deigniés recevoir. Et  
Dieuz le veuille que ensi soit, quar celui soi travaille  
en vain, qui amast celui qui mortellement le haïroit. » 45



## 141. COMENT BRIGIDA RESPONDI A DIOMEDES.

Brigida, qui mout estoit sage, li respondi briement :  
 « Sire, fait elle, il ne seroit pas avenant que je tenisse  
 parole d'amors a ceste fois aveuc vos, quar por legiere et  
 por fole me porïés tenir as tous jors mais. Et se vos m'a- 5  
 vés dit vostre volenté, je l'ai bien entendu ; mais ne vos  
 conois mie encores bien, que je me doie dou tout aban-  
 doner a vos ne doner m'amor. Quar maintes femes sont  
 ja deceües por ceaus qui se faignent d'estre loiaus amans,  
 et par bel semblant engignent celes qui les aiment loiau- 10  
 ment, quar il est mout griez a conoistre se l'en s'i doit  
 fiër d'amors. Et maintes fois en rïent et en avient que  
 por une qui en rit sont dis qui en plorent. Et por ce, se  
 je sui a mesaise, si ai mout grant paour d'avoir pis, quar  
 qui a tant de dolour a son cuer come je ai, ne li covint 15  
 pas gramment d'amors. Et mout me ting a avillee quant  
 me remembre quel amis je lais et que je ne cuit jamais  
 recouvrer, quar il n'estoit richece au siecle dont je ne  
 fusse dame a ma volenté. Et quant je m'en voi dou tout  
 hors mise, n'est pas merveille se je ai mon cuer 20  
 dolent. Et si devés savoir que pucelle de tel pris come  
 je sui ne doit enpenre tel amor dont je deüsse estre blas-  
 mee, et meïsmement en ost. Quar, se je ai point de  
 savoir en moi, si m'en doi garder d'avoir blasme, quar  
 avient mainte fois que celes qui celeement le font dedens 25  
 lor chambre ne se puent garder que il n'en soit vileine-  
 ment parlé aucune fois. Et j'en serai ausi come en une  
 foire sans compaignie d'autre dame, si ne voudroie faire  
 chose que l'en peüst retraire a nul mal, et de ce n'ai je  
 nul corage. Mais tant vous conois de grant afaire et prouz 30  
 et enseigniés, selonc ce qu'il me semble, que je ne vous  
 voudroie faire acroire nule chose autre que vraie. Et por  
 ce vos di que il n'a au monde dame ne pucelle de si grant

biauté ne de si grant valour, se elle deüst son cuer en  
 amor metre, que elle deüst refuser. Ne je ne vos refuse 35  
 autrement, mais je n'ai ne volenté ne corage d'amer vos  
 ne autre orendroit. Et si poés estre tous certains de ce  
 que, se vers Amors me voloie atraire, je n'en avroie nul  
 plus chier de vos; mais je n'en ai pas ore volenté, ne  
 ja Dieuz ne doint que je l'en aie! » 40

**142. COMENT RESPONT DIOMEDES A BRIGIDA.**

Mout estoit sages Diomedès, si entendî bien a tout le  
 premier mout qu'ele n'estoit mie trop sauvage. Et por  
 ce li dist il tant de ce que il pensoit : « Belle, sachiez  
 sans faille que je ai mis en vos mon espoir, come celui 5  
 qui de tous tens vos amera de fien cuer. Si atendra  
 tant vostre merci que vos avrés pitié de moi; quar, puis  
 qu'Amors m'a doné a vos, je ne contrediroie pas, si serai  
 des ores mais de sa maisnie et a son servise et ne li deman-  
 derai guerredon se de vos non. Et se vos me recevés, 10  
 n'avra au monde plus riche de moi. »

**143. COME DIOMEDES TOLLI DES JÜAUS DE BRIGIDA.**

Assés en eüst dit plus Diomedès, mais ja estoit  
 pres des paveillons et des tentes. Et quant il voit qu'elle  
 ne li puet plus parler, si li cria merci cent fois et li tolli  
 un de ses jüais; si ne sembla mie que il li pesast, dont 5  
 il ot grant joie.

**144. COME CALCAS SON PERE LI VINT A L'ENCONTRE  
 ET LI FIST GRANT JOIE.**

Endementiers vint le roi Calcas son pere qui estoit  
 contre elle venus et li fist grant joie, et elle lui : « Sire,  
 fait elle, dites moi dont vient ceste merveille de vos, que 5  
 tel chose avés fait que a tous jors mais vos sera reproi-

chié, qui ensi poiés amer nos henemis qui nostre terre destruient, et avés laissié vostre païs et vostre richece et vos honors por estre en dangier de estrange gent. Coment puet estre jamais liés vostre cuer, quant vos avés esté 10 aidant de si fait euvre. Qu'est devenus vostre grant sens ? Ou est il alés ? Trop estes blamés durement et a grant droit, car saignor et maistre vos avoient fait sus tous les autres. Por coi je voi ci trop grant durté et vilté, quar mout doit l'en plus douter honte que mort, car li dons 15 de mort est comuns a trestous, et qui muert bien honorablement, li cōrs est bien eūrous et l'arme en a grant delit. Mais celui qui est honis en cest siecle en l'autre avra grant vergoigne. Sire, mout est mon cuer estroit quant je pens ce que vos avés fait et quant si faite 20 heïne vous portent les dieus d'enfer par cui si fait mal vos est avenus que grant corage vos vint de non revenir en la cité. Quoment fustes vos si cruëls que avec nos mortels henemis venistes a porchacier nostre damage ? Quoment n'alastes vos sorjorner en une de ces illes tant 25 que ceste guerre preïst fin ? Trop eūstes mauvais conseil : por coi je maudi tel savoir qui assi grant honte retorne a vos ; quar qui pert l'onor et le los dou siecle mout doit amer petit sa vie. » Et adont comença a plorer si tendrement qu'ele n'ot plus pooir de parler. 30

#### 145. COME CALCAS RESPONT.

Calcas parolle et li dist : « Belle fille, fait il, ceste destinee ne vosisse je pas avoir, quar bien sai que en sui en blasme grant venus ; mais je ne pooie faire contre la volenté des dieus, qui comandé le m'avoient. Et mout 5 m'en poise que a faire le me covient. Et se il alast a ma volenté, ceste euvre preïst autre fin, et nuls ne seit la dolour que je souffre. Mais la paour de la deviene ven-

jance le me fist faire. Et sor tout ce a la fin sai je bien que il seront destruit, si nos vient miaux eschaper que 10  
 morir aveuc euaz. Et por ce ne finoie je de penser en quel maniere je vos peüsse jeter de laiëns. Et des que je vos ai, si en est mon cuer plus a repos. »

**146. COMENT LI PRINCE DE L'OST CONFORTERENT MOUT BRIGIDA.**

Mout fu la damoiselle esgardee, et mout la loënt li Grizois entre eaz. Et Diomedès la conduit tant qu'ele descendi as paveillons son pere. Et adonc se parti d'elle a ,  
 mout grant poine. Atant vindrent li haut prince de l'ost por remirer la et por demander nouvelles. Et celle respont a trestous mout cortoisement et a poi de parolles. Et il li font trestous grant joie et le reconforterent a lor pooir. Et elle se reconforte mout en lui meïsmes, quar souvent 10  
 voit chose qui mout li plaist, si qu'ele n'avra corage jusques a quatre jors de retorner en la cité; si a si changié son corage que bien a demoustré la vanité dont li loiaus amans portent sovent travail et poine. Si retournerons sus nostre matiere. 15

**147. SI COME LA TRIVÉ FU FINEE ET IL ASSEMBLERENT A MORTEL CHAMP.**

Tant a duré la trive que mout hennuie as plesours, si fu acompli li termes qui mout fu desirrés. Et furent aasiés et garis de lor plaies et refrecis lor chevauz et lor 5  
 a mes renovelees. Et quant vint a l'endemain, sifurent lor chevauz covers et yauz meïsmes armés par la cité et par dehors. Hector s'en issi tous armés sor Galate, et avec lui dis mile compaignons; et après Troÿlus, qui en avoit en son conduit bien autant par soi o tous ceuz de Perse; Deï- 10  
 phebus et le roi Menon, et tous les autres rois et princes,



chascun selonc son ordre : si furent plus de cent mille ental-  
lentés de faire chevalerie. D'autre part fu li rois Menelaus  
tout devant, qui mout iert felon contre Troïens ; après  
Diomedès, qui grant conpaignie de chevaliers avoit. Après 15  
vint Achillès, qui avoit en sa conpaignie tieuz set mile  
chevaliers dont li pires estoit mout chevalerous. Ensi se  
partent des tentes tous les princes et les rois chascuns  
aveuc sa conpaignie, et viennent au mortel champ. Et  
grant merveille sembloit a veoir la fierté et l'orgueil de 20  
l'une part et de l'autre, si estoit si grant les batailles des  
lances et la resplendour des armes que mout se changoit  
li cuers a plus hardis. Les dames estoient par les  
torrelles et par les murs de la ville por regarder la  
bataille. Haï ! Dieus, qui adont veïst la bataille et lor 25  
cuers trembler et changier lor beles colours des dames,  
bien se merveillast quoment elles pooient durer en  
regarder si grant merveilles. Li rois de Calcidoine, qui  
Felix estoit apellés, qui mout noblement estoit armés et  
montés, et avoit sur son heaume un blanc chaperon qui 30  
par desus la crope dou cheval li batoit, feri contre Hector  
et li perça l'escu et brisa sa lance. Et il feri lui un poi  
en haut, si que par mi le gros dou pis li mist le pennoncel  
de sa lance et l'abati mort. Et quant ses homes virent ce,  
si se ferirent entre lor henemis dolens et angoissous. Si 35  
peüssiés veoir dolor de sanc espandre et de gens ocirre  
sans merci. Hector tenoit en sa main un glaive si peril-  
lous que il ne trovoit nul home par devant lui que main-  
tenant ne fust alés a fin. Si dist l'Istoire que il en ocist  
celui jor plus de mil. Li rois Sentipus, qui niens estoit 40  
Felix, quant il voit son oncle mort, si se poine de lui  
vengier, et faisoit si grant martire des Troïens que nus ne  
le poroit dire. Si quiert Hector tant que il le trova, mais  
miaux li venist que il l'eüst esloingié ; et non porquant

si le feri sor son heaume, si que dou chief li fist voler; et s'il eüst pooir de recouvrer l'autre cop, bien se fust vengiés de son oncle. Mais Hector l'a si entrepris que il ne li peut eschaper, si li coupa le chief par desus la ventaille. Ensi furent mort l'oncle et le neveu, dont Grizois furent mout desconfortez.

#### 148. COM ACHILLÈS VINT EN L'ESTOR.

Atant vint Achillès. Et sachiés que mout en furent Troïens grevés de sa venue, quar il les requiert de si pres qu'il les fist place veudier. Mais sachiés que mout li fu grief chose a faire, que nos ne trouvons en nul leuc ou il eüst si dur estor ne si aspre, quar Hector meïsmes i fu si destrois en la bataille que, se Troylus eüst plus targié, il li peüst bien mesavenir. Si furent Troïens refusés ariere grant piece. Illeuques avoit dous nobles homes, Macaon et Forbius, si estoient a Hector compaignons d'armes, dont il dut estre mout courouciés, quar a son veant mout pres de lui lor copa Acillès les testes a andous, et mout des autres i perdirent. Si i fu Hector remüés de la place par fine force. Et il estoit a merveilles irriés, quar le sanc li sailloit par mi la broine de la ventaille d'une plaie que il avoit en mi la chiere, mais nul ne sot que ce li eüst fait. Mais quant il se voit ensanglanté et chacé par force dou champ, et vit Elaine et ses serors et plus de cent autres dames qui sor les murs estoient, cil ot yre et honte mout grant, si que il fermist tout de maltalent, et retourne mout cruël et felon contre Grisois, si en encontra un riche prince qui estoit cousins germains Achillès et rois de Midiens, si li trencha le heaume et toute la ventaille et l'abati mort. Si n'orrois jamais si grant esfors come il fist tout soul. Achillès fu mout angoissous de son cousin qu'il vit mort, si cuida desavancier Hector,

et le fiert de sa lance tel cop que par poi que il ne le  
 mahaigna de la main senestre. Mais Hector refiert lui sur  
 le heaume dous cols l'un après l'autre, si que a poi que  
 il ne l'abati. Atant vint Troïlus arieres a tout son 30  
 esfort, que par fin estovoir firent Grizois remuër de la  
 place. Et d'autre part vint Menelaus, et se ne fust le roi  
 Menon, ja eüst fait ressortir Troïens arieres. La ot estor  
 fier et cruël, quar les vis chasoient les mors sans rele-  
 ver. Si estoit li estors si auques coumunal, quant Mene- 33  
 laus josta a Menon et le fiert si que il cheï a terre nafirés  
 en mi la chiere. Mais Troïlus le surprist et abati lui.  
 Si fu mout grant la meslee sor les deus rois, dont maint  
 chevaliers reçurent mort. Si estoit Menelaus pris et rete-  
 nus, se ne fust la presse des chevaux que il ne le porent 40  
 traire. Mais onques mais gens ne firent si grant esfort  
 come ses homes firent. En ceste occision et en cestui des-  
 truïment vint Diomedès et sa compaignie, qui mainte-  
 nant alerent ferir entre lor henemis, dont as uns en  
 prist bien et as autres mal. Quant cil qui abatu se veoit 45  
 en si perillous leuc et que il veoit son sanc issir de mor-  
 tel plaie, il ne peut estre que il ne maudit l'ore que il  
 issi de son paveillon. Toutes fois furent Troïens chaciés  
 plus de deus archiees, si en ot assés ocis. Diomedès ala  
 joster a Troïlus por l'amor s'amie et le tresbucha a terre. 50  
 Puis prent le destrier et le baille a un damoiseil et dist :  
 « Va t'en isnellement a paveillon Calcas de Troye et pre-  
 sente le destrier de par moi a sa fille. Et dites li que je  
 l'ai gaigné d'un chevalier qui mout se fait son ami, et  
 li dirés que por Deu ne refuse mes proieres, quar en lui 55  
 est tous mes espoirs. » Celui fist son comandement et  
 vint au paveillon et salua la demoiselle de par son sai-  
 gnor et li presenta le cheval par la regne et dit en tel  
 maniere que comandé li estoit : « Va, fait elle, et

di a ton seignor que mavaise amor me porte quant il  
 heit ceaus qui moi aiment. Mais je croi qu'il en prendra  
 restor ne passera gaires de jors, quar il n'est pas home  
 qui granment targe de son honte vengier. Va, retourne  
 arieres et salue moi ton seignor, quar je avroie grant  
 tort de lui haïr, puis que il m'aime. ».

65

**149. COMENT AGAMENON VINT EN L'ESTOR A GRANT  
 BESOING.**

Li vallès s'en est retournés au mortel estour, ou tant  
 de chevaliers perissent, quant Paris vint a l'estor a tous  
 ses archiers, si comencirent a tuer chevaliers et che-  
 vauz, si que Grizois furent desconfit jusques as paveil-  
 lons, et malement lor aloit, se Agamenon ne fust venus,  
 qui avoit avec lui bien dis mile chevaliers tous fres. Si  
 veïssiés ensanglenter et detrenchier chevaliers et destriers  
 aler vuit par mi les chans : tous les archons estoient fraint  
 et brisié. Si fussent li Troïens mis par mi les lices, se ne  
 fust Polidomas et le roi Fion. Si fu la batataille si pres  
 des murs par devant les dames, si que bien les pooient  
 conoistre : par coi Polidomas i fist assés chevalerie et  
 josta contre Diomedès mout felenoissement, si n'i ot  
 celui qui ne perdist dou sanc dou cors. Mais le cheval  
 Diomedès cheï sur lui, dont il fu mout debrisiés. Et  
 ançois que il remonstat, ot Polidomas baillié le destrier  
 a un sien escuïr et le presenta a Troÿlus.

10

15

**150. COM TROÏLUS JOSTA A ACHILLÈS ET L'ABATI.**

Achillès estoit en la bataille et les espreissoit si dure-  
 ment que nus ne pooit faire chevalerie que il ne li fust en  
 mi la chiere, si les domagoit trop doulourusement,  
 quant Troÿlus, qui estoit montés a son talent, le parçut,  
 si le fiert si durement que, se il ne fust baissiés, mort

5



l'eüst sans faille ; mais toutes fois l'abati il de son destrier  
 et fu a parhurter si navrés que a piece ne fu sain. Mais  
 maintenant resailli en piés et Troÿlus retorna sus lui et  
 li dona dou branc desus le heaume que a poi que il nen 10  
 l'ocist dou soustenir. Laassemblerent tous comunaument :  
 por coi il i ot mortel bataille et douloureux estour. Si  
 estoit Achillès pris et retenus, quant li dus d'Athenes et  
 Thalamon vindrent, qui grant poine mistrent a la res-  
 cousse, ou maint chevalier morurent a grant dolor, 15  
 mais toutes voies le traistrent hors de la presse et des  
 mains a lor henemis. Et ja estoit basses vespres, por coi  
 il lor covint departir. Que vós feroi je longues parolles ?  
 Trente jors dura cestui contens, sans nul jor prendre de  
 repos jusques au soir, si furent si travailliés que il n'i 20  
 ot nul si fort qu'il n'en fust tous las. Si i furent mort  
 deus des Bastars et Hector feru en mi la chiere, dont  
 il fu en grant peril, si que il ne pot hauberc vestier  
 d'une grant piece : dont Troïens reçurent grant perte  
 et grant damage. Et bien s'aparçurent que li esfors 25  
 Hector lor valoit mout, quar maintes fois furent descon-  
 fit. Si i avoit en cest terme d'une part et d'autre faite  
 si grant occision que tous les chans estoient covers de  
 mors. Et disoient cil qui la verité en quidoient savoir  
 que il i avoit plus de gens ocis que a l'autre fois, si 30  
 n'avoient place ou il peüssent assembler qui delivree fust.  
 Et por ce ne le porent plus endurer cil dehors por la  
 püor, et cil dedens por Hector qui nafrés estoit. Si prist  
 li rois Prians ses messages, que il envoia en l'ost por  
 trive requerre.

#### 151. COMENT LES TRIVES FURENT DONEES.

Li mesage alerent et requistrent la trive por sis mois.  
 Agamenon et tous les autres la donerent volentiers, que

grant mestier en avoient, si s'assemblerent d'une part et d'autre por enfoir et por ardoir les cors. Si alerent en 5  
furre cil qui mestier en orent. Li deus fis le Roi furent assés pleint et après ensevelis solonc lor droitures. Hector, qui nafrés estoit, si come je vos ai dit, fu mout aasiés, si i vint uns mires, le plus souverain que l'en seüst por plaie guarir. Et il mist sa cure, si qu'en trois semaines 10  
l'ot tout gari. Si devés savoir que en tant de tens come il fu malades que tous les plus proisiés de la ville le venoient veoir sovent. Madame Elaine et Polixenai sa suer se tenoient tous jors près de lui, si seroit grief chose a retrainre ne a dire coment tous et toutes metoient grant 15  
entente en lui servir. Et la chambre ou il estoit et son lit ne covient pas descrire les merveilles que il i avoit dedans tregetees par art de nigromance, que toutes estoient besoignables et choses de grant delit, et por ce me sofrera ge; quar il i avoit or et argent, et ce estoit 20  
toute la plus ville chose. Ensi come je vos dis, fu Hector tous garis dedens trois samaines. Et Paris et tous les autres s'aloient sovent esbanoier en chasses et en autres desduis. Cil de l'ost sont en grant cure ou siege qui dure si longuement, et chascuns conoist les grans despens et 25  
les grans travaux que il i metent et l'ouvre qui si est pereillouse. Si en i a de ceaus a qui il pleist : ce sont les jeunes bachelers qui desirrent a faire d'armes, mais tous li plus voudroient estre avant en lor ostels, quar ja par amors ne par force ne revendroient arieres. 30

**152. COMENT DIOMEDÈS EST EN GRANT DOLOR PAR AMORS.**

Mais qui est en joie ne en repos, Diomedès en est en tout le contraire, quar amors le travaille en tel maniere que il ne peut reposer; quar celui ne puet estre longuement en joie qui est tormentés par amors. Et ce 5

dist aucuns sages que amors est chose replenie de  
 tentative paor. Et por ce l'aloit il maintes fois veoir. Et  
 celle estoit a merveilles saige, si conoissoit bien as sos-  
 pirs et a regart que il estoit soupris, et por ce li estoit  
 elle mil tans plus dure; quar ce est naturel chose 10  
 en feme, que, se elle seit que vos l'amés, adès vos sera  
 plus orgueilleuse et mille fois ne vos regardra que ses  
 eauz ne soient plains de fierté et de desdaing, et mout  
 vendra chier le bien avant que l'en l'ait. Et ce est mout  
 contraire chose que d'amer la ou l'en est haï par sam- 15  
 blant, et grant merveille est coment ce puet estre. Et  
 assés plus fort est quant un home covient prier celui  
 ou cele qui le despice. En tel maniere prie Diomedès  
 come celui qui souffrir ne s'en puet, quar il avoit perdu  
 le mangier et le dormir. Larmes, souspirs et plours le font 20  
 sovent plorer et veillier et oblïer toute ordene de raison  
 et soi meïsmes. Et por ce la prioit aucune fois mout  
 engressement, quar par fine force seront vileïns ciaux qui  
 bien aiment, se il ont loisier de prier. Et non por quant  
 aucune fois dient-il assés mains que mestier ne lor seroit 25  
 et il se taisent de ce dire qui lor tendroit greignor leuc.  
 Et ensi fait Diomedès, qui soventes fois oblie ce que il  
 plus voudroit dire. Or avint chose que il estoit alés por  
 lui prier, et cele avoit le destrier par devant soi qui avoit  
 esté de Troïlus, si en estoit mout dolente. Et se elle 30  
 n'en quidast avoir blasme de ciaux de l'ost, volentiers li  
 renvoïast a celui de qui il avoit esté. Mais quant elle  
 celui qui présenté li avoit vit, si li dit : « Sire, trop grant  
 largesse meïne grant richesse a noient, et plesours en ont  
 esté soufratous, quar se l'autre jor, quant celui que vos 35  
 tant heés vos tolli vostre cheval, vos eüssiés cestui, il  
 vos eüst grant mestier. Mais ne faites pas mavaïns dons en  
 leuc ou l'en ne puet recouvrer si tost, et se je l'eüsse seü

si tost, je le vos eüsse envoié. Et se vos recort que ceaus de la ne sont pas enfant, et celui s'entremet de grant folie qui les cuide desirreter. Mais toutes voies vos presterai ge le cheval, puis que vos avés le vostre perdu. Mais gardé le bien, que de grant prochains sont cil de la, et celui de cui il fu n'est pas couart, quar je ne sai nul qui plus de son cors vaille. » — « Dame, fait il, je croi bien que il soit tel que vos dites, et nonporquant il n'est pas merveilles se uns chevaliers pert son cheval en la bataille : puis que il se voudra bien pener d'armes, il covient que il gaaigne et perde maintes fois. Mais je ne sui mie a grant soufraite de destriers, quar je en ai assés, vostre merci. Et nonporquant, se vos cestui me recommandés, je le garderai a mon povoir : mout sofferoie ançois que de moi le laissasse partir. Et des ores conois je bien que la grant poine que je soufre por vos jour et nuit me tornera en joie, quar vos avrés de moi merci, et je demoure en vostre esgart. Et por Dieu ne tardés trop, quar ma vie vadroit assés pis que la mort. » De ces parolles ot la pucelle grant joie, quar bien conoist que il est pris en ses las, et por ce li baille elle sa destre manche de son sorcot qui de samit tous fres estoit : dont il ot mout grant joie. Et des ores poons nos conoistre que elle est tochee de la voine dont les autres faillent sovent, si come nos avons dit ça en arieres. Si peut bien savoir Troÿlus que por noient s'atendrait a lui des ores mais en avant.

**153. QUANT LA TRIVE FU FINEE ET IL COMENCIERENT LE MORTEL ESTOR.**

Or avint chose que la trive de sis mois furent acomplis, si recomencierent lor batailles et se combatirent par doze jors que il ne se departoient jusques au soir. Si i ot



mout de gent ocis de chascune part, maismement des hautes gens. Et de ceauz qui nafrés estoient eschaperent mout poi si i ot esté cel tens si grant mortalité de gens de mort naturel, que dedens que dehors, en ot trop grant damage, si lor covient demander trives. Si manda Agamenon au roi Priant que il les donast par trente jors, et il si fist. Si furent enterrés les mors et li malade tous rasouagés. Li rois Priant prenoit sovent conseil a ses fils et a ses amis coment il se peüssent contregarder des choses qui lor peüssent nuire et de ce garnir qui lor poroit valoir. Haï las! quel aventure et quel perte lor avendra briefment et quel pesante aventure lor avendra! ne sai coment la pusse raconter ne vos entendre, que bien deüssent trestuit voloir la mort, quar tout furent destruit, que jamais puis n'orent joie. Et oreis coment il avint en ceste bataille qui après sera, que jamais tel perte ne sera ne tel damage por la mort d'un seul home. Des ores aparistront les propheties Cassandra.

#### 154. COMENT LA TRIVE FÜ FINEE.

La trive des trente jors fu passee, si s'apareilla chascuns por estre l'endemain au mortel tornoiement, qui de male hore comença. Et en celle meïsme nuit la feme Hector, qui Adromata estoit apellé, mout bone dame et sage, et avoit de son saignor dous enfans mout petis, si avint que la nuit que la trive fu finee elle vit par signe et par avision que se Hector issoit a la bataille celui jor, que il devoit certainement morir. Par ceste demoustrance sot la dame ceste destinee, si ot de son seignor grant paor, et ce ne fu pas grant merveille. Et por ce parla elle a lui et li dist : « Sire, je vos veul moustrer por quel chose je sui entree en si grant paour que par poi que li cuers ne me desment. Li dieus qui ne veulent pas vostre

mort encore m'ont moustré anuit que vos n'alés en ba- 1,  
 taille en cest jor; et se vos i alés, sachiés que jamais ne  
 retournerés arieres ». Quant Hector l'ot oï, si en fu  
 mout corouciez vers la dame, et mout li desplot ce que  
 elle ot dit, por ce que tout tient a follie. « Or voi je bien  
 certainement que en vos n'a point de savoir et trop estes 20  
 plaine de fol hardement, quant vos tel chose m'avés dite,  
 qui me racontés les fables que vos songiés, et si quidiés  
 que por ce laisse de porter mes armes. Certes, se les  
 chevaliers de ceste ville savoient que je por vostre songe  
 fusse esmaiés, ne fu onques nus hons si honis. Mais ja 25  
 ce n'avendra et jamais de ce ne me parlés, bien vos i  
 gardés, quar por vostre songe ne feroi je riens. »

**155. COMENT ADROMATA FAIT GRANT DOULOR POR  
 HECTOR QUI S'EN VOLOIT ISSIR.**

La dame comença adonc a plorer et a faire grant deul,  
 que a poi qu'elle ne pert le sens. Si mande tantost au  
 roi Priant que il le doie retenir si que il ne voise en ba- 5  
 taille, quar, se il vait, morir le covient outreement. Li  
 rois Priant fu en mout grant doute, quar mout redoute  
 le grant peril, por ce que il n'a entente s'en lui non : ce  
 est son tresor et son refui, et, se il muert, que la perte  
 en iert leur. Et non porquant il le retient, quar il seït la 10  
 dame de grant savoir, si n'en veut mie eschiver ce que  
 por bien li enseigne. Si comande le Roi a Troïlus et a  
 Paris que il s'en issent hors de la ville et a tous les  
 autres barons et princes ausi.

**156. COMENT HECTOR S'EN VOLOIT ISSIR.**

Quant Hector entendi que son pere li desfent que il  
 ne deüst issir as chans, si fu durement courouciés que a  
 poi que il laidist celle qui celui plait li a basti. Si

demande isnellement ses armes qu'ele avoit muciees. Et 5  
 quant elle le vit armer son cors, si comence a faire trop  
 grant duel et li crie merci durement; mais tout ce ne vaut  
 riens. Si fist la dame venir sa mere et sa seror, que grant  
 proieres li font tuit en lermòiant que il ne s'en issist, et  
 tout ce n'i vaut riens : « Fils, fait la mere, or voi je 10  
 bien que tu n'as cure de moi ne des autres, quant tu  
 contredis nostre volenté. Por Deu! aies de nos merci et  
 ne nos laissier, quar nos ne saveriens que devenir, se  
 nos te perdons, que chascune de nous voudroit miaus  
 estre morte que vive. » Et tout autel faisoit dame Elaine 15  
 et Polixena, qui en grant poine estoit de lui retenir.  
 Mais tout ce ne vaut riens, quar il estoit si durement  
 courouciés qu'il n'entendoit a chose que elles deïssent,  
 si heit mout et manace sa feme. Et elles voient qu'elles  
 ne le puent retenir, si pleurent et braient come feme 20  
 forsenees et ensi criant toutes deschevelees corent por son  
 petit fils, si le prent sa feme entre ses bras et vint en mi  
 le palais la ou il chaçoit ses genoillieres, et li met l'enfant  
 a ses piés et li dit : « Sire, par ceste petite creature que  
 tu engendras de ton cors, ne tenir mie a eschar ce que 25  
 je te dis. Aies pitié de lui, que seür soies que jamais ne  
 le verras, se tu assembles hui a ciaux de la, quar hui est  
 le jor que il remaindra orphenin de toi. Ne soies si crüel  
 de cuer qu'il ne te preigne pitié et ne nos laisses morir.  
 Membre toi de ton pere et de ta mere que tu vois ici, 30  
 quar il ne poront durer après ta mort. Hallas ! quel  
 pesans aventure ! » Et adont cheï pasmee sur le pavement.

**157. COMENT ADROMATA ALA PRIER LE ROI QUE IL RETENIST HECTOR.**

De chose que Hector voit ne entent ne se sople de riens, ne ne regarde vers lui n'envers l'enfant, come celui

qui plait ne tient, si voloit monter, quant sa feme sailli 5  
hors de la porte criant si haut que tous ceaus dou palais  
faisoit plorer. Si s'en vait batant ses mains droit vers le  
Roi Priant, et ne pooit parler quant elle vint devant lui.  
A chief de piece parla et dist : « Di, fait elle au Roi,  
as tu ton sens perdu que n'as cure de toi ne de tes 10  
amis ? Sachiés que se Hector a la bataille vait hui, que  
il i morra certainement. Or gardes que tu en feras, que tu  
l'as perdu, se il i vait. Mais va, sire, et le retien, se tu  
de rien l'aimes ; quar il a esté prié de sa mere et de  
toutes les autres dames, et lor proiere ne volt il riens 15  
escouter, quar il ne nos deignoit regarder. »

#### 158. COMENT LE ROI PRIANT RETINT HECTOR.

Li rois Priant, tout fust il fier et crüel encontre ses  
henemis, quant il vit la dame faire si grant duel, si li prist  
au cuer une froidor dont il fu durement esmaiés. Et  
comença a souspirer si que les larmes li vindrent as 5  
eauz, quar mout redouta son damage. Si monte et vient  
en mi la rue, ou il trova son fil mout irriez por la noise  
que les dames avoient demenee. Si estoit sous son  
heaume mout felons et courouciés, les eauz roges come  
feuc, si sembloit plus fier que lion ne lupart et estoit 10  
tous armés sus Gallatee. Priant le prist par le regne et  
dist : « Biauz fis, vos remaindrés a ceste fois, quar il le  
te covient faire, et le te comant sor quant que il y a de  
moi a toi. Et tu dois avoir en toi bien tant de sens et de  
raison que tu ne dois faire a tort ne a droit contre ma 15  
volenté. Et por ce avroï je tel seignorie sus toi que tu  
n'istras hui hors de la ville, quar bien pues oïr quel doulor  
demenent ces dames. Va, si descent, biauz fis, que a  
moi ne plaist que tu en faces plus. » Quant Hector oï  
ce, si fut tous entrepris, quar encontre la volenté ne la 20



defense son pere ne voudroit il riens faire, coment que  
il soit encontre sa volenté et encontre droit ; et d'autre  
part si crient trop la honte, si respont : « Sire, trop me  
merveil de vos, que vos vos entremetés de tel chose que  
vos creés a une folle feme, qui son songe vos a retrait ; 25  
ne ce ne vos deüst mie plaire, que je par si faite achoi-  
son demorasse, quar bien savés que je i avrai grant  
honte et vostre gent i poront avoir damage. » De chose  
que Hector die ne tient li Rois plait, ainçois li dist tant  
que il le fist retorner arieres. Mais qui adonc le veïst 30  
come il estoit fier en mi le vis, toute paor en eüst, si n'i  
avoit nul qui l'osast regarder. Ne onques desarmer ne se  
volt, fors soulement de son heaume. Et li rois Prians  
envoia a la bataille tout ceaus que il peut.

#### 159. COMENT IL ASSEMBLERENT A MORTEL CHAMP.

Cil de l'ost estoient ja mout aprimés por combatre :  
Achillès, Diomedès, Thalamon Ayas, Palamedès et tous  
les autres princes, chascun avec sa gent apareillié de gre-  
ver lor henemis. Si estoit merveilles de veïr reluire les 5  
armes et lor couvertures, et les enseignes braleer contre  
le vent ; si sembloit que ce fust une novele enprise.  
Troÿlus o les Frisans estoit tout premerains, et Diome-  
dès d'autre part, si s'entrevindrent cist dui conroi  
ensemble. La veissiés brisier lances et escus percier et 10  
derompre, chevaliers verser de lor chevaux mort et  
nafrés. Quant Diomedès vit les siens si mesler et  
Troÿlus si contenir, si point envers lui et toute la  
manche dou samit li mist par mi l'escu. Et cil ne failli  
mie, qui de son cop li osta l'escu dou col et li rompi le 15  
hauberc et li fist plaie grant et parfonde. Cil voloient  
tel jeu mentenir que tost i peüst uns d'eauz perdre la  
vie, ou andeus par aventure, quant Menelaus i vint, qui

josta au roi de Frise et l'abati. Et pris estoit, se ne fust Polidomas, qui dist a Troÿlus : « Sire, coment soffrons 20  
nos que Grizois en ont ensi dou tout le meillor ? Et le  
Roi nos a hui tollu Hector : onques mais n'oï que chevaliers  
leissast a porter armes por songe de feme, por la  
quel chose nos seromes hui recreü sans faille. Allons  
secorre le roi de Frise, que il en meinent. » Lors laissent 25  
chevaux aler et se fierent en l'estor ou il le tenoient et  
font si grant damage de lor gens, que mout s'esmaient  
tous les plus hardis. Et rescoustrent le roi que il en  
menoient par fine force pris. Adonc vint Thalamon avec  
sa gent, qui mout faisoient a douter por la vigour d'eau 30  
meïsmes et de lor seignor, si font ferir Troïens vers lor  
bataille. Thalamon fiert Polidomas et l'abat mout fele-  
nessement ; mais Troÿlus retorna sor lui et ocist et  
detranche tous cheaus qui l'apressoient, si que par vive  
force lor tolli, mais mout reçut de cous et dona : il n'ot 35  
compaignon qui n'en guencist, et il tout seul par son effort  
fist Polidomas remonter et l'osta de si estraigne leu que  
bien lor devoit demorer par droit. Atant vindrent cil de  
Perce o leur ars entesés et furent bien doze mile ; si  
nafrerent mout de Grizois. Paris, qui estoit lor cheve- 40  
taines, le fait a merveilles bien, si que Grizois i perdirent  
mout de gent.

**160. COMENT ACHILLÈS VINT A L'ESTOUR.**

Atant se trait Achillès pres de bataille, lui et sa gent,  
et quant il vit tant de gens mors en mi le champ, si prie  
les siens de bien faire. Et il baissent les enseignes et se  
fierent entre lor henemis. Et tout se defendissent il bien 5  
cil dehors et mout asprement, si lor covient il place voi-  
dier. Et Achillès en fait droite martire, si que il lor fist le  
dos torner a fine force, quar il se penoit sor toutes choses

de metre les parmi les portes. Si s'en vait Polidomas et Troÿlus, toutes fois faisant lor grant damage et desfendant 10  
 lor gens, si fu merveilles quant il tant durerent. Paris et  
 li rois d'Arese faisoient merveilles de gens ocirre a lor  
 brans, si estoient si mal mené com vos poés entendre,  
 quant li Bastart vindrent, qui se plongierent entre les  
 Grizois, si remüent par lor esfors toute la bataille et aba- 15  
 tirent Thalamon entre eaulz ; et l'avoit Margariton pris,  
 quant Achillès vint, qui le feri si que toute l'eseigne li  
 mist par mi l'escu et li fist au cors plaies grant. Mais ançois  
 que il cheïst fu il trait hors de la preisse et amené  
 en la ville. Si fu grant li plors et li cris après lui, quar 20  
 mout estoit preus et loiaus et amés de tous. Et quant Hec-  
 tor son frere le voit, si fu si dolent que par un poi que  
 li cuers ne li fent, si le reçut tous pasmés entre ses bras.  
 Hector demande qui a ce fait, et l'en li dist. Et il dist :  
 « Hai ! las, ne me devroi je occirre, quant je ne puis issir 25  
 contre ciaux qui mon lignage m'oscient ? » Lors demande  
 son destrier, et voloît monter, quant le roi son pere i vient,  
 qui a grant poine le fist demourer.

#### 161. COMENT FELIMENIS JOSTA O LE DUS D'ATHENES.

L'estor estoit mout grant devant les lices dou fossé, si  
 estoit Eneas devant venus, qui grant poine mist au pas  
 contretenir, quar cil de la ville estoient mout desconforté  
 de ce que Hector n'i estoit. Et quant Achillès le sot, ne 5  
 pris a gaire puis le remanant et Agamenon meïsme li dist :  
 « Chevauchons, sire, quar prendre et ocirre les poons  
 tous sans contredit, quar il n'avront hui Hector avec  
 eaus, et por ce en ferons nostre plaisir. » Si chevauche  
 li dus d'Athenes o toute sa gent, et li rois Felimenis contre 10  
 lui, si ne veïstes onques en si poi de gens telle mortalité  
 ne si grant come firent Poffaganois et Atheniens ensemble,

quar li uns et li autres ne savoient riens de coardiese. Si josta Felimenis o le duc d'Athenes et li fist voler quatre dens de la boiche et l'abati de son chevaul, mais son cors ne pot retenir, quar si tost fu levés de la place et porté as tentes. Agamenon vint atant, lui et sa compaignie, et se fiert entre Troïens et les moient jusques as bomes des fossés, si en i ot maint ocis et retenus ançois que il peüssent entrer ans. Si orent cil dehors toutes les lices foraines en lor pooir. Illeuques s'esvertua Troïlus qu'il n'estoit nul qui a lui se peüst tenir ne aprochier que maintenant ne fust tenu ou finis. Polidomas le fait merveillosement, et li rois Felimenis ausi, que se baignent en sanc de lor henemis. Mais ce ne lor vaut riens, quar grief chose est de rementre en champ gens desconfite, si en sont mis par mi les portes tieus vint mile qui ne font nul samblant de revenir arieres. Si se lieve li cris mout grans par mi la cité, que maintenant quident estre tous pris.

**162.** COMENT HECTOR ISSI HORS DE LA VILLE MAL GRE TOUS.

Hector escoute et entent ceste merveille et le damage et le martyre de sa gent, et voit toute la ville commeüe et que les siens sont mis par mi les portes ; si li engroissa li cuers et le sanc li monta a vis, si fu tant corouciés que nul plus. Et sachiés que nus n'osoit aprochier de lui : « Haï ! las, fait il, bien me devoit le cuer partier. » Si laischa maintenant son heaume, et adonc comencierent a plorer par la salle dame et pucelles, et disoient : « Haï ! las, quel damages que jamais ne le verrons se a grant dolor non ! » Et si monte et prent son escu. Mais Adromata sa feme demora toute pasmee en mi la salle. Et de tout ce ne sot son pere li Rois rienz, quar ja n'i fust alés. Et cil qui ne crient de nulle chose s'en vait aval les



rues. Et quant la menue gent l'aperçoivent, si orent merveilleuse joie, et il vont tuit a son encontre et l'aorent et plourent devant lui et li dïent : « Sire, sire, bien nos ont nos henemis moustré semblant que vos n'i estiés en l'estor, que si grant damage nous ont fait. »

**163.** COMENT HECTOR ASSEMBLA A CEAUS DE L'OST DE GRECE.

Hector s'en va en la bataille, mais la preisse estoit si grant de ceaus qui fuoient que a poine pooit il issir hors. Mais il de premiere venue lor ocist Erupilus qui dus d'Ariende estoit. Après encontra un autre duc de grant afaire, Exidus avoit non, si li copa li bras o toute l'espee. Adonc comença la crie mout grant, si que tout le murail de la ville en retentissoit, que bien est Hector reconeüs. Et tant fu redoutés que maintenant se resor- tirent arieres tous les plus hardis. Si avoient pris Polidomas et l'en menoient par mi la presse si grant joie faisant, et li donoient de grans cos et pesans ; mais quant il conurent Hector, qui s'ala mesler entre eaulz o le bran d'acier en la main, dont il lor cope lor testes et costés et bras, et n'i a si hardi qui atendre l'osast, si les mistrent hors dou fossé tous desconfis, ou il requïrent merveillous damage por l'esfort que Hector lor fist, et tant les menerent que il les mistrent au plain.

**164.** COMENT HECTOR NAFRA ACHILLÈS EN LA CUISSE.

Leotès estoit uns grans amiraus, cousins germains Diomedès. Hector le consiut et le fiert si qu'i li expandi la cervelle sus l'archon de la selle, dont mout se reconfortent Troïen. Quant Achillès vit les grans merveilles que Hector faisoit et que il lor tolloit trestous lor princes, si pensa que se il vivoit longuement, que tous seroient

livrez a doulor ; et por ce lascia toutes autres choses et dit que il n'entendra fors a lui et que jamais n'avroit joie se il de lui n'est delivres. Mais Hector a tant fait par son 10  
esfort que il a toute la bataille remüee et a si revigorez les siens que tous sont issu hors de la ville. Si ne vit onques nus hons si fiere mortalité, si criënt par la cité et as tentes en tel maniere que il semble que li siecles doive 15  
finer, si est tous li chans jonchiez de mors. Un riche duc i avoit, Polibetès ot non, qui de mout grant pooir estoit et bons chevaliers a devise, ne onques nus hons ne vit si bel armes come il avoit, quar son garnement estoit de fin or tout covert et de pieres precieuses. Si l'amoit mout 20  
Achillès, por ce que sa seror li devoit doner a feme, si avoit fait le jor grant damage as Troïens, come celui qui merveillous chevaliers estoit de sa main. Mais Hector le consiut et le feri de son branc, si que jusques es dens le fendi. Et quant il vit son garnement si bel, si le desirra a 25  
avoir et li voloit oster. Mais Achillès i vint, qui mout asprement le defendi, si i ot sus le cors merveillouse bataille, quar Hector et Achillès ne se feignoient mie d'ocirre l'un l'autre. Si prist Hector une espee trenchant et en feri Achillès en mi la cuisse et li fist une grant plaie. 30  
Lors se retraistrent les plesours arieres. Achillès fu a merveilles courouciés et bien le demoustra. Mais toutes voies fist il ses plaies bender d'une enseigne et retorna arieres en la bataille ensi nafrés, mout durement fellon. Si ageite Hector et dit que miaus aime morir que vivre se 35  
il ne l'ocist. La bataille estoit mout dure et perillouse, si avoit Hector abatu un roi et le tenoit par la ventaille por traire le hors de la preisse, et si estoit descovert de son escu. Et quant le culvert l'aparçoit, qui n'entendoit a autre chose, si vait droit celle part et broiche le cheval et le fiert si que li haubers ne le pot garantir que il ne 40

li espendist le fege et le polmon, et le tresbucha mort a la terre tout envers.

**165. COMENT ACHILLÈS OCIST HECTOR PAR AGAIT.**

Haÿ ! las, come estrange et pesans aventure et come doulourous jors est venu a ceauz qui ses amis sont ! Que puis ne firent Troïen autre chose ne autre demoure, mais tous s'en fuirent sans nul conroi prendre, que bel lor est 5 que l'en les ocie. Tout ensi getent escus et lances a terre et s'en vont por la mort Hector, qui desconfi les a. Et mout en sont de doulor pasmés en mi les chans, et les chacierent Grizois jusques as portes de la cité ociant et prenant a lor voloir sans nul contredit. Et cil qui escha- 10 perent se mistrent par mi les portes. Mais le roi Menon s'en torna contre Achillès et l'abati mout felenesement. Mais cil ressaut sus maintenant et le fiert son escu si que il l'abati a terre. Et le roi Menon le requiert et le feri desous son escu en mi le visage et li fist voler le heaume 15 de la teste et li ensainglanta tout le visage. Et se rendirent si fier estor que la terre ert vermeille de lor sanc. Si s'atornerent en tel maniere que l'un et l'autre en furent por mort porté de la place sus son escu. Si fu Achillès portés dedens son paveillon, et après li regarderent ses plaies, qui mout estoient perillouses ; mais 20 toutes voies virent il que il en poroit bien garir, dont il orent mout grant joie.

**166. COME TOUS CEAUS DE LA VILE DEMENERENT GRANT DEUL.**

Quant cil de Troies virent porter lor seignor mort, si commença la dolor si grant de tout le pueple, grans et petis, femes et enfans, come il veïssent tout destruire. 5 Li Rois et lis haus barons et tous les chevaliers de la

ville faisoient ce meïsmes. Les dames et les puceles le plorent toutes eschevelees et diënt : « Haï ! sire Hector, noble guerrier, qui de chevalerie avoies tous le monde pascé, et que vos nos amiez tant que vostre cors meïstes a mort por nos rescourre ! Laisses ! coment somes des-conseillies, quar tout lor voloir feront de nos li mauvais henemis ! Car la defense des autres sera des or mais si petite que jamais porte n'en sera overte. Et nos meïsmes serons menees en servage : por coi chascune doit haïr sa vie après vostre mort. » Si dura cest plor et cist cris si grant jusques a la salle. Et la fu la doulor si grant et si angoïssouse que nus ne la poroit raconter. Si i vint le roi Priant et se pasma sus lui. Si le porterent ses barons en une chambre si come por mort. Paris faisoit si grant duel que il sembloit que il se vossist ou ses deus mains ocire, et mout maudisoit l'oure que ceste bataille fu comencie et disoit : « Biauz sire amis et vaillant sur tous autres chevaliers, qui nos sera hui mais estendiors et forteresce et qui vengera nostre perte ? Haï ! las, coment nos deverïons tuit morir après la vostre mort, qui si fiere nos est ! Quar nus ne le poroit penser, la grant perte et le doulourous damage que hui reçoit nostre parenté, qui par vos estoit defendus. Et ores veons nos voie de nostre destruiement. Mais se Dieuz pleist, cil en morra par qui vos estes mors, quar moi n'en chaut se il m'avoit ocis, mais que je soie de lui vengiés. »

#### 167. COME TOUS LES PRINCES ESTOIENT SUS LE CORS.

Troÿlus, Deïphebus et tous ses freres, Eneas, Polidomas et tous les autres rois et princes et tous les chevaliers estoient sus le cors venus, si estoit la dolor si grant et le plour, et la preisse si merveïllouse que nus ne le poroit retraire, ne si faite ne si angoïssouse doulour. Alors i vint

Ecuba sa mere, Adromata sa feme, toutes ses serors et  
 dame Elaine, si angoissouse que ja ne s'en queïssent par-  
 tir, et ne se pooient soustenir, se ne fussent que les che-  
 valiers les portoient entre lor bras. Haï ! Dieuz, qui 10  
 adonc les veïst plorer, et braire et arachier lor biaux  
 cheviaus, et engratiner lor tendre visage, et cheoir pas-  
 mees de grant destrece menu et sovant, grant dolor en  
 peüst avoir : « Biaux fils, disoit la roïne sa mere,  
 quele atente porai je avoir des or mais ? Quar vos estiés 15  
 tous mes delis, et or vos ai je perdu, quar je ne croi pas  
 que vos soiés mors. Haï ! las, quel dolor que d'ovrir vos  
 iauz n'avés vos nul pooir. Et ore voi ge bien, que la  
 grant dolor et les sospirs que je avoie jor et nuit sene-  
 fioient ceste crüel mescheance. Haï ! las, come je voi la 20  
 terre vermeille desous vos, par coi je croi que vos estes  
 mors. Biaux fis, quoment puent les dieus souffrir que je  
 ne fuce devant vos quant vostre esprit parti et que vos  
 ne trepassastes entre mes bras ? Laisse, que ferai des or  
 mais au roi Priant ? Qui li pora jamais faire chose dont il 25  
 ait joie ? Drois est que nos morons trestuit après vos, et  
 que nos ne nos veons çaens penre as mauvais henemis par  
 qui vos avés la vie perdue. Et ja Dieu ne plaise que je  
 vive plus ! » Et adont cheï pasmee sur lui. Que vos  
 diroie je de Adromata sa feme ? Tant a ploré qu'ele ne 30  
 puet mot dire, et estoit si palle que miaux sembloit morte  
 que vive. Si en fu toute por morte portee en une chambre,  
 sa chiere toute despeece et ses cheviaus detrais. Dame  
 Elaine ne se feignoît pas, quar de doulor estoit palle et  
 perse devenue ; si en fist tant que mout en fu prisie, et 35  
 grant gré li sorent tous ceaus de lignage. De Polixenain  
 ne vos poroie je dire la merveille qu'eles faisoient chas-  
 cune de soi meïsmes, quar il n'i avoit roi ne prince  
 qu'eles ne feïssent plorer. Et se je voloie raconter la



verité de la doulor que chascun avoit et tous comunal- 40  
 ment, trop i avroit a faire. Mais assi grant doulor come  
 vos entendés l'en portèrent en une chambre et desar-  
 merent le cors, et l'atornerent si richement de baume et  
 de toutes choses olans que le cors deüst garder sans  
 maumetre que nus hons n'en poroit la moitié descrire. Et 45  
 après le covrirent d'un riche drap d'or et de pierres pre-  
 cieuses. Si dura celle grant doulor toute nuit, mais si  
 estoient espoënté qui n'i ot arme que celle nuit dormist,  
 ainçois furent sus les murs assi grant doulors et a si grant  
 cri que cil de l'ost l'ooient bien, dont il estoient mout 50  
 liez et avoient grant joie.

**168. COMENT AGAMENON FIST ASSEMBLER TOUS LES PRINCES DE L'OST.**

Quant celle nuit fu trespassee, le bien matin, fist Aga-  
 memenon assembler tous les princes de l'ost et lor dist :  
 « Biauz saignors, fait il, bien vait nostre besoigne et 5  
 grant bien a fait a tous nous celui que de Hector nos a  
 delivrés, si li en devons tuit merveilles gre savoir, quar  
 mout a nostre besoigne avancee et son pris sormonté,  
 quar grant besoigne avions de ceste delivrance, quar il  
 nos avoit ocis tant roi et tant prince que bien poons 10  
 savoir que se il eüst vescu un an ou deus, que tous  
 fussons a nostre fin alé, dont nos somes eschapés, ne  
 nos henemis n'avront jamais force sus nous. Or est il  
 voirs que Achillès est nafrés durement, tout soit il chose  
 que ses plaiees ne sont mie perillouses. Mais, se il 15  
 vos plaist, je ne lo mie que nos nos combatons, se il  
 n'est avant garis, ja soit chose que je ne croi mie que cil  
 dedens aient ore volenté de combatre, et a poi n'en  
 istront il jamais contre nos. Mais mandons au roi Priant  
 que il nos doigne trives par deus mois, tant que nostre 20  
 gent soient enseveli et nostre besoigne menee a point. »

## 169. COMENT IL MANDERENT A ROI PRIANT POR TRIVES.

Ensi come il le dit le firent, si envoierent lor message au Roi por la trive, que cil otroierent maintenant quant elle fu requise Si issirent hors Troïens et amasserent lor cors de lor gent, et les enfoïrent selonc lor droiture. Et mout plorerent lor seignor et l'en porterent au temple de Jovis et la le garderent quinze jors. Et entandis esgarda le roi Priant en quel leuc et coment il seroit ensevelis, si establirent que sa sepulture fust par devant la porte de Thimbee, qui estoit par devers l'ost de Grece. Etil i avoit  
10 un mout riche temple d'Apolinis. Illeuques sus le maistre autel firent un riche tabernacle et merveillous. Et desous le tabernacle ot une chaire de la quel devés croire que fu de mout grant richece. Si i mistrent le cors Hector tout en seant apoiez par derieres, et en tel guise le por-  
15 terent a la tombe. Mais quant il issi hors de la cité, lors oïssiés duel renoverer, et batent lor paumes et arachent lor cheviaux et madient l'oure que il nasquirent, quar a vis lor est que il voient la voie de lor destruiement. Et tel doulor demenant viennent au leuc ou la tombe estoit  
20 La le mistrent sus la chaire dedens la tombe en tel maniere atorné de baume et d'autre aromatisation que jusques a la fin dou siecle seroit duré, se la ville ne fust destruite. Si mistrent au chief de la tombe l'escrit de son titele qui disoit : « Ci giest Hector, le fil le roi Priant  
25 de Troyes, que Achillès, le fil le roi Peleüs, ocist. Mais trestous sachent que il ne l'ocist pas cors a cors, mais en agait. Quar chevalier ne nasqui onques qui contre lui peüst avoir duree ne qui fust de sa valor ne de son pooir as armes, ne ne quidons que jamais doive naistre. Quar,  
30 se Nature fist onques nule defaute en aucune creature, si le vost elle restorer en lui. Et por ce le fist elle tant prous et vaillant, come celle qui tout son pooir i mist. Et ce

est esprové par ses hautes ouvres, si raconterai tous les rois que il ocist de sa main, qui furent par conte dis et 35  
set rois, sans les autres grans amiraus et dus et contes dont le Livre ne fait mencion, qui plus furent de trois cens. » Et quant il l'orent enseveli, si s'en retournerent en la cité dolerous et esmaïés, chascun selonc son droit. Et estoient mout espoëntés et se tenoient mu et coi. Et ce 40  
n'estoit mie merveille, quar assés ont de quoi, quar tele perte ont receüe que jamais n'iert a nul tens recouvree. Si sont trestuit grant et petit'en plour et en sont assés malade por la tristour que il ont de lor seignor. Mais celle qui sur tous l'ama fu Adromata sa feme, que onques puis 45  
ne leva dou lit de grant tens. Et ensi furent sans avoir joie ne leesche, grant tens après, ciaus de la ville.

**170.** COME PALAMEDÈS SE PLAINT A CONSEIL OIANT TOUS LES BARONS.

En l'ost dehors sont en grant joie et mout desirrans que le terme de la trive faillist, quar mout desiroient la bataille, puis que il n'i trovoient lor guerriour. Si avint ;  
un jour que tous les princes de l'ost furent ajosté ensemble, si se complainst mout Palamedès et dist que il ne soffreroit en nule maniere d'avoir seignor sus lui ne d'estre en subjection de nul home. Et li aquant disoient que il avoit droit. Et sur ce dist il tels parolles : que il 10  
ne vit onques si faite merveille, que « vos avés fait prince sur moi sans mon assentement. Si vos di por coi ne m'est pas bel, ne droit ne me semble que Agamenon ait seignorie sus moi ne sur ma gent. Et sachiés que des or mais en avant je ne ferai riens por lui, et me poise 15  
mout de tant que je en ai fait, quar en nulle maniere je ne veul que il ait maïstere sus moi ne sus ma gent, fors cele que il avoit avant de son pere. »

**171. COMENT AGAMENON RESPONDI A CONSEIL.**

Agamenon, qui de merveillous sens estoit, respondi devant tout le barnage et dist : « Certes, biaux seignors, de ceste seignorie ne doi je pas estre blasmés de riens, quar je ne croi qu'il ait entre vos ne haut ne bas a qui 5 je aie fait por mon pooir autre que bien. Et vos qui tel envie en avés, si devés savoir que ançois que nos eüssons vostre aïde, eüme nos mestier de conseil. Si me merveil mout de vos qui devolés chose qui a tous les autres plaist. Et me membre que quant il m'esluirent a 10 lor prince, l'en ne vos post avoir, quar bien d'un an après n'i venistes vos. Et par la foi que je doi a tous mes amis, onques ce ne porchasai, et quant il le mistrent sus moi, plus m'en pesa que il ne m'en fu bel, quar il n'est nul si sage ne si penables que tout son sens et son 15 travail n'i eüst bien mestier. Mais voirs est que je ai eü seignorie jusques a hores bien et en pais, la lor merci, mais des ores en avant facent autre prince et je le veul bien, quar je ne l'ai pas de heritage ne de fié, ne en seignorie ne demant je noient sur eauz, mais que amistié et 20 compaignie, et ce que il m'avoient doné las je volentiers. Maintenant facent tel prince come il vodront, et je aiderai par tout selonc mon pooir. »

**172. COMENT AGAMENON PARLA PAR DEVANT TOUS LES PRINCES ET LE PEUPLE.**

De ce furent courouciés tout li plusors, mais toutes fois refirent assembler un grant parlement, ou tous les princes et l'autre pueple assembla. Si se leva Agamenon 5 en piés et dist : « Biaux seignors, Dieuz le set que je onques ne fui desirrous d'avoir sur tant de rois la seignourie, quar bien conois que assés en i a de plus digne de moi entre vos. Et por ce vos di je briefment que je nelle

veul plus estre, si la donrés a qui il vos pleira, et je 10  
l'otroi mout bonement, come celui qui volentiers se des-  
charge. Et seul une chose desir sans plus, que nos eüs-  
sons victoire sus nos henemis. Quar je n'ai volenté  
d'empire avoir fors de mon regne, qui miens est et sera,  
se Dieuz plaist, toute ma vie. Si poés faire vostre elec- 15  
tion quant vos plaira a toute ma bone volenté. Parolle  
des or mais qui veulle et soit oï ce que il dira ! Deuz  
veulle que de ce et de quant que nos avons a faire puis-  
sons ovrer a nostre honor et a nostre proufit et a la mort  
et a peril de nos henemis ! » 20

**173.** COMENT PALAMEDÈS FU ESLUS A PRINCE DE TOUTE  
L'OST.

Sur ce ot dite mainte parolle et doné maint divers con-  
seil. Mais Palamedès, qui mout desiroit la seignorie, se  
vanta mout en disant come il estoit riches et sages et de 5  
grant porveance, si que il s'acordent a lui et en firent  
prince sur iaus. Mais a Achillès ne plot mie cest remue-  
ment et dit que nul bien ne lor puet avenir, et par son  
voloir ne fust mie ce fait, si en a mout blasmé ceaus qui  
en ont voulu cest acort. Mais coment que il li grevast, 10  
Palamedès en ot l'empire et endementiers failli la trive.  
Si ajosterent ensemble cil de la ville le soir au parlement  
et lor sentence fu itele, que demain istront contre lor  
henemis. Si lor prie le roi Priant mout granment que  
chascuns se doie pener de vengier Hector son fil. « Et 15  
ne sai que vos die plus, fait il, mais le domage et le  
grant ire dont nos somes pleins parisse demain contre nos  
henemis, si que il ne quident que nos soions ensi plai-  
nement vencus. Et je vos di sans faille que je m'en istrai  
demain aveuc vous, si lor vendrai chierement la grant 20  
doulor que il ont mise en mon cuer, quar je ne sui pas



encores si a desous que mon escu soit guenchi vers yaus qui descrier me veullent. Mais ce ne plot mie as Troïens que le Roi alast en la bataille ; mais ensi le covient a estre, puis que il li plot. »

25

#### 174. COMENT IL ASSEMBLERENT AU CHAMP MORTEL.

A l'endemain se leverent et s'armerent mout noblement, si issi hors de la ville Deifebus premierement, et après lui Troÿlus, Paris et tous les autres. Et s'en vont vers les tentes le petit pas lor enseignes drecees contremont. D'autre part, Palamedès a ordené ses eschielles et est entallentés de bien faire et i met mout sa poine, come celui qui bien estoit apris. Si s'etranprochent les eschielles d'ambedeus pars. Si poïssiés veoir gens ocire et abatre dolourousement, si fiert li rois Prians sus Palamedès tel cop que il le porte a terre dou cheval. Et après trait l'espee et se met entre Grizois et lor vent mout l'ire que il a de son fils, si fu assés remirés de tous ceaus de la bataille, quar nul chevalier n'i avoit que celle merveille feïst de soi que il faisoit, si que d'une part et d'autre en ot le pris. Mais bones gardes avoit entor soi : ce estoient ses fis qui grant occision faisoient de lor henemis, si que lor espees estoient toutes taintes de lor sanc. Atant vint Sarpendun, le roi de Lise, a l'estor, qui mout estoit redoutés, si point contre ceauz de l'ost, si ot mout fière bataille, quar entr'iaus vint li dus d'Athenes et Nepolenus, et le roi de Rodes, qui mout valoit as armes, si i ot mainte selle voidie dont li saignor gisoient a terre sans relever, si s'encontrerent li dui roi. Nepotholenus fiert Sarpendun, se li percha l'escu et li fist les arçons vuidier, et recort sor lui et le fiert de son branc grant cop. Le roi Sarpendun le fiert, si s'esvertue et trait l'espee et fier Nepotholenus grant cop, que toute la cuisse

10

15

20

25

d'outre en outre li trenche, et cil chiet a terre nafrés a mort.

30

**175.** COMENT LI ROIS DE PERCE VINT O TOUS SES ARCHIERS A L'ESTOUR.

Mout est cruël li estor, la ou tant de chevaliers perissent douloureusement. Si i vint li rois de Perce, la qui venue fu mout redoutee por ses archiers qui tant de gens et de chevauz oscioient a lor ars que nus ne se pooit 5 tenir devant eaus. Si fu por sa venue rescos li rois Sarpendun, qui fierement avoit combatu. Mais atant vint Ayas, Menelaus, Nestor, et lor ferirent de travers, dont il furent mout grevés, quar li rois de Perce i fu ocis, 10 dont li Troïens furent durement affloibiés et esmaiés a merveilles; si fu desconfi li rois Sarpendon et nafrés durement en plesours leus, et fu chaciés jusques as lices. Et trop i eüssent perdu, se le roi Priant ne fust qui lor guenchi au pas, et avec lui plus de trois milliers de che- 15 valiers qui grant effort i firent et lor rendirent grant estor. Mais tout ce ne lor valut riens, que trop estoit grant li esfors de lor henemis, si les covint a fine force retraire au pas. Mais cil dedens les defendirent au mer- 20 veilles bien as saietes et as dars. Et mout ocistrent chevaliers et chevaus a celle enpointe, quar pluie ne grisil ne chiet si espesement come dars et saietes i volent. Si n'ioisoit arme l'eull descouvrir, quar tous li airs en estoit obscursis. Si s'en tornerent li Grizois arieres, quar li chans lor estoit demorés, mais mout i perdirent de lor gens. Si 25 fist li rois Prians tant d'armes celui jor qu'il en ot le pris d'une part et d'autre. Mais selonc ce que nos trouvons, si dura ceste bataille par maint jors.

**176. COMENT TROÏENS DEMENERENT GRANT DEUL POR LA MORT LE ROI DE PERCE.**

Quant ce ot duré grant piece, si pristrent conseil en la cité que il requerroient trives, si l'otroierent li Grizois ne sai quant jors. Si firent les mors enterrer, et mout se desconforterent Troïens por la mort dou roi de Perce, et sa gent en font merveillous duel. Haï! las, come afoiblist le pooir de Troie, que bon ami et bon conseil lier avoient en lui. Quant li cors fu aporté des chans en la ville, si ne fu onques veü plus grant duel come il firent tous, grans et petis. Le roi Menon, qui son neveu estoit, en fist merveillouse doulor et Paris sur tous ceaus de la ville. A la fin s'acorderent que il renvoieroient le cors en son païs, et ensi le firent. Si veïsssiés mout tendrement plorer au departir le roi Priant et tous ses fis et tout le barnage de la ville.

**177. COMENT AGAMENON ALA EN FURRE.**

Assés sovent avient en cest siecle que il n'est nul ne nulle qui tant ait de joie que il ne l'eit meslee d'aucune trouble pensee. Et ce avient a bon droit que la ou il a tant de pechié et d'ordure come il a en cest monde, que il i puisse avoir mout parfaite joie. Et de ce dist li sages Salemon que trestoutes les choses que il avoit trovees en cest monde estoient toutes vaines et pleines de vanité. Por coi nos poons de legier savoir et conoistre que mout aime Nostre Sire qui a son servise faire se tient por païé, quar bien est esloignés de toutes vanités celui qui est apoïz a l'esperance de la parfaite joie, a laquele Nostre Sires nos doinst parvenir por nos merites. Ce vous ai je dit por les Grizois, que il avoient par poi tous leur desirs et meillor esperance de lor henemis conquerre qu'il n'avoient devant eü ne onques mais, mais adonc lor avient

grant chierté en l'ost, que un pains i valoît un besans et la char d'un bues dis mars d'argent, si pristrent conseil de porchacier viande. Et nesai se par male volenté fu faite que il envoierent Agamenon, qui onques de riens ne s'en deigna defendre, quar de grant sens estoît, si ne voloît mie que aucuns destorber avenist en l'ost ne sordist dont lor pooirs fust abaissiés, si eslut grant planté des chevaliers et de sergens, et alerent par tout le païs et refrechierent l'ost de tous biens, si que mout fu bien faite la besoigne. Et mout plost a ciauz de l'ost. Endementiers Palamedès, qui mout estoit de grant porpens, fist rapareillier toute la navie et traitier tous les autres affaires. Et ce meïsme firent ceauz de la cité, quar il rapareillerent lor murs et lor torrelles et regarnirent lor engins et toutes les defenses parfurent, por le grant loisir que il orent.

#### 178. QUANT LE TERME FU COMPLIS.

Endementiers que il faisoient ce et que la trive duroit, si fu acompli li ans que Hector avoit esté mort. Si ne fu onques fait si riche aniversaire come son parenté fist por lui et tous ceaus de la ville. Que vous diroie-je ? Tous li pueples de la ville ploroit par devant la tombe et l'oroient come se ce fust un dieuz. Ecuba la roïne et Polixenain et dame Elaine et dames et pucelles assés i veillirent celle nuit et l'endemain assi. Et, si come je vos ai dit, trives estoient adont entre les Troïens et les Grizois, et por regarder les dames et les pucelles et por l'aniversaire veoir i estoient venus tous les plus cointes princes de l'ost. Et Achillès meïsmes i vint tous desarmés de si pres que bien l'en peüst paler. Miaus li venist que il fust demouré as paveillons, quar ançois que il fust réparés arieres, fu il si soupris de l'amor de Polixenaim que il vit ce que achoi-

son de sa mort fu, quar elle estoit si belle que tous li mons se merveilloit. Et ce fu l'achoisson par quoi il fu getés de vie, si come nos dirons après.

### 179. QUELZ EST DESTINEE D'AMORS.

Oyés fiere destinee. Ce dient li auctor que fu celle de Achillès, que par un seul regart fu si destrois d'amors Come grant mal avient par petite ochaison, et come forte chose est de Fortune! Que, quant elle comence a reposer, assés 5  
 avra elle esté douce et amiable mere, que elle li devient après marastre et cruël. Ensi avint a Achillès, que en celle hore que il regarda la façon de la pucelle fu il si enbrasé de s'amor que il l'ot trestoute painte et escrite en son cuer. Ce est son biau chief, qui de fin or porte 10  
 colour, et ses biaux iauz vairz et luisans, son poli front, la boiche vermeille et sa naturel color entremeslee de ver-  
 meillon et de blanc par naturel mesure, son menton poli plus de nul marbre a une petite focete, sa gorge blanche et tendre, et sembloit que lait donast coulor a son col. 15  
 De ses droites espalles isoient deus bras loins bien traitiés, les mains blanches, les dois lons et dongiés sor  
 quoi reluist la biauté des ongles. Graille fu par les flans et droite sur ses piés, hanches belles. Les autres beautés repostes ne font mie a demander ne a raconter 20  
 por ce que li cuers en parolle miauz que la bouche. Et il meïsme retrait quant que sur lui a, si que il ne voit ne considre rien en son regart que mortel plaie ne li face sentir. Sovent eschaufe et sovent refroide. Or  
 est venus a ce que il sentira les trais d'Amors en tel ma- 25  
 niere que il ne s'en savra conseilrier, ançois li covendra veillier et traveillier sans repos prendre, quar amor a abaissié son orgueil, si que poi li vadra son escu ne son  
 branc d'acier, quar encontre toute autre besoigne se puet



on miaus aidier que encontre force d'amor, encontre qui  
ne vaut force ne hardement de corage.

**180. COMENT POLIXENAIN ET LES AUTRES DAMES RETOURNERENT EN LA CITÉ.**

Quant Achillès ot assés regardé la pucelle, la gent se commencierent a retraire d'une part et d'autre. Les dames s'en vont vers le palais toutes irees et ploureuses por Hector qui n'estoit pas perte d'oblier. Polixenain s'en vait avec elles, et Achillès demoure pris de l'aim, qui d'amor estoit haichié, ne jamais ne se queïst mover de sa place tant come il la peut vëoir, si s'en torne a mout mate chiere et ne faisoit un pas avant que il ne se retournast por remirer sa place ou il avoit la damoiselle veüe et por l'atentive pensee est il si remüez de son estre que il ne voit ne n'entent rien ne chose que dite li soit.

**181. COMENT ACHILLÈS SE PLEINT PAR AMORS.**

Ensi deheitié come vos poés entendre s'en est venus Achillès et couchiez dedens son paveillon, et n'a nul si privé qui mansist avec lui en son paveillon, et se pleint et dolose forment, quar mout li semble cesti fait grevable, se il n'a d'autre part qui a porter li aide. Mais ne set penser a ce qui l'aït, car il ne heent riens autant come il font lui, et a bon droit : « Haï ! las, fait il, de male heure alai ces gens veoir, quar je dout que je n'en perde toute joie. Mais de ce n'en puis je reprendre se moi non ; quar, se je en reprenoie celui par qui il m'avint, je avroie grant tort, quar les autres le remirerent assés a qui il n'en fu rien. Trop m'a hui Amor trové prest que je me sui mis en sa subjection, por quoi il m'a si lacié et pris que je ne li puis eschaper. Or crierai je donques merci. Mais a qui ? A celle que je ne verrai par aventure jamais ? Haï ! sire

Deuz, se je ne quidoie que je ne vesquisse mie longement, bien sai ge que elle est ma mortel henemie, mais ausi poroit elle estre m'amie, quar mout est faite a ma devise. Aï ! las, je moi deschoif a mon encient, quar  
 20 je sui tout certain qu'elle voudroit mon damage. Or sui je entrepris trop laidement, quant je aime celle qui me heit. Et nequedent je voudroie bien qu'ele seüst mon courage, coment je l'aim et coment je l'ais torné vers lui, et ce me seroit grant confort. Mais quant je porpens le  
 25 grant duel que je ai mis en son cuer de son frere Hector, dont je ne truis qu'elle me puisse amer. Et ce est la chose qui m'ocira, quar, se longue soufrance i peüst avoir mestier, auques me conforteroie, mais je ne puis entendre que jamais riens i conquere. Aïllas ! c'onques mais  
 30 nuls hons n'ama en tel maniere ! Donques sui je hors de mon sens, quar je ne sai que faire, se Amors me destraint auques, je sui mors oultreement. Il me semble que je soie Narcisus, qui tant ama son ombre qu'il en morut sur la fontaine, puis que il ne pot avoir sa volenté de la  
 35 tres grant beauté que il veoit en soi. Or voi je bien que il me covient morir ne autre conseil n'en porai trover. Et nequedent je devroie porveoir et savoir se nul conseil i avroit mestier. Mais a ce covendroit grant loisir que le pooir de souffrir en eüst. Mais je poroie bien tant atendre  
 40 que poi me vaudroit mon socors, quar les maladies sont plus de legier curees au commencement que quant elles sont esracinees. Et ceste poine m'est trop grief au souffrir; por coi je savroie volentiers quelz en sera la fin, quar en poi de tens sui je si conquis que je pens que ma  
 45 joie est ici toute finée, ou il seront acomplis tous mes desirs. Mais desesperance me confont; por coi je prie a tous les dieuz que il me donent prendre tel conseil por coi ma dame ait de moi merci. »

**182. COMENT ACHILLÈS ENVOIA UN MESSAGE A LA ROÏNE ECUBA.**

Après ce que il ot ensi consideré en soi meïsme, il fist venir par devant lui un sien feel que il avoit norri grant tens, puis li descovri son secré et li dist ensi : « Tu t'en iras a Troies a la roïne Ecuba, la feme dou roi Priant, et la salue de par moi et li diras que mout me tarde que je ne soie acordés a lui, quar por pechié ai trop mespris vers lui et que mout m'en poise dou dolourous damage que je li ai fait de son fils Hector, de la quel chose jesui prest que jè li en face droit tel come elle savra deviser. Et se elle sa fille me veut doner a feme par l'otroi dou roi Priant et de Paris, je m'en irai en ma terre o toute ma gent, ne ja puis n'i avra si hardi en tout l'ost de Grece qui après moi i demoure, et ensi apparistra et demenra lor païs en bone pais. Or voient bien que il ont encontré riche pleit, se en lor ne remaint, car ja ne troveront qui plus les aime de moi. Et lor fille sera si richement mariee comme celle qui sera roïne avec moi et coronee de tout mon roiaume. Et je meïsmes seroie li plus riches dou monde, come celui qui autre chose ne voudroit. Commandés orendroit et comenciés vostre ouvre; que Dieus vous en doinst a bone fin venir, quar mout me tarde que vos soiés revenus. »

**183. COMENT LE MESSAGE PARLA A LA ROÏNE ECUBA.**

Li message s'en torne atant et s'en vait droit en la cité priveement. Et si come sages et bien norris entra dedens la chambre la roïne et la salue de par son seignor priveement et li dist son message. Après li dit : « Dame, or paristra vostre grant savoir, quar vos avés maintenant pooir de faire vostre ami dou plus mortel henemi que vos aiés, et qui vos veut restorer le grant damage que

vos avés et garder vos que plus ne vous en vieigne ;  
 quar se il prent vostre fille a feme, il la tendra a grant 10  
 henor, et vostre roigne remaindra en pais, si que jamais  
 ne troverés qui de guerroier s'entremete. Quar, puis que  
 mes sires s'en ira, nus n'i osera demourer après lui. Or  
 en pensés hastievement, si come de vostre gent profit et  
 por sauver vos vies et vos heritages. » 15

**184. COMENT LA ROÏNE ECUBA RESPONDI A MESSAGE.**

La roïne, qui sage estoit merveillousement, respondi  
 au message en tel maniere : « Biaux amis, grant chose  
 est ce que tu dis et demandes, non pas por ce tant que,  
 se je le puis trover vers mon seignor le roi, je le voudra 5  
 volentiers. Revien a moi de hui en tiers jors, adonc te  
 saverai je a dire sa volenté. Et di a ton sire de par moi  
 que por moi ne remaindra il mie, tout soit il chose que  
 il ait ma vie mise en si grant dolor que je amasse miaux  
 la mort que vivre après si faite angoisse come je sent 10  
 jor et nuit, quar a desmesure sui je por li grevee, mais  
 ce ne pooit autrement avenir. Encores m'iroit il auques  
 bien selonc les grans mescheances. Va t'en et si revien  
 au jor, et selonc ce que je troverai au roi et a Paris te  
 savrai a dire la responce. Et mout me plaira, se il le 15  
 veulent »

**185. COMENT LE MESSAGE RETORNA A ACHILLÈS ET LI DEVISA CE QU'ELE AVOIT DIT.**

Li mesage oï le respons, et la roïne li devisa le terme  
 et il se mist maintenant a la voie, si que nus ne s'en  
 parçuit. Et fu revenus a son seignor, qui en grant error 5  
 estoit. Et maintenant que il le vit, si li sailli a l'encontre  
 et li demanda nouvelles. Et celui li a tout retrait le res-  
 pons a la roïne et li devisa le terme, et que, se le roi

Priant le veut, la besoigne est achivee de ceste chose. Ceste chose plot mout a Achillès et tant li plot que tous li cuers li revient : « Or voi je bien, fait il, que li dieus font vertu, quant je troverai aucun conseil de la chose que je plus desir, quar, se je a ce ne venisse, adont fust ma joie finee. » Or vos lairons d'Achillès et retournerons a la roïne Ecuba.

**186. COMENT LA ROÏNE ECUBA PARLA AU ROI PRIANT.**

Après ce que li messages se fu partis de la roïne, elle s'en ala l'endemain en une chambre ou son seignor le roi Priant estoit tout seul et s'asist et li dist : « Sire, mout grant semblant de haïne nos mostrent li dieus chascun jor, quar nostre valour et nostre grant barnage decline chascun jor et tout adès, quar nos fils et nos rois et nos dus et nostre gent perdons a cens et a milliers, quar puis que nostre fis Hector, ou estoit toute nostre esperance, avons perdu, mout est ceste ouvre perillouse. Por ce en feroit bon conseil prendre, se il fust qui le seüst doner. Voirs est que Achillès a fait parler a moi priveement et demande Polixenaim a feme et dit que il la fera coroner de son roiaume. Et le jor que il en sera saisis de lui fera departir le siege, et tous nos henemis s'en iront en lor terres. Et je sai bien que je n'ai mie grant volenté, mais por le peril en coi nos somes et nostre gent et nostre ville, si feroit bon prendre conseil et rescorre cel plait ; quar de si grant meschief se feroit bon eschiver, et grant pechié est de la noble gent de nostre païs qui muerent chascun jor a si faite dolor. Et tant de peril i vois de toute pars que bon esgart i avroit grant mestier. »



## 187. COMMENT LE ROI PRIANT RESPONDI A LA ROÏNE.

Quant le roi Priant ot entendu ce que la roïne sa feme li ot dit, et il baisse le chief et se tint une grant piece tout coi et puis respont a la roïne et dit : « Dame, je ne puis vëoir ne conoistre quoment ce poïst avenir; car se Achillès fust nostre ami si come il est le contraire, si n'est il pas nostre per ne de nostre lignage : dont il me peseroit trop se de par moi nostre lignage et nostre hautece abaissoit de rienz. Et se il en estoit orendroit saisis, quele seürté avrions nos d'iauz ne de lui que il feïst le siege departir. Trop seroit grant honte se nos estions ores deceüs par l'ome dou monde que nos devrions plus haïr. Et maint en a contre nos de plus grant pooir qu'il n'est, qui a ennui se departiroient por celui por qui il ne fussent ja venus. Mais nequident, se il pooit faire que les Grizois se retournassent en lor païs, de lui et de nos seroit il pais, et le ferons seür de nostre fille avoir sa volenté. »

## 188. COMMENT LE MESSAGE A ACHILLÈS RETORNA A LA ROÏNE PARLER.

Quant la chose fu ensi asise qui chierement fu puis achatee, avant que li jors fu esclarci, fu revenus li message au jor nommé. Et bien paru que li termes fu a merveilles desirrés. Il vint dedens la chambre de la roïne, ou il trova sa belle fille et la salua cent fois de par son seignor et li dit que il se done en son pooir lui et sa terre et quant que il peut faire. Mais n'ot loisir de longue parole dire, quar la roïne estoit devant eaus. Et la pucelle ne tient autre plait et ne fist mie samblant que bel li soit ne que de riens l'en pesast.

**189. COMENT LA ROÏNE RESPONT AU MESSAGE.**

Quant la roïne voit le message qui est revenus, si li dit toute la responce au roi Priant, et por ce que la chose estoit mout grant, li comanda elle que fust bien celee. Li message prist congié et s'en revint a son seignor qui mout estoit soupris et changiés de son sens por Amors, qui de ses tors li mostroit. Car ce doivent savoir tous ceauz qui por amors aiment, que nus qui d'Amors soit soupris ne li puet de riens contrestre, quar il en fait les uns dolens et les autres liés, mais les plesours fait jeüner et veillier en maintes guises por estre ententis a la chose qui plus li plaist. Et por ce que le cuer est le plus noble membre dou cors et qui porte les plus grans fais de la pensee, covient que il change et mue en tristece et en joie : por coi il covient que tous li cors en soit changiez. Ensi est celui qui aime en cruël bataille aucone fois, quar mout est sages cil qui se puet d'Amors defendre ; mais il ne puet, car l'en aime por regart, aucune fois por crieme ou par gelosie, si que ce il aucune fois point de son lit, si est il mellés a aucune maniere de travail et ce est le guerredon que li plesours en ont. Et de cels est Achillès, qui ce pleure et demente en tel maniere come vos orés.

**190. COMENT ACHILLÈS SE PLEINT POR L'AMOR DE POLIXENAIM.**

« Haï ! las, » fait il, « quez mesaventure peut ce estre que je sui si soupris que je ne voi ne entens chose qui soit a mon gre, et voi que mon sens est tornés en grant folie, puis que je voi que mon cuer est assis la dont je n'avroie jamais nulles de mes vollentés ! Onques, puisque li siecles comença, n'ama nul home plus folement. Et puis que je conois ma folie toute aperte, donques ensi veus je

meïsme mon mal a ensient. Que me vaut donques harde- 10  
ment et chevalerie? Ne sens n'a ci point de leuc. Fu il  
onques nul sages contre Amors? Cene fu pas le roi David, ne  
le souverain Salemon. Li fors Sansons meïsmes ne li pot  
onques contrestre a toute sa force. Et puis que nos  
ancessours, qui furent si tres sages, n'orent pooir contre 15  
Amors, qu'en puis je donques mais, se j'en sui devoiés,  
quar je ne voi nul sens contre Amors. Or n'i a mais autre  
conseil que de l'atendre et porchacier adès d'acomplir ma  
volenté, que que avenir m'en doie. Et en ce paristra ma  
doulor, quar riens ne me vaudroit se tout le monde eüsse 20  
sa joie et que ne l'eüsse. Et puis que mon cuer le desire  
tant, il fault que j'an preigne l'avanture quoy que il m'en  
doive avenir. Et se je puis tant faire que je aie l'amor de  
celle qui miaux ressemble esperitel chose que terrine et  
qui est mireor de toutes beautés, donques seroie je de 25  
tout le monde le plus riches. Et por ce prierai je a Amors  
qu'elle me secorre en tel maniere come elle a ja fait a  
maint qui loiaument l'ont servie, et qu'elle ne perde en  
moi sa coustume. »

**191.** COMENT LE MESSAGE PARLE A ACHILLÈS POR SA  
BESOINGNE.

Ensi destrois et ententif en pensee d'amors demora et  
attendi tant Achillès que son message repaira. Et quant  
il le vit venir, si ot paour et joie toute ensemble, quar 5  
c'est maniere d'ome qui par amors aime. Et maintenant  
li enquist de le besoigne. Et cil li en dist toute la verité  
et le covenant, et la requeste que li rois Priant li fait. Or  
pensés sens plus que li ost s'en voise, quar en autre  
maniere n'en serés vous saisis de la pucele. » 10

**192.** COMENT ACHILLÈS OT GRANT JOIE DE LA RESPONCE QUE IL OT.

Quant Achillès entendit ce, si ot joie et penser tout ensemble. Joie ot il, quar le covenant li pleist sur toutes choses ; mais grief chose li semble a acomplir ce que il lor a offert. Et non por quant demain sans autre delai se metra a l'esai. Mais avant que le jor venist, trait assés poine et doulor, come celui qui de toute la nuitne dormi ne ne reposa point.

**193.** COMENT ACHILLÈS FIST ASSEMBLER TOUS LES PRINCES DE L'OST.

Quant ce vint au jor, il ordena coment li concilles fust ordenés et assemblés, et il s'i fu maintenant. Si i ot rois et dus et contes et toute la flor de l'ost. Adonc se leva Achillès en piés, qui bien fu oïs et entendus, quar henourés et cremus et essauciés estoit sur tous les autres por sa chevalerie et par son sens.

**194.** COMENT ACHILLÈS PARLA DEVANT TOUS LES PRINCES.

« Saignor », fait il, « je vos veul moustrer que por grant outrage et par grand orgueil avons nos ceste cité assise, dont il sont mort tant de nos gens que a poines en poroit nuls le nombre dire. Et de ce ne vos merveilliés vos mie, quar a ce nos covendra trestos revertier, se la besoigne est ensi maintenue. Et trop me semble que grant folie avons enprise, que por l'achoisson d'une feme avons chascuns laissié son païs si longement, ne encores n'avons riens fait de nostre henor, ançois demorons ici tout le plus dou tens a grant angoisse et a grant poine, dont je me merveill durement de si sage gent come il a ici, que il n'i preignent garde ne autre conseil. Por quoi il m'est

avis que il ne voient pas ce que je voi : ce est por coi  
 vient l'achoisson de notre grant destruiement qui est si mau- 15  
 vais, quar de toutes pars sommes ci assemblés a recevoir  
 mort. Certes onques mais en si saige gent ne fu telle folie  
 trovee. Biaux saignors, ja devons nos savoir que li Grizois  
 en amenerent Exiona, la suer le roi Priant de Troie, laquelle  
 il nos fist tant puis demander. Et se Paris i prist puis 20  
 Elaine, quel honte ou quel damage i peut avoir nostre li-  
 gnage ? Et nous mèismes, que tant de riches gens et de  
 nobles i avons perdus por noient, sachiés, biaux seignors,  
 que mout nos tendrons a deceüs, quant nos reconoistrans 25  
 nostre folie. Por coi je vos di que, se mon esgart en sera  
 creüs, nos laisserons atant nostre desverie, qui fu enprise  
 por mauvais conseil, et retournerons en nostre país, et  
 remarierons nos serors et nos parentés, et rapareillerons  
 nos roiaumes et nos terres, qui grant mestier en ont de 30  
 nostre retor. Et je vos di que endroit de moi je ne croi  
 mie que de ces esprouves jamais puissons venir a desus.  
 Et por ce, se nous avons foloié jusques a ci, si l'amendons.  
 Et veés ci Achillès, qui jamais ne s'en armera. Et trop  
 puet trover le roi Menelaus autres femes assés de grant 35  
 valor, si en preigne une et laisse ester ceste grant folie. Et  
 ce m'est avis que il le covendra faire au derain. Et sachiés  
 de voir que autres de moi la conquerra des ores en  
 avant. »

**195. COMENT LE ROI THOAS RESPONDI CONTRE ACHIL-  
 LÈS.**

Sor ces parolles tout le premerain qui respondi, ce fu  
 li rois Thoas et dist : « Sire Achillès, il me semble que  
 vos ne dites mie bien, quar tant de valour a eü en vostre 5  
 cuer, et avés esté frans et loiaus jusques a hores, qu'il ne



deüst pas assentir ne loër euvre ou nos eüssons point de deshenor. Quar vous avés pris lous sus tous d'estre li plus vaillans, si le devés mout garder. Et je l'ai veü de plesours que lor bien faire vont a noient par laide fin. Quar, quele 10 que la començaille soit, a la fin apent toute la besoigne. Et il me semble que vos volés deviner ce qui est a avenir, mais a tort l'avés comencié. Et certes, il n'i a a nul si haut prince que vos n'en deüssiés contredire, se il deüst ce que vos dites. Et toute fois vostre conseil n'a point de leuc, 15 et entendés coment. Nos somes ja assis ci aleuques cinc ans por la ville que nos volons destruire, et que que soit, sens ou folie, fait en avons nostre pooir tout, si que ja en avons abatu auques de lor orgueil, mais mout i a mort et pris de nos rois et de nos princes, et aveuc eaulz 20 plus de trente mile chevaliers. Et nos leur avons fait de grans damages ausi, mais nequedent n'avons nos tant que la pais en peut estre a l'onor de nos : por coi je di que je ameroie miaus estre getés hors de mon país a tous jors mais, ou estre tous depecés par menbres, que la chose 25 fust atant laissie ou que je m'en partisce en tel maniere, quar trop grant sont nos pertes a oblïer les ensi. Quar nos ne venimes mie por ce, ançois en serons destruit ou mort, nous ou ciauz de la ville, que un tout seul ne s'en tornera arieres. Ne nous ne somes mie de ceste ouvre si 30 au desous que nos doions faire plait que reproiché soit a nos hoirs. Et les grans gens que ci sont n'ont mie si fol sens que ce en pensee lor veigne. Por quoi je vos di que vos sermons ne sont mie bons ne avenable, quar nos ne somes mie en cest travail por Menelaus ne por Elaine, 35 ançois i est chascuns por garder son honor et son pris et por la renomee de sa corone acroistre. Et por ce jamais sans victoire ne nos partirons en tel maniere que de nos soit parlé jusques a la fin dou monde, quar mout est

coart qui se recroit tant come il puisse s'espee soustenir. 40  
Et vos, sires, qui ces parolles avés dites, en seriés mout  
blasmés, se l'en le seüst que vos les eüssiés dites a certes. »

**196.** COMENT LI DUS D'ATHENES PARLA.

Après ce que li rois Thoas ot ensi parlé, li dus  
d'Athenes sailli en piés et demora pensif une grant piece,  
et puis comença sa raison en tel maniere : « Des ores, »  
fait il, « m'est avis que nos henemis sont veneus selonc 5  
le semblant que je voi. Mais par tous les dieus que l'on  
aore, que se tous voloient loër et conseillier que l'ost s'en  
alast ensinc sans avoir del tout nostre gre, je ameroie  
miaus estre tous desmembrés que je eüsse doné tel  
conseil. Et mout me merveil dont ceste parolle vient et 10  
dont elle puet issir et dont elle muet, quar trop est cest  
conseil hontous, ne ne seroit pas assi grant mal tenus, se  
ce eüst esté dit par un de ces autres. Mais ce est noient,  
que je ne sai quoment tant roi et tant prince se honissent  
en tel maniere, ains croi que avant vodroient estre tous 15  
despeciés et demembrés por ce que li affaires ne fu pas  
comencie en tel maniere que l'on le doie ensi laisser,  
mais tout autrement covient ceste ouvre definer. Et por  
ce li desconforter n'i vaut noient, quar preudons ne doit  
la mort douter encontre si faite deshonor a amender. 20  
Et por ce loë je que demain soit li congiés as  
espees nues, si que nos lor mostrerons bien que nos ne  
somes ici por autre chose que por lor destruction. Et si  
faisons la chose parvenir haistievement a ce que elle doit,  
quar jamais n'avront pais a nos. » 25

**197.** COMENT IL S'ACORDERENT AU 'DIT LE DUS D'ATHENES.

Quant li dus d'Athenes ot son conte finé, la noise

comença mout grant entr'iaus, et mout i ot de ceaus qui distrent que il avoit trop bien dit, et assés en i ot de 5 ceaus qui distrent le contraire. Mais de tout les plusors fu otroié son dit, quel que cuer que eüssent. Mais que vos iroie je racontant ? A grant noise et a grand tençon s'en tornerent a lor paveillons, et si ont assés de coi parler, et Achillès de quoi penser. Mais se il estoit iriés, ce 10 ne fait pas a demander, quar trop en faisoit bien chiere et semblant, si que nus, tant fust privés de lui, n'i oisoit paller. Et por ce fist il sa gent maintenant venir par devant lui, et puis lor commanda sur lor vies que nus ne fust si hardis qui se deüst armer por chose que il veüst, 15 ne por parolles que Grizois lor seüssent dire, ne por nulles preieres, « quar puis que il sont issus de mon conseil, je lor moustrerai que je lor valoie. Et qui en autre maniere le fera, jamais ne le tendrai por mien, ne de ma part ne de moi nul bien ne li poroit avenir, qui 20 trespasera mon commandement. »

#### 198. UN EXEMPLE.

Merveilles fu, ce dit Daires, coment Achillès, qui estoit si saiges et engigneus en toutes choses, que il descovri si tost et si apertement son corage, quar quant l'en veut une chose faire de tout son cuer, se il est sages 5 et de grant porveance, il faine son corage maintes fois et moustre semblant que il veulle le contraire ; meesmement quant il voudra demander chose que il entent qu'ele soit contraire et encontre la volenté de ciaux por miauz venir a son entencion. Mais Achillès descouvri main- 10 tenant sa pensee et son voloir : por coi son dit fu tenu por suspechenous, jasoit ce chose que il ne seüssent riens de ce a quoi il baoit, ançois pensoient tout autre chose par aventure. Mais coment que Daires se merveille, je

endroit de moi ne me merveil pas, quant je porpens sor 15  
 l'achoisson de son mouvement ; car qui est si cruëlmēt  
 espris d'amors come Achillès estoit entrés, il est en pooir  
 d'autre et non pas en son droit sens ne en sa rasnable  
 matiere : por coi il juge maintes fois le faus por voir et  
 le voir por faus. Et est en la condition dou malade que 20  
 il eschieve a prendre ce qui li peut torner a santé et  
 desire au mangier ce que li peut doner la mort. Et vraie-  
 ment cil qui aiment en tel maniere püent estre resem-  
 blable a parpillon qui tant se trait envers la clarté de la  
 chandeille que il art. Tout ensi font tel maniere de gent 25  
 qui ne considerent point dou peril qui avenir lor puet,  
 ne ne gardent que la chose soit heneste ou raisnable ou  
 encontre raison, mais que il porsivent ce que la volenté  
 lor aporte ; et eslisent chose a faire que lor male fortune  
 ou dyable, quel qui soit, li donra pooir d'acomplir son 30  
 desirier. Et quant il avra compliment de ce que il avra  
 desiret, n'avra il pas tant gaaignié que une fausse maille  
 ne vaille plus, et si avra mis toute estuide et peril dou  
 cors et d'arme, et sa bone renomee, qui mout fait a tenir  
 chier, pert. Et en tel rage et en tel folie entra Achillès 35  
 por le regart de Polixenaim, si comē vos avés oï, et se  
 mist si dou tout en pooir d'Amors, que il en laissa et  
 oblia tout son sens et sa raisnable matiere. Ce meïsmes  
 est avenus plesours fois a maint saige dou Viel Testa-  
 ment, qui laissoient ce que lor ordene enseignoit et 40  
 sivoient lor folle entention. Et ce tout le premier Adan,  
 qui, par la science dou dyable et par l'enticement de  
 Evain sa compaignie, trespassa le comandement Nostre  
 Seignour. Le roi David fist tuër son seneschal por la  
 covoitise que il ot de sa feme. Salemon li sages, par 45  
 l'enortement de sa feme, laissa son souverain Dieu a  
 aourer et ahoura les ydeles. Sanson le fort descouvri

a sa feme que il avoit la force en ses cheviaus, dont elle le fist puis honir dou cors. Le duc Oliferne, por la covoitise de Judith, recuit mort par sa main, ja soit il chose que ce fu par la volenté Nostre Saignour, qui le vost por delivrer son pueple, mais li dus n'i avoit nulle extension se mauvaise non. Merlin, qui tant fu sages, en fu enfouis tous vis por une a qui il n'ot onques forfait. Virgilles li sages en fu escharnis et gabés laidement, selonc ce que l'en trouve as anciens estoires. Et maint autre qui ont lor cuer en amor mis qui sont esté deceü et honis au Dieu et au siecle : dont je ne me merveil pas se Achiellès perdi la droite voie et fu si chaitif a son commencement, quar il pensoit bien que ce qui plaisoit a lui deüst plaire a tous les autres, si l'avoit Amours aveuglé. Et poés savoir que il ne fu pas le premier a cui Amor tolt sens et mesure et raison. Et ensi avint a Achillès, quar a la fin le mena tant Amors a sa volenté que il s'enivra en sa fole outrequidance, que il a la mort recevoir en vint, si come vos porés entendre ici après. Si laisserons ore de ce ester et retournerons a nostre matiere.

**199. COMENT ACHILLÈS PENSOIT TOUS JORS A SES AMORS.**

En dementiers que la trive dura, firent li Grizois maint conseil et maintes fois s'assemblerent a parlement, mais onques Achillès n'i vout aler por nulle requeste que l'on li seüsse faire, dont il pesoit a tous les plusours. Mais de lui li estoit mout petit, ançois se tenoit tous jours avec ses chevaliers juant as eschais et as tables par semblant que de la guerre ne li fust mais riens. Et non estoit il sans faille, car celle qui l'avoit en ses las pris li avoit fait si toute changier sa maniere que toute la



pensee que il soloit avoir en fait d'armes et de guerre estoit tornee en amor ; ne mais a autre chose ne pensoit, mais que il peüst avoir a lui acordance. Tout autre pensee estoit celle des Grizois, quar as plesours tardoit mout li 15 terme de la trive et a tel sembloit que il fust trop pres. Mais quelque volenté que il eüssent, li termes failli.

**200. COMENT IL ASSEMBLERENT A MORTEL CHAMP.**

Les trives furent acomplies, et cil qui duit en estoient si s'apareillerent au bien matin a lor armes et a lor enseignes, qui toutes estoient renovelees. Et quant il furent montés, si se traistrent pres de la ville, Palamedès 5 devant tous les autres ; et autretel firent tous les autres. Et cil dedens refont ce meïsme: Li chans estoit delivres et moutlarges, et li chevaliers mout coi sous lor heaume et iriez chascun vers son henemi. Si s'esmut li uns contre l'autre, joignant lor escu a lor pis. Loirs veïssiés lances 10 brisier et la noise lieve si grant que l'en n'i oïst Dieu tonant ; si veïssiés chevaliers abatre sans relever et saietes et dars voler espessement, que grans merveilles estoit coment nus i peüst durer.

**201. COMENT DEÏPHEBUS OCIST LE ROI D'ARESCE.**

En mi leu de la bataille se combatoit li rois Airesce o toute sa gent, et mout estoit bon chevaliers, et grant damage faisoit a ceaus dedens : Resus avoit non. Mais Deïphebus l'aparçoit, si li court sus et li done tel cop 5 sor le heaume que tout lo fendi jusques as espaulles. Et cil chiet mort a terre, et cil prent le destrier et escrie s'enseigne. Si poingnent tuit les siens contre Grizois et les font les dos torner, si fussent desconfit, se ne fust li fils Thideüs et le conroi Palamedès, qui bien estoient dis 10 mile. Si fierent entre ceaus qui chaçoient et abatoient

mors chevaliers et chevaus, et lor font passer par mi les cors fer et fust et pennons. Si i dure li contens grant piece mout aspre et mout fier. Atant furent tous les conrois ensemble, si veïssiés gens sans merci, que il n'i avoit 15 raençon autre que la mort ; quar de prison ne tenoit l'en parolle, si se combatoient par plesours leus a grant trupelees. Le roi Thalamon, qui cousins estoit les fis Priant, estoit venus en la bataille, si le troverent fier et felon contre eaus et si mauvais cousinaige lor portoit que a un 20 des Bastars copa le bras, si que onques puis n'en feri d'espee. Deïphebus le voit, si en ot grant duel et dit que il fera son pooir de vengier le, se il puet. Si le fiert de tel vertu de son gleive que il porte lui et le cheval tout en un mont ; et puis met la main a l'espee et le fiert 25 sus son heaume grans cos, si eüst son frere vengié, se ne fust li dus d'Athenes qui ala ferir sor lui, et ses compaignons, si l'abatirent entre eaus. Et aveuc tout ce feroient il sus lui merveillous cos, se ne fust Troÿlus, qui s'esforça d'oster le des mains a ses henemis, qui mout 30 l'apressoient, et l'avoient ja abatu, si que lor passerent maint destrier sus lui. Adonc i vint Polidomas et Paris et tant s'esforcerent qu'il le traistrent hors de la presse tout sanglant et le firent remonter, et il se refiert en la bataille.

35

**202.** COME DEÏPHEBUS FU NAFRÉ A MORT, DONT IL MORUT.

Mult i ot celui jor crüel estor et mout se traveilla Palamedès coment cil dedens fussent desconfit, si i fist celui jor maintes beles chevaleries. Deïphebus broiche 5 sus lui et le fiert par mil'escu d'une lance, si qu'a poi que il ne li fist les archons voidier. Mais cil ne failli mie a lui, que par mi le cors li fist passer le fer de son glaive a tout

le fust. Hai ! las, mout a ci froide novele a la noble roïne  
 et au roi Priant. Si le prist Paris entre ses bras et l'en 10  
 porta en la cité, o tout le tronçon dedensson cors, mais il  
 n'estoit mie mors encores. Paris pleuroit durement et  
 maudit l'oure que il fu nes et que il tant vit. Mais hui  
 est le jor que il se fera ocire et dit : « Frere, après vos  
 ne veull je vivre. » Adonc ouvre Deïphebus les iauz et dit : 15  
 « Biauz freres, je vos pri sans plus que vos retornés a la  
 bataille et me vengies de Palamedès, quar se je savrai sa  
 mort, m'ame en sera plus aise ; et je retendrai mon esprit  
 tant qu'en sache la verité. Hastés vos, que par poi le cuer  
 ne m'esdement. » 20

**203. COME PARIS REVINT EN LA BATAILLE ET SE COM-  
 PLAIGNOIT DUREMENT.**

Paris s'en revint en la bataille plains de doulor et  
 ire, si qu'a grant poine pooit sor son cheval demourer.  
 Et pleure sa grant mescheance et la perte de son lignage, 5  
 si maudit sovent Fortune et qui en lui tient esperance,  
 et dit, si come home desesperés : « Haï ! las, por quoi doi  
 je avoir entention que nul bien me doie venir ? Je me  
 deüsse ocirre a mes deus mains, mais je croi que de ci  
 a brief terme sera assés qui le fera. Ja Dieuz ne consente 10  
 que je vive après mes freres ! Haï ! Ecuba, ma douce  
 mere, com grant dolors vos atent et quel angoisse vos  
 avrés quant vos verrés mors vos fils ! Biau dous pere,  
 quel confort avrés jamais ? Haï ! las, coment somes mors  
 et confondus ! Biauz dous freres, por vostre mort somes 15  
 en grant doulor, et por ce ferai je volentiers mon pooir  
 d'acomplir vostre volenté. Et miauz ameroie je a morir  
 que je ne vos venge de fin cuer. Sache Palamedès que se  
 je le truis, que a l'un de nos deus iert la guerre finée. »  
 Ensi dolent et ensi pensif et ententif de soi vengier s'en 20  
 vint Paris en la bataille, son arc tendu en sa main.

**204. COMENT PALAMEDÈS OCIST LE ROI SARPENDON.**

Palamedès estoit devant tous les autres et faisoit grans damage as Troïens et grant poine i metoit a bien guier sa gent, et crioit a haute vois : « Frans chevaliers, esvertués vos, quar a poi d'esfort les avrons desconfis. » Li 5 Troïens se defendent mout asprement, si que il n'i partirent dou champ plain pié, mais sans faille grant damage i reçurent de lor gent. Le roi Sarpendon, qui devers Troïens estoit, jeunes hom et vaillant durement, vit le tornoi si douloureux et le grant damage que Pala- 10 medès faisoit et coment il avoit Deïphebus mort, si en ot au cuer grant ire. Se li court sus le branc d'acier en la main et le fiert sur le heaume, que tout li embarre en la teste. Mais Palamedès li en rendi mout tost le gueredon, que la cuisse o toute la genoilliere li abati jus. Et cil 15 cheï mort de sa selle a terre.

**205. COMENT PARIS OCIST PALAMEDÈS.**

Quant rois Sarpendon fu mort, assés i ot grant noise, quar Grisois en sunt mout resbaudi, si se penerent mout d'avoir le cors ; mais ce ne peut estre, que Palamedès 5 les damage de tout son pooir. Si dura la chace jusques pres des fossés. Mais quant Paris choisi Palamedès, si point vers lui et l'avisa bien et trait par grant aïr, si ne li fist nul autre mal, mais que la maistre vaine de la gorge li trencha por desous la ventaille et l'abati mort en mi la 10 preisse. Mult fist Paris biau cop et mout greva ses hene-mis et lor fist damage grant. Et quant Grizois virent mort lor souverain prince, si en furent esmaïés tous les plus hardis. Et Troïens pristrent cuer et hardement, si que Grizois furent desconfis et mult grant perte firent de 15 lor gent. Mais Menelaus, Ayas Thalamon, li dus d'Athenes et Diomedès se retornoient mout sovent sor Troïens et lor faisoient mout grant damage et rescoroient

lor gent. Mais poi lor vaut, que ja n'i trouvent qui a lor  
s'apuie. Si vos di que selonc ce que nos trouvons, que  
jusques as tentes furent mis. Et illeuques defendoit chas- 20  
cuns sa vie, si descendirent Troïens tres devant lor  
paveillons, dont cil avoient fait murs et chastiaus. Hail-  
las! qui vit jamais si faite martire? Quar la farine qui se  
sassist ne chiet si espesement come faisoient saietes et dars,  
si meurent et fenissent a monciaus l'un sus l'autre. Si i 25  
gagnerent Troïens plus de cent pavillons tous pleins de  
riches hernois. Et d'autre part Paris et Troïlus o toute  
lor compaignie se traistrent vers la mer, si firent allumer  
les nes. Et a ce qu'eles estoient longuement demorees  
au souleil, si en ardirent plus de set cenx; et se ne fust 30  
Thalamon Ayas, qui o toute sa compaignie les ala  
defendre, nule n'i seroit demouree. Mes il dit a ses  
homes, quant il furent entor lui: « Veez la », feit il,  
« l'afere ou il n'a point de prison, que maintenant que  
l'on se rent, si est om mort sans merci avoir, por ce que 35  
mortel henemi sont, et a bon droit. Mais ensi est que il  
nos covient moustrer quant que il a de vallor en nos, et  
chascuns de nos doit penser que il doit mourir, ne nus  
ne doit haster son terme; et por ceste paor ne doit nus  
point douter, mais devons ferir sans nule doute. Et 40  
sachiés que il sont mes parens, mes ja ne s'en poront  
aparçoivre que je ne les damage a mon pooir. Or n'i a  
que parler, quar vos veés coment le besoig est si grant.  
Chascun defende son escu et sa teste desus les espauls. »

**206.** QUE GREZOIS FUSIENT DESCONFIT, NE FUST TALAMON AYAS LI ROI.

Adonc laissirent lor chevaul corre lor enseignes des-  
ploïes et vont orgueilleusement ferir sur Troïens. Si ot  
grant chapeïs et grant tençon et enstor si dur et si pesme 5



que dedens la ville en retentist le cri et la noise. Si s'en  
issirent plus de vint mille sans nul conroi fres et de-  
sirrans de conbatre. Mais Grizoisse defendent mout aspre-  
ment, et sur tous Thalamon Aÿas, quar, se il n'i eüst esté,  
tous i eüssent esté mort celui jor et les nes arses et la 10  
guerre finée. Meis grans merveilles i firent ses deus bras, si  
que il en ot le pris des deus parties. Mais tout ce ne lor  
valu noient, quar, por ce que il souffrir ne le porent,  
l'alerent dire a Achillès, qui dedens son pavillon estoit,  
si n'i avoit home de sa mesnie qui le jor osast porter 15  
armes contre son comandement. Si vint par devant lui  
Yber, le fis le roi de Trace, soi diseme de conpaignons qui  
ne sembloient mie chevaliers qui venissent de joër ;  
quar lor heaumes lor gissoient par pieces et par quar-  
tiers aval les espauls, ne lances ne escu n'avoient, mais 20  
lor aubers tous derompus et ensanglantés. Le fil de roi  
de Trace avoit par mi le cors un confanon atot le fer  
et le bras coupé en travers et ensanglanté et pale vis  
comme celui qui ja sentoit la mort. Si come il pot  
parler, si dist : « Achillès, culvert, bien a droit poés estre 25  
de traïson apellés, cui nos esguardés a ocirre par les  
mains de nos henemis, et veés que tous somes desconfis  
ne onques vostre escu n'i volés prendre la ou vos deüs-  
siés nostre honte vengier. Vil recreans, mauvais sus tous  
les autres, coment poés ce souffrir et defaillir nous a 30  
plus grant besoing ? Hai ! las, coment ne me puis je  
aprochier de vos, quar je ne vosisse de moi prendre autre  
venjance que vostre cors. Et si croi je que par lor mains  
serai je vengiés de vos meïsmes, quar ja sont pres de ci. »  
Adont vindrent trois messages de par Thalamon Aÿas et 35  
li distrent : « Sire Achillès, ce te mande le roi Thalamon,  
qui s'est hui tant combatu que il a perdu le plus de  
sa gent. Mais se vos le volés aidier a ce que vos estes fres,

nous en avrons tout le pris. » Adont respondi li fis le  
 roi de Trace : « Ja Dieu ne veulle que il face chose que 40  
 l'on puist retraire en bien ! Et je voi apertement que je  
 ne puis plus vivre, si pri Dieu que la soë ame suive les  
 nos jusques a brief terme. » Et lors cheï mort tres devant  
 Achillès, qui ne fist ne chiere ne samblant que il li en  
 soit rien, mais se joeit as eschas aveuc un sien cheva- 45  
 lier, et pense que encores avra son talent et que les Gri-  
 zois feront sa vollenté par fine force. Si dist l'Istoire  
 par voir que se le jor eüst plus duré, que la guerre estoit  
 finee : par coi li Troïens partirent de l'estor, et s'il  
 n'eüssent fait tele perte, mout lor estoit bien venu : 50  
 mais trop les esmaie la mort Deïphebus, qui mors n'es-  
 toit pas encores quant il revindrent le soir en la cité, si  
 desirroït mout veoir Paris. Et quant il vint devant lui, si  
 se pasma sus son cors, et celui s'esvertua de parler et  
 demanda se il estoit vengiés ; et quant il le sot, si dist : 55  
 « Des ores, » fait il, « m'ostés le tronchon, quar la mort  
 ne me grieve point, por ce que m'arme sera aveuc celle  
 de mon saignor mon frere. Confortés moi, » fait il,  
 « mon pere et ma dame de mere. » Et adonc li  
 failli l'esperit et fu fenis. Si en firent si grant duel que 60  
 jamais tel ne verrois.

**207.** [QUE DÉYFEBUS ET SARPENDON FURENT ENSE-  
 VELLI.]

Quant le Roi son pere le vit, ce ne fait pas a deman-  
 der se il fu dolent, quar si grant dolor li prist au cuer  
 que maintenant cheï paumé, et tout autel fist la roïne sa 5  
 mere, quar maintenant li renovela sa doulor de son fil  
 Hector, si nous poroit nus dire ne conter la merveille de  
 lor destrece. Si pleurent le roi Sarpendon assés, quar  
 mout lor valoit. Autretel firent cil de l'ost Palamedès,

et mout regreient sa proësce et son sens, et dient que 10  
malement leur vait en toutes besoignes. Et por ce fist  
li viauz Nestor, qui mout estoit sages, assembler un  
conseil de tous les princes et illeuc parla et dit :

**208.** [COMENT AGAMENON FU RELEÜ EMPEROR.]

« Saignor, » fait il, « ensi est avenu que mout avons  
perdu en ceste bataille ; meis non porquant encores  
devons penser coment nos puissons avoir victoire.  
Voirs est que Palamedès est mors, qui a merveilles 5  
estoit bon cheveteines et bien nos savoit gouverner.  
Mais vos savés bien que sans prince ne poons nous  
estre, qui soit nostre principal gouverneur, et por ce  
loë ge que sans plus attendre en soit un esleü. Et se  
vos mon conseil en volés croire, vos i metrois Agame- 10  
non, quar de tel office ne sot unques nus tant come il  
seit, et tant qu'il nos governa ne nos avient onques se  
bien non. » A ce s'acorderent tuit et maintenant en firent  
seignor. Si porés hui meis oïr la trezime bataille.











PQ  
1429  
A2  
1922

Benoît de Sainte-More  
Le roman de Troie en prose

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---



